

# الْحَاجِرُ

سمير حمايه

## الإهداء

### حبات الأمل

عندما تبعثر الرياح والعواصف أحلامك. لملم خيوط الصبر  
واجمع حبات الأمل وابدأ من جديد.

ملخص أحداث الجزء السابق

إستطاع حسن أن يجمع أول نواة لعشيرة تقاوم الظلم ، أحبوه جميعاً وسيدوه عليهم وعاهدوه على الوقوف خلفه ولن يتخلوا عنه وكان أول قرار من حسن إستكمال دخلة سديري على ليله واحتفل الجميع بهم داخل المغارة . وبدأ بعدها حسن تدريب سديري وجمدان ومرسال على التحطيب والسيف.

## \_ طريق الجبل

نسطر أحلامنا علي صفحات الأمل .، تتعدد الأبواب، وتكثر  
 الفصول ، وتُصبح كتاب بلا عنوان نظل نقرأه ونعجز عن  
 تفسيره ، لا تنظر إلى الخلف وأنظر هناك فالعالم  
 لم يكن يصلي قبل أن تشرق الشمس.

جعفر ورجاله فرضوا عليهم أن يدورون في ساقية بأعين  
 معصوبة وأجراس معلقة في رقابهم ليتمطيهم هؤلاء  
 الأغبياء، لم يتخلى ارمنيوس وبناته عن حسن ومن معه في  
 مغارة الجبل ومن وقت لآخر يحملون لهم الزاد والزواد  
 دائما يشعه تُجازف هي برحلة الجبل لكِبَر سن أبيها  
 والمرض الذي يُعجزه أوقاتاً كثيرة .

يشعة تسير كالعادة في الجبل حيث المغارة ، ولكن  
 هي لا تدري أن هناك عيون رصدت حركتها ، بكر وطلب  
 رصدًا سير يشعة في الطريق للجبل .

\_ أنت شايف اللي أنا شايفه ياواد يابكر.

\_ أيوه ، مش دي يشعة بنت المقدس.

\_ أيوه هي ، هي راичه فين في الجبل.

\_ تعالى نراقبوها من غير ماتحس بينا.

تهرب بأقدامها في طريق الجبل ولا تدري أن الوحوش

تحيط بها تتربص فريستها، هم يزرعون الرعب في أرض

الخوف ، يحرقون أغصان الزيتون، يصطادون طائر

الآمال، يذبحون الفضيلة ، والشرف ، والحرية، يقتلون الضمير.

بدأت يشعة الصعود للمغارة وطلب وبكر يراقبانها من بعيد

\_ دي باين عليها داخله بيت الكفار.

\_ استنى نشوف ، مش ده بيت

التعابين ياواد ياطلب .

\_ أيوه هو يابكر ياخويه.

.....

تصل يشعة مخل المغارة ، يقف مرسال حارساً

\_ ست يشعه .

\_ إزيك يامرسال .

\_ أهلاً بيك ، البيت بيتك؟

يدخلان المغارة وطلب وبكر يرصدان حركتها متخفيان  
وراء الأحجار .

\_ دي دخلت المغارة ياواد يابكر.

\_ شايف كل حاجه ياطلب.

\_ فيه حاجه وراها .

\_ تفتكر أيه ..؟

\_ حنعرف كل حاجه دلوقت .

.....

دخلت يشعه المغارة ورحبت بالجميع ، الحمداني  
وابنه حمدان وسديري وليلة ورحان وزوجته مسعده  
وحسن .

حسن

\_ إزيك يايشعه وازاي عمي ارمنيوس.

\_ بخير طول ماانتم بخير.

تلتفت نحو سديري .

\_ حمدالله بسلامتك ياسديري .

للحمداني وحمدان .

\_ كويس إنكم بخير .

الحمداني

\_ تشكري يابنتي .

حسن

\_ انت تابعه نفسك وبتيجي لحد هنا

أنا خايف عليك يايشعة .

\_ الأمل مولود والرب موجود ياحسن .

.....

اللصوص لم يتركوا لهم شيئاً يقتاتون منه ، الأصيل أصيل  
حتى ولو حظه مال ..والخسيس خسيس حتى لو ملك  
جبال.والكلب كلب حتى ولو زينوه بشال.  
طلب وبكر في حالة ترقب .  
\_ دي عوقت جوه ياواد يابكر.  
\_ ايوه ، أكيد بتقابل حد ؟  
\_ تفتكر مين جوه ؟  
\_ دلوقت حنعرف ؟

.....

داخل المغارة يشعه تودعهم وليله تحتضنها  
ليله  
مش عشيه كانت دخلتي على سديري.  
\_ الف مبروك ياليله ، ربنا عوضكم خير

تلتفت لسديري

\_ مبروك ياسديري

\_ الله يبارك فيك عقبالك يايشعه .

يشعه لحسن

\_ أنا كده إتعوقت ، حمشي بقى .

الفقير دائماً خارج خريطة الإنسانية مُطارِد في جبال  
الهم وصحاري الوجد ، حقه في الحياة ، نقطة باهتة  
على تلك الخريطة .

خارج المغارة حسن صمم أن يقوم بتوصيل يشعة

.....

المفاجأة أذهلت طلب وبكر.

\_ أيه ده ؟ شايف يابكر مين معاها؟

\_ أيوه ، اللي مايتسمى حسن .

\_ بينا نرجعوا ياواد نقول للزي .

\_ اللزي حيفرح قوى.

\_ بينا نرجعوا بسرعه.

.....

حسن بدأ يشتاق لهذا الحلم القابع بين زوايا المستحيل.

لا توجد منطقة رمادية في الحب ، لأنه مخلوق من نور قلوبنا

فقط هي من تتشح بالسواد أحيانا ، الحب هو اللغة الوحيدة

التي يتداولها العالم وتتفق على ترجمتها كل أحاسيس

العالم لا يفرق بين حاكم ومحكوم ، سيد وعبد ، كبير أو صغير

فقير أو غني . الحب لا يعرف سوى العدالة المطلقة التي

.. لا تفرق بين البشر.

حسن يسير مع يشعه يقوم بتوصيلها .

..عاوز أكلمك في حاجه .

\_ مش عارف أفتح الموضوع إزاي.

يشعه تبتسم .

\_ انت عاوز تكلمني عن لواحظ صح..؟

\_ أيوه ، ...أنت تعرفيها ؟

\_ لا ماليش كلام كثير معاها والمرة ..

الوحيدة اللي شفتها يوم ماكنت معانا  
مع النسوان ، لكن بتسأل عنها ليه ؟

لايدري كيف يحدثها ، وماذا يقول لها ، هل يقول لها  
هي الطفلة الشاردة التي تمرح وتلهو في قلبه وعقله

قديسة تكفلت بها الملائكة لتزفها حبيبة إلى قلبه هل  
يعترف بأنه الشقى المسافر إلى مدن أحلامها ليري شمس  
الغد على أسوارها .

حسن يحاول أن يجعل من سؤاله عنها أمراً عادياً ويشعه  
شعرت بحرجه في الإجابة .

\_إعتبريني شايل جميلها لما هربتني  
من حكم الإعدام .

يشعة تنظر لحسن وهي تبتسم.

\_ بس البت حلوه ، حلوه قوي،

وماسمعتش عنها حاجه وحشه

كل أهل البلد بيقولوا هي غير أبوها.

\_ بتسمعي عنها من مين .

\_ حلیمه بنت الطواب علی طول  
قاعدة عندها .

حسن يبحث عن تلك القبلة النائمة على شفاه  
الأحلام.

\_ وهي ماتجوزتش ؟

\_ حلیمه بتقول ، مش راضيه بحد  
ومافيش راجل مالي عينها وأبوها  
نفسه يجوزها .

\_ يعني قصدك ، هي مش لاقية..  
الراجل اللي يستاهلها.

\_ ايوه...

\_ من حقها .

\_ من حقها أيه ؟... أنت بتقول أيه.؟

\_ بقول من حقها تختار اللي تتجوزه.

\_ إحنا ما عندناش الكلام ده ، عاوزه

أقولك حاجه ، لواحظ شكلها عشقتك .

البت حلیمه بتقول ماورهاش غیر سیرتک  
 یشعة أدرکت أن الحدیث طال بهما وحسن  
 لا یدری شیئاً ، ویجب أن یعود ، خوفاً من أن یراه أحد  
 \_حسن الکلام أخذنا وأنت لازم ترجع ، احنا قربنا  
 على البلد .

\_ معاک حق ، خلی بالك من نفسک .  
 یشعه یابتسامة

\_ ماتخفش علیه ، وحقول لحلیمه تبلغ  
 لواحظ إنک بتسلم عیها .

## 2\_ مضيفة جعفر

لماذا أيامنا لا يليق بها الأبيض ،هي حمراء ،أو سوداء  
 وإن خَفت بعض الأوجاع، أصبحت رمادية، جميل أن  
 نظل نبحث عن ألوان الطيف ،لا تلتفت لمن لا ينظر إليك  
 فغالبا طريقه لا ينتهي بك،البكاء ليس ضعفاً ولكن أحياناً  
 نبكي بقوة لأننا تحملنا ما لا يستطيع الآخرون تحمله.  
 مآدبة كبيرة مليئة باللحوم وأطباق متنوعة من الطعام  
 يجلس عليها جعفر وإبنته لواحظ واللزي ومنيرة .  
 اللزي وهو يمسك بقطعة لحم ويقطمها.  
 \_يجعله عامر ياجناب الملتزم.

جعفر يضحك

\_ يارب يتمر فيك .

منيرة

\_ بيت كريم ومفيش حد

كريم زيك ياسي جعفر.

\_ كله من فضلة خيرك ياست  
 منيره، أنت ست كملُ عيبك  
 عيب واحد بس .إن أخوكي  
 اللزي .

يضحكون جميعاً ولواحظ تراقب نظرات جعفر لمنيرة  
 التي يخلتسها بين حين وحين ، ومنيرة تشعر بها  
 وتبتسم في صمت كأنها في خجل .

يدخل الحارس مهرولاً

\_ معلش قطعت عليكم الزاد.

\_ فيه أيه ياغول ..؟

\_ طلب وبكر عاوزين يقابلوا اللزي.

اللزي معنفاً الغفير

\_وده وقته ، قولهم يغوروا وأنا

حتغدا وأجيلهم.

\_

\_خليهم يدخلوا ، لما نشوف

أيه وراهم ؟

يدخل طلب وخلفه بكر .

طلب

\_ معلش قطعنا عليكم، بس احنا

مش قادرين نستنى ،

\_ قول يابجم منك له .

\_ تعرف شوفنا أيه ؟

\_ قول وماتطولش ، شفتوا ايه.

\_ شوفنا حسن .

يظهر الإرتباك على لواحظ ومنيرة لاحظت إرتباكها

\_ مالك يالواحظ ! فيه أيه ؟ وأنت اتخضيتي ليه.

\_ لا متخضتش ولا حاجه ، بس المسلوقة ( الشورية)

سخنه ليه .

\_ يعني كده بس !

اللي هزته المفاجأة هو وجعفر.

\_ شوفتوه فين اللي مايتسمى ؟

\_ في بيت الكفار اللي مليون تعابين

شُفت يشعه بنت المقدس أنا

وبكر رايحه على الجبل ، قطرناها

من غير ماتحس بينا ، لقيناها

دخلت بيت الكفار ، قعدنا إستئيناها

لقيناها طالعه هي وحسن بره المغاره

اللزى بفرحه

\_ وقعت وماحدش سمى عليك ياحسن

محدثاً طلب روح قول لهارون يحضر كل

الرجاله حنطلعوا في الليل نجيبهم من

الجبل .

جعفر

\_ حتجيبه الليله دي ؟

\_ أيوه ، مش حرتاح غير لما أجيبه.

لواحظ هزتها المفاجأة وقعت أكلها

\_ الحمد لله شبعت .

منيره

\_ لحقتي تاكلي !

لواظ

\_ اللي يشوفكم يشبع .

.....

الأشياء الجميلة قطارها دائم التأخير دائما، وبلا مواعيد  
وتبقي الأشياء السيئة، حاضرة علي كل محطات الأيام  
وقطارها نادرا ما يفارق المحطة ، دائما نحتاج أن نتكلم ولكن  
المصيبة أننا لا نفكر أنه لا يوجد من ينصت.  
خبر معرفة مكان حسن أزعج لواظ، سكت كل الكلام  
والصمت هو فقط من يتحدث ، يرتعش قلبها وعقلها  
تحدث نفسها ، كيف تتصرف ، ماذا تفعل لتنقذ حبيبها  
كيف تنقذ حسن قبل أن يلحق به اللزي ، لا تحسبن كل  
القلوب الجريحة ترفرف ذبيحة . بل بعضها يرفرف على  
الأرض لينفض كل الوجد والغبار العالق بها.

هداها تفكيرها أن تنزل إلى حديقة المنزل وتترك نفسها  
للصدفة ، أسرع في النزول للحديقة مهرولة وقطع عليها  
الطريق صوت أبيها.

\_رايحه فين يالواحظ...؟

\_حتمشى شويه في الجنينه .

\_تعملي أيه في الضلمه دلوقت .

اللزى

\_تاخذ منيره معاها.

لواحظ

\_ يابا إحنا لسه مدخلناش على العشا.

حتمشى لوحدي ، وأنت خايف من أيه؟

يابا أنا جوه الدار.

.....

في مدن العشق ايضا برودة وصقيع وسحاب وضباب وأمطار  
لا تنبت وعواصف صارخة تقتلع مشاعرك وتلونها باللون  
الرمادي ، لواحظ تخشى أن يهاجر الأمل ، قلبها يعاني  
دموع باردة لا تجد مكاناً للإختباء ، وقفت بجوار سور الحديقة  
تبحث عن شئ ما لتطفئ حرق إشتعل في بستانها  
ظلام ، نباح الكلاب ، ماتت الأغاني ، وجدت جزع نخلة على  
الأرض ، رفعتها على السور وتأكدت أنها تستطيع حملها  
هي ترمي نفسها في حوض الظروف ، عالقة في السور  
تحاول أن تتبين أي وقع أقدام ، تنهيدة خراب في الحياة  
تقتل أفراحها ، وترقص على شفا أحزانها ، تخشى أن يطول  
الإنتظار ، فيبحث عنها أبيها وربما منيرة ، تلك المرأة التي  
التي تشبه النحلة ، في فمها العسل ، وفي ذيلها إبرة .  
الصدفةُ تبكي حالها ، في حيرة معها وضعت الصدفةُ ذراعين  
لنتكأ عليهما لواحظ، الليل موحش وكأنه وحش متعطش  
للآهات ، الصدفة لم تبخل عليها ورمت في طريقها سلوتي  
يركب حمارته وهي صديقتها الوحيد وأنيسته .

السلوتي يتحدث مع حمارته بصوت عال ، رمته الصدفة  
أسفل السور وهاجرت بعيداً تبحث عن مجهول آخر  
لواظ تنادي على سلوتي بصوت خافت .

\_سلوتي ، سلوتي

السلوتي محدثاً حمارته .

\_فيه ايه يا حماره ، أنت سامعه حد بيقول سلوتي

\_أنا فوق منك ياسلوتي .

\_أنت ، أنت مين .

\_قرب متخفش أنا لواظ.

\_أقرب فين ، مش شايف حاجه

\_أنا فوق السور.

\_انت عفريته جعفر صح ؟

\_ياسلوتي أنا لواظ

يقترب السلوتي ويرى ملامحها

\_ايوه أنت لواظ ، ومتشعبطه كده ليه ؟

\_تعرف مكان حسن ياسلوتي؟

\_أنت حلوه وحقولك ، أيوه أعرف في مغارتي

وسبتها ليه

\_طيب روح جري عليه وقوله أن اللزي

بيحضر رجالته وحيروحله الجبل دلوقت

السلوتي .

\_عاوزين أيه من حسن .

\_عاوزين يمسكوه .

السلوتي يجري بحمارته وهو يهرتل

بالكلام .

\_لا حسن حلو ، بلاش حسن.

يتجه بحمارته إلى الجبل، عادت لواحظ إلى حجرتها وهي تهذي.

أي جرم إرتكبناه، لِمَ يازمن تتخطفنا ، بأي شرع تحكم،  
حتى نستحق العقاب

## 3\_ دار الطواب

عندما ينام الوطن تنطلق اللصوص وتنتشر الشياطين وتكثر  
الرايات الحمر...متى تستيقظ ياوطن، أسفل شجرة الوطن  
الباكية نللم وريقات دامعة جرحها الخريف، دار بسيطة من

الخوص ، يعيش فيها الطواب ،صانع الطوب اللبني وابنته  
حليمة وزوجته مصايب ، هي زوجة كارثية ، ترى في إسمها

ماليس فيها ، رغم إعتقاد زوجها الفخراني أنها إسم على

مُسمى ودائما يربط بين إسمها وشخصيتها وكانت تغطاظ

من ذلك وتتشاجر معهم وفي يوم كانت إمراة حلبية تمر

أمام الدر وسمعت مشاجرة بينهم ومصايب تُقسم أن

تغير إسمها ، وفي الي التالي جاءت المرأة الحلبية

أمام الدار وتناي .

\_بيع الأسامي الجميلة للبنات والنسوان الكجيلة.

سمعتها مصايب وخرجت ونادت عليها .

\_أنت بتبيعي أسامي؟

\_أيوه ببيع الأسامي الجميلة  
 للبنات والنسوان الجميله  
 \_طيب قوليلي عندك أيه أسامي وريني  
 \_ عندي اسماء كثيرة بهانه، عيوشه  
 تركيه .جملات دي أسماء رخيصة  
 \_طيب والإسم الغالي أيه.  
 \_لا ده تمنه كبير  
 \_كبير يعني بكام؟  
 \_تمنه بقرة بتحلب.  
 \_ماتغلاش عليه ، أيه هو الإسم  
 \_ست الحسن  
 \_يعني لو اديتك بقره ، أبقى ست الحسن  
 \_أيوه ست الحسن وست الستات.  
 إحتالت الحلبية على مصايب وأخذت البقرة حيلتهم  
 ومصايب إستحمت ومشطت شعرها وجلست  
 في منتصف البيت مربعة رجليها والفخراني

ينادي عيها

\_يامصايب ، يامصايب.\_

خَشي الرجل أن تكون قد ماتت وكسر الباب

ودخل ليجدها تجلس في زهو وفخر

\_أيه ياوليه أنا مش بنده عليكي

\_إنا ماسمعتش.\_

\_إزاي دا الناس كلها سمعتني بصرخ

يامصايب

\_انا خلاص ماإسميش مصايب أنا

دلوقت ست الحست

\_وجبتي منين ست الحسن.\_

\_إشتريته

\_إشترتیه بأيه؟

\_بالبقرة .

الفخراني انهال عليها ضربا بيده ولطم على خديه

على حظه العاثر بها وخلصتهم حليلة باعجوبة  
هو دائما يعتمد على حليلة ولا يعتمد على زوجته.

.....

يشعه تطرق الباب وتفتح حليلة وكانت مفاجأة لها  
أن تجد يشعه هي لم تكن متعودة على زيارتها.  
\_يشعة ، إدخلي.

\_إزيك يا حليلة.

تدخل يشعه وتتبادل التحية مع الفخراني ومصايب  
حليلة أخذت يشعه لمنتصف الدار حيث توجد دكة  
واجدة .

\_اقعدي يا يشعه ، عامله أيه أنت وازاي حسن.

\_حسن بخير ، كنت عنده النهارده.

\_بلاش تروحي ناحية الجبل كثير.

ممکن يشوفوكي.

\_ الرب موجود يا حليلة.

\_أخبار لواحظ أيه ؟ لسه بتتحدث عن حسن.

هي وراها غيره .

\_وباین حسن کمان انشغل بیها.

\_إزای ؟

\_وهو کان بیوصلنی مابطلش حدیت علیها.

وقلی سلمیلی علیک .

\_بتتکمی جد حسن بعت سلام لیها.

\_أیوه.

\_یا فرحتک یالوا حظ .

## 4\_ طريق الجبل

ما الحياة إلا إختبار من نار ، لا يجتازه إلا القليل ، ولك الخيار بين جنة، وجحيم.. فمن يمكنه النجاح في إختبار النار.

في ظلمة ليل عاثر ، مضى سلوتي يتلمس طريقه إلى

الجبل، هو يعرف طريقه ، يستأنس بضُباح الثعالب وعواء

الذئاب ، حتى حمارته تحولت لسفينة صحراء تنافس أعتى

الجمال ولكن هو ينهق والجمل يوبخبخ. وصل إلى مدخل

المغاره، لم يهتم بمرسال وهو يحاول أن يتبين سبب حضوره

في هذا الوقت، لم يعبا بغضب مرسال الذي جرى خلفه إلى

الداخل ولم يتوقف حتى وجد حسن أمامه ، يُحدث حسن

وهو يلهث وأنفاسه متصاعدة تسابق بعضها بعضا. ينطق

وهو يتلعثم وتتفرق من فمه الحروف.

\_ح، حس، حسن.

\_أيه ياسلوتي ! فيه أيه ؟.

\_فيه ؟.. ف ، فيه ؟

\_ريخ وخذ نفسك.

يمسك حسن بيد السلوتي ويجلسه على الأرض

\_اللزى جاي هنا المغارة الليلة.

الحمداني

\_جاين هنا وعرفوا إننا هنا إزاي؟

حسن

\_إستنى ياعم حمداني خرينا نفهم

أكيد كشفوا يشعه ومشوا وراها

يلتفت نحو السلوتي.

\_سلوتي وانت عرفت من فين

\_لواظ هي اللي قالتلي

حسن

\_لواظ!

\_أيوه ، هي قالتلي قول لحسن

أنا حمشي أحسن يمسوني

اللزى ايده ثقيله

يخرج السلوتي مهرولاً من المغارة مبتعداً عن المغارة

الحمداني

يمكن الكلام مش صح يا بني.

لوا حظ بنت جعفر حتعمل معروف ليه .

وحتكذب ليه يا عمي ، لوا حظ

سبق وأنقذتني من تنفيذ حكم الإعدام

المهم الآن لازم نفكروا في حل ، أنا حاخذ

حمداني ومرسال ونشوفوا مكان ناخدكم فيه .

خرج حسن من المغارة بحثاً عن مكان ، يخوضان مشقة

الطريق ، صعدا إلى الدرب يتلمسان طريقهما عبر الأحجار

## 5\_ حجرة لواحظ

أكثر أساطير العشق مفقودة، وتبقى أسطورة عشق،  
 حلیمه تائهة ، عبر ممرات الأيام، روعة العشق، أنه يُغير  
 العالم ،، يستهلكه بلهب الإحتراق، ليل بلا نهار ، من أي  
 سلالة هم ، تيار يتدفق من الأحزان في أعماق لواحظ  
 لا تزال تُفكر وتفكر فيما قد يحدث لحسن، النسمة باردة  
 على خديها ويكاد الهواء يهاجر فضاء حجرتها ، لم تصنع  
 كعادتها في المساء فطيرة من دمع العسل ورحيق الزهور  
 وطعم الفاكهة ، قصيدتها اليوم تلونت بالوجع، قطع تفكيرها  
 دخول حلیمه عليها وهي في حالة فرح ونشوة .  
 \_ أنا جبتلك خبر يفرحك قوي ياست لواحظ.  
 \_ ماعدش فيه أخبار تفرح يا حلیمه؟ أنا خايفه قوي.  
 \_ خايفه من أيه ؟  
 \_ اللزي والرجال طالعین الجبل یمسکوا حسن.  
 \_ وعرفوا مكانه إزاي ؟  
 \_ طلب وبكر شافوا يشعه وهي رایحه لحسن.  
 \_ دي كانت لسه عندي، أيوه قالتلي إنها كانت عنده.

\_ طيب والعمل دلوقت ؟

\_ مكنش قدامي غير السلوتي قولته يروح يبلغ حسن

\_ مالقتيش غير السلوتي ، مايتبلش في بقة فوله.

\_ مكنش قدامي غيره .

\_ أنت مش حتجيبها البر، مش حتسكتي لحد

ماتودي نفسك في داهية.

\_ سيبها على الله ، قوليلي أنت يشعه

قالتلك أخبار عن حسن .

\_ أيوه ، وفيه أخبار حلوه ليكي.

\_ ليه أنا ؟

\_ زي مابقولك كده ، حسن وهو بيوصل يشعه

طول السكة بيكلمها عنك .

\_ لا ! لا ! مش مصدقه!، حسن بيتكلم عليه؟

\_ وهو أنت شويه ياستي ، أنت أحسن الرجاله

يتمناكي.

\_ وأنا مش شايفه في الدنيا غير حسن .

\_ قوليلي قالت أياه تاني.

\_ حسن باعتلك السلام معاها

لم تتمالك لواحظ نفسها من البكاء، بكاء فرحه ممزوج  
بالحزن ، الناي تتكسر نغماته، يتركها في صمت ، بلا  
مواساة ،فقصيدة هذا المساء ضالة تبحث عن حروف  
الأبجدية.

## 6\_ في الجبل

ما أصعب اللقاء في زحمة العمر ، لنسج روايات نكتشف أن كل أبطالها من الخيال ، فنحيا معها ، وعندما نلملم الأوراق و تنتهي الفصول ... لا نجد سوى كتاباً إستمتعنا به لحظات ثم كان مكانه مكتبة الذكريات ، اللذي رجل قوته في خدمة الشيطان ، لم يستخدمها يوماً في خدمة الناس وأهل البلدة يُعَثرُونَ لعناتهم عليه. القمر أوشك أن يكتمل بدرأً .

اللذي هروا بكل رجاله نحو الجبل وبالقرب من المغارة  
\_ هارون أنت خد نفرين وروحوا من اليمين

لكريم

\_ وانت ياكريم نفرين من شمال بيت التعابين  
وأنا وباقي الرجاله حندخلوا من النص ونتقابلوا  
قُدام بيت التعابين ، كده مش حندوا فرصه لحد  
يهرب.

.....

للحيرة بحار، لا تمر بها سوي سفن العذاب ،ومراكب اليأس  
ولا مجال لقوارب الأمل في الصيد فيها،حسن وحمدان  
ومرسال في مغامرة البحث عن مكان آمن، بعد عناء ومشقة  
وجدوا مكان متطرف بعيد عن العيون ومناسب.

حسن وهو يرتاح على أقرب حجر.

\_ المكان ده كويس وأفضل من المغارة الثانية  
\_صياد حتى مكانه بعيد عن عفرة الريح، ونقدر  
نكشف منه أي حد يفكر يقرب منا .

ده الدرب الحقيقي وسبحان الله ، شارع طويل  
بين جبلين ، لا وأيه درب عالي ومداخل الدرب  
حجارتها كبيرة تنفع في مواقف الصيد او صد  
عدو.

\_ كمان فيه خير كتير وأرانب جبلية.

\_ كده الوقت حيفوتنا ، نرجع نجيبهم من المغارة  
قبل مايوصل اللزي .

.....

## 7\_ داخل المغارة

حياتنا بين صفحتين حلم وأمنية وغالبا نقف أمام الصفحتين

منتظرين، علمتنا الأيام أن الحزن لا يتحقق إلا بعد أن

نعيش الحلم، ونعيش لقاء بعد أمنيه، بعد طول إنتظار وبحث

في ذاكرة الحياه، ثم نستيقظ علي حمم لبركان الألم

وزلازل تهز أركان الجسد، وتُصبح رهينه بين الإنتحار

والإحتضار.

داخل المغارة الحمداني وسديري ورحان وزوجته مسعدة،

في قلق يترقبون حضور حسن ، الصمت يخيم على الجميع

سديري محاولاً كسر حاجز الصمت .

\_ وحدوه ؟

\_ لا إله إلا الله .

\_ ماتقلقوش زمان حسن وحمدان ومرسال

لقيوا المكان وراجعين ، وإن شاء الله يكونوا

هنا قبل اللزي .

\_ ماحدثش حياخد أكثر من نصيبه يارحان ياخويه.

عندما ينتحر الإنتظار يرقرف الأمل ذبيحا تحت أقدام

الأشقياء ، بينما هم في قلقهم وحيرتهم ، حدث

مالم يخطر لهم على بال ، فأسوأ الأحلام ليس التي لم  
تتحقق ولكن التي تتحول إلى كوابيس.

اللزّي يدخل عليهم المغارة ومعه هارون وكُريم وبعض الرجال

ملاك موت هبط داخل المغارة ، توقفت أنفاس الحمداني

ورحان ومسعدة ، ليله وسديري بعيداً في داخل المغارة ولا

يشعران بما يحدث ، هم في سكرة عشق غابت بهم بعيدا

لتطوف الخيال ، لا يشعران بشئ طوال اليوم، ولم يصلهم

خبر قدوم اللزّي ولا خروج حسن بحثاً

عن مكان جديد يأويهم ، أتاهم الشر قبل أن

يطرق الباب، أصابتهم لعنته، ماتت الأناشيد ، ظائر اليأس

يُحلق مُستعمراً المكان ، اللزّي يبتسم ساخراً وفي داخله

يقيم أفراح إبليس .

الحمداني محاولاً التماسك ولملمة شتاته واللزّي لا يزال

يتفحص المفجأة .

\_ مين ؟ الحمداني ! شُفت الدنيا ضيقه إزاي؟

\_عاوز مننا أيه ؟ البلد وتركناك تبرطع فيها، اتركنا

في حالنا .

اللزّي يقترب منه وهو يبتسم بسخرية  
 \_ أتركك في حالك ، غالي والطلب رخيص  
 ح تركك لما أخلص عليك، ماهو مش  
 معقول اللزّي يجي الجبل ومايتركش  
 عشا للديابه، الديابه كده حتقول عليه بخيل.  
 يرفع اللزّي يده ليضرب الحمداني فيدخل سديري  
 وخلفه ليله ويقف في مواجهة اللزّي جاعلاً الحمداني  
 وليله خلفه . يمسك بيد اللزّي.

\_ نزل إيدك يالزّي .

المفاجأة تُسعد اللزّي .

\_ لا ..! مش ممكن ! كل الحبايب هنا.

دنا محتاج أشكر حسن اللي جمعلي الحبايب  
 كلهم.

يقترب من ليله ويضع يده يتحسس وجهها وليله  
 في ذهول .

\_ وأنت كمان هنا يا عروسه ؟

سديري يندفع نحوها ويبعد يد اللزي .

\_ ايدك ماتلمسهاش دي مرتي .

اللزي ارتفعت حدة غضبه

\_ ماشي ، مش حلمسها

يهجم على سديري ويكيل له الضربات المتلاحقة

ليلة تحاول الدفاع عن سديري فيدفعها اللزي وتقع

بجوار مسعدة ورحان وهما يجلسان في دهشة

وذ هول ، رحان عجز عن التصرف ، أمسك بليله

ليبعدها عن اللزي ومسعدة تحتضنها وهي تصرخ

الحمداني حاول أن يتدخل هو الآخر للدفاع عن سديري

فأمسك به هارون وإنهال عليه ضرباً واللزي لا يتوقف عن

ضرب سديري ، حتى أُجهدت يداه فبدأ الضرب بالعصا

الضربات كانت أقوى من أن يتحملها سديري ، كريم

هجم وإنهال بالضرب على رحان الذي حاول تخليص

الحمداني من أيديهم ، سديري يسقط على الأرض

صريعاً ، ليله تتجه نحوه وترتمي عليه وهي تصرخ

\_ سديري ، سديري ، اوعي تموت وتسييني لوحدي.  
 \_ روجي حتفضل معاك ياليله ، أنا شايفك قُدامي  
 عروسه حلوه لابسه أبيض في أبيض ، ماتبكيش  
 ياليله ، شايف ناس لابسين أبيض في أبيض جاينين  
 ياخدوني ، ليله أنت أحلى ليله في ليالي حياتي  
 يقبض روجه ملك الموت ولا يتحرك وليله تصرخ  
 ورأسها فوق صدره، اللزي يمسك بها ويرفعها من فوق  
 سديري ، ليله تقف وتضرب بيديها صدر اللزي وهي تصرخ  
 وتهذي ، اللزي يرميها على كُريم .  
 \_ خذها الدار عندي .  
 اللزي يطلب من أحد رجاله تفتيش المغارة من الداخل ،  
 وسرعان مايعود.  
 \_ مفيش حد تاني جوه ياسبع.  
 \_ يبقى اللي مايتسمى مش هنا .  
 هارون وهو ممسكاً بالحمداني ورحان  
 \_ حنعمل فيهم أيه .  
 \_ حتاخذهم معانا .

كُريم يُشير إلى مسعده .

والوليه دي حنعمل معاها أيه.

\_أنت حتستنى معاها هنا ، أنت ومعاك كام راجل.

ولما يجي حسن إمسكوه وهاتوه. ولو مارجعش

سيبوها للديابة .

رجال اللزي أحاطوا بالحمداني ورحان وليه ومسعده

لا تتوقف عن البكاء وصب اللعنات عليهم مشفقة على

زوجها رحان وكَبّر سنه ، اللزي يأمر رجاله بالنزول برحان

والحمداني وهو أمسك بليله ، خرج اللزي وبعض الرجال

من المغارة وتركوا كُريم وبعض الرجال مع مسعده لينتظروا

قدوم حسن ويُمسكون به .

خارج المغارة ، اللزي يمسك ليله وهارون يمسك

بالحمداني، وطلب يمسك برحان ، اللزي في المقدمة

يمسك بليله

الحمداني لا يتوقف عن اللعن والسباب ويعافر مع هارون

حتى يتخلص منه ، هم في حالة نزول من أعلى المكان

الذي يحتضن المغارة، الحمداني يقترب من اللزي.

\_ سيب ليله يالزي ؟

الحمداني حاول أن يشتبك مع اللزي فعاجله اللزي  
بضربات قوية أفقدت الحمداني توازنه وتدحرج من أعلى  
إلى أسفل الجبل ، ليله تصرخ لسقوط أبيها.

\_ أبويه يا ...؟ تبصق على وجه اللزي.

يصلون لأسفل الجبل ، أحد رجال اللزي يتأكد  
من حالة الحمداني ، وجده مقطوع النفس .

\_ الحمداني مات ياسبع.

ليله تصرخ أبيها حتى فقدت الوعي .

.....

حسن وحمدان ومرسال في رحلة العودة إلى المغارة  
حمدان توقف فجأة ، يجثو على ركبتيه يتحسس الرمال  
\_ فيه آثار أقدام واضحة يا حسن وأقدام كثيرة ، حسن  
يجثو على ركبتيه هو الآخر متتبعا آثار الأقدام.

\_ معاك حق يا حمدان اللذي ورجاله سبقونا على المغارة.

واصلوا السير بحذر وترقب ، صوت أنين وتوجع من الحمداني  
لم يمت، كلما إقتربو من منطقة الصعود للمغارة الصوت يكون  
أوضح .

مرسال

\_ سامعين اللي أنا سامعه .

صوت الحمداني

\_ سيب ليله يا ظالم.

حمدان

\_ ده صوت أبويه .

يقتربون من مصدر الصوت حتى يصلون إلى مكان الحمداني

الدماء تسيل من وجهه ، غير قادر على الحركة، حمدان

كاد أن يصرخ أبويه فكتم حسن أنفاسه .

\_ إمسك نفسك يا حمدان .

حمدان يرتمي على صدر أبيه .

\_ فيه أيه يابا .

\_ اللذي أخذ ليله يا حمدان وقتل سديري .

\_ إمتى حصل الكلام ده ياعمي.

\_ من شويه يا حسن يا بني .

بيكي بحرقه

\_ حترجعلي ليله صح يا حسن ، قولي حجيبك ليله.

\_ ماتقلقش ياعمي وسيبها على الله ، المهم تهتم

بنفسك ياعمي دلوقت .

حمدان

\_ طيب يالزي ، وراك والزمن طويل .

حسن

\_ حمدان ، خُد أبوك بالراحه واطلع بيه على

المكان اللي كنا فيه .

\_ وأسيبك لوحدك.

\_ ماتقلقش عم حمداني الأهم دلوقتي

وبعدين معاه مرسال .

حمدان

\_ لا حاجي معاك يا حسن مش حسيبك

حمدان لأبيه .

\_ تقدر تتحمل شويه بابا .

\_ حقدر يابني ، ماتسبش حسن.

حسن

\_ طيب ياعمي ، تعالى ناخذك في مكان أمين

واتحمل لحد مانيجي ناخذك.

حملوا الحمداني حتى وضعوه خلف حجر كبير بعيدا  
عن طريق الصعود والهبوط للمغارة ، بدأ حسن وخلفه  
حمدان ومرسال للصعود إلى المغارة في ترقب وجذر  
إقتربوا من الجانب الأيمن للمغارة لم يجدوا أحد في  
مدخل المغارة .

\_ مفيش حد واقف قدام المغارة .

\_ عاوزين يفاجأونا يا حمدان ، اللزي أخذ ليله

ونزل ونصلنا فح فوق جوه المغارة.

\_ طيب والعمل دلوقت ، أحنا مانعرفش

عددهم جوه .

\_ استنى يا حمدان

حسن يمسك بحجر كبير ويدخرجه من أعلى، يخرج  
أحد الرجال متلمساً مصدر الصوت الذي سمعوه وهم  
بالداخل ، يحاول أن يستطلع الموقف ، حسن يأتي  
إليه بخفة من الخلف ويكلم فمه ويضربه على رأسه  
ويشد الخناق عليه .

\_ قولي اللزي جوه ؟

الرجل يشير بيديه بلا وحسن يضغط على رقبته بمعصمه  
بقوة .

\_ مين جوه وكام عدددهم .

\_كُريم ومعاه اتنين من الرجاله .

حسن يوجه له ضربات متتالية حتى يترنح الرجل  
ويسقط من أعلى.

من داخل المغارة يقلق كُريم من تأخر منازع ويطلب

من بكر الخروج ويأتي بمنازع حتى لا يراه

أحد، بكر يخرج ويتحدث بصوت واطي.

\_ واد يامنزع ، أنت فين ، فينك يابو ( ابو هو دومية  
يصنعوها للبقرة أول الجاموسة التي يموت وليدها  
وحتى لا تقطع الحليب ، يقومون بحشو جلد وليدها  
الميت بالتبن ويضعونه أمامها على أنه وليدها ويمكنهم  
بعدها حلبها بسهولة .

حسن يكتم فم بكر من الخلف ويرمي به على حمدان  
ومرسال ، يتلقانه بالضرب المبرح حتى يفقد إترانه  
ويسقط من أعلى ، حسن يعلم أنه لم يتبقى من الداخل  
سوى كُريم ومعه رجل واحد. يدخل حسن المغارة محدثاً كُريم  
\_ أنا جيت ، عارف إنك مستنيني .

كُريم ساخراً

\_ حمدالله بالسلامة .

يحمل كُريم عصاه ويتجه نحو حسن ويوجه له ضربة قوية  
يتفادها حسن ، يهجم عليه الرجل الآخر فيركله حسن  
بقدمه وكُريم يباغت حسن بضربة أخرى يتفادها ويمسك

بالعصا ويضرب بها كريم ، الرجل الآخر حاول الهروب  
فتلقفه حمدان ومرسال ، يستطيع كريم الهرب  
وخلفه الرجل ، حسن وهو يتجه نحو مسعده يجد  
سديري مُلقى على الأرض ميت فيتجه نحوه صارخاً  
\_ سديري ، سديري .

يجري حمدان نحو سديري ويرتمي على جثته  
\_ سديري ، سديري ، كلمني ، رد عليه  
أنا حمدان صاحبك ( بيكي بحرقة ).

مسعده

\_ قتلوه يا حسن وأخذوا عمك رحان والحمداني  
وليله .

مرسال

\_ عم حمداني لحقناه وبخير.

حسن يهذي ويضرب على حائط المغارة  
وهو يصرخ .

\_ دمك مش حيروح هدر ياسديري ولا كمان  
دم أبويه اللي راح بسبب الظلم والطغيان  
أنا وراك يالزي والزمن طويل .

## 8\_ أمام دار الشيخ آدم

يستسلم الشيخ آدم لمقص عبدالمتجلي هو لا يفرق بين قص شعر الجمير وقص شعر النبي آدمين ، غير ماهر في ضربات المقص وغالباً يُحدث مشاكل في كل حلاقة ، قد يسيل بعض الدماء وينال الكثير من اللعنات والسباب بالقول ياقصاص الحمير ،عبدالمتجلي رغم أنه جاهل في قص الشعر ولكن كل ماكان يعتقد المحلوق لهم من تبويظ شعرهم أصبح موضة فهو أول من قص قصة الكابوريا وتجريد للشعر من أسفل لأعلى وأول من كان يقص قصة عُرف الديك.

الشيخ آدم بخفة ظله المعتادة.

\_ عارف يا عبدالمتجلي .

عبدالمتجلي بخنفته الظاهرة وأسلوبه المعتاد في الحديث من أنفه .

\_ قول ياسيدنا .

\_ أسوأ حاجة في البلد دي حاجتين،اللزى ورجالته.

\_ والحاجه التانيه هي أيه ؟

- \_ إنك الحلاق بتاع البلد دي.
- \_ أنا أحسن مزين يعمل تجريده.
- \_ ياخي إتنيل ، بتسمي الشلفطه بتاعتك تجريده.
- قولي يا عبد المتجلي .
- \_ أيوه ياسيدنا .
- \_ مفيش أخبار جديدة ، في البلد دي
- اللي بتولد كل يوم مصيبه .
- عبد المتجلي يضحك ويزداد خنفانه .
- \_ هي البلد بتولد كمان زي الحرير.
- \_ أيوه بتولد وتَحْبَل كمان ، تكون حُبلى في الليل
- وتلد مع طلوع الشمس.
- \_ والله ما فاهم حاجه .
- \_ ولا حتفهم لأنك جُغف ، بقولك أخبار البلد أيه ؟
- \_ مفيش غير اللي سمعناه ، اللزي مستنى حسن
- ينزله علشان يخلص الراجل قريبه .

\_ وتفتكر ياواد يا عبد المتجلي يقدرُوا يمسكوا حسن؟  
\_ لا مفتكرش ، ده واد عفريت ، سمعت أنه ضرب كريم  
وبكر والرجاله ولسه فيهم اللي وشه وارم واللي بيُعرج.  
\_ أهو اللزي هو اللي كان يستاهل العلقه دي ؟  
خلصني بسرعه علشان أروح أعدي على المقدس.

## 9\_ داخل حوش كبير

يدخل اللذي الحوش حيث يحبس رحان ، ديبب أقدامه تكاد تكون معروفة ، فلديبب أقدام أهل الشر صوت مُزعج حتى ولو كانت خطواتهم هادئة ، لا ينفض عن قلبه الشر العالق في قلبه ، رحان يجلس في ملكوت آخر ، يداعب نسمات الإيمان ، أنفاسه مسربله بخيوط الصبر، ممسكاً بسبحة لا يتوقف عن التسبيح .

اللذي ببرود متناهي.

\_ قولتلي إسمك أيه .

\_ رحان .

\_قولي يارحان ، حسن يقربلك أيه ؟

\_ يبقى ابن أخويه.

\_ كداب ، وعيب تبقى راجل كبير وماسك سبحة وكداب.

أنت عبد عند الواد ده .

\_ لا مش صح ، أنا كنت عبد عند أبوه ، ولكن دلوقت حر.

\_ أيوه ، يعجبني الكلام ده ، أنت دلوقت حر ، أيه رأيك

تسلمني حسن وأن أديلك دار وأخليك تعيش وسطينا.

- \_ مش عارف أرد عليك وأقولك أيه يابني ، ربنا يهديك  
عاوزني أسلمك حسن ، أنت تعرف حسن بالنسبه لي  
أيه ، أغلى من ولدي وأغلى من نفسي كمان.  
\_ فكر في اللي قولتك عليه ، وقدامك وقت طويل  
علشان ترد عليه .  
\_ طلبك ما يستاهلش أفكر فيه يالزي.  
\_ يبقى خليك وسط البهايم ، الظاهر إن عيشتهم عجباك؟  
\_ على الأقل أحن من بني آدمين كثير.

## 10\_ داخل دار أرمنيوس

مع غياب الفرحة والنور ، يصير الحلم كابوساً مُزعجاً  
 ووجوه البشر لا تشرق بنور الصباح، بل تَغْرُب دائماً  
 مع الشمس ، ليتسع الطريق للحشرات تنتشر هنا  
 وهناك بأنواعها المختلفة ، فيها العقارب تسير في  
 دبيب رافعة ذيلها ، تبحث عن قطعة من الجلد تتبول  
 فيها سُمّها، وهناك الأفاعي تتلوى وتتراقص بحثاً عن لدغة  
 ولكن الأفاعي أحسن حظاً من البشر ، فهي لا تؤذي  
 سوى من يؤذيها .

يجلس الشيخ آدم مع أرمنيوس على الدكة ، الشيخ آدم  
 من وقت ما علم بأن حسن هو ابن أستاذه الشيخ عامر  
 وتعاطف معه وانشغل به .

\_ أحنا حنسيب حسن لوحده كده قدامهم يامقدس ؟

\_ واحنا بإيدنا أيه ياشيخ آدم.؟

\_ أهى الكلمة دي اللى بتفرسنى ، كل ما أكلم حد  
يقولى وأنا بإيدى آيه أعمله ، خلونا حاطين جالوس  
طيبن فوق روسنا وساكتين .

\_ آيه اللى أقدر أعمله ياشيخ آدم ؟

\_ نروحوا نقابلوا جعفر ونخلوف يخلي اللزى يخف  
شويه عن البلد.

\_ وهو جعفر حيسمغ كلامنا، وبعدين اللزى

مش حيسينا ، إعمل معروف اسكت ، أخويه

منقريوس ساب البلد وهج ، وأنا قدامى كام شهر

ومش حيسيونى، ياشيخ آدم ماعدش حيلتى

غير البنتين وعاوز أجوزهم وأسترهم.

\_ لقد صدمتنى يامقدس ، عشمى فىك

كان أكبر من كده ،

\_ أنا أقدر أطاوعك ، وأروح معاك ولكن وبعدين ؟

\_ وبعدين دي سيبها للمولى هو اللى بيرتبها.

تدخل يشعه متداخلة في الحوار

\_ كلام الشيخ آدم صح يا با .

أرمنيوس معاتباً يشعه .

\_ أنت بتتصنتي علينا يايشعه.

\_ غصب عني يا با.

\_ قال الله في كتابه الحكيم ( واعتصموا بحبل الله

جميعاً ولا تفرقوا ) صدق الله والعظيم ، يشعه ماغلطتش

يامقدس وده وقت لازم نبقوا فيه يد واحده ، الطوفان جامد

حيغرقنا كُـلِنَا .

## 11\_ في الجبل .

بعد أن إستقر الحال بحسن ومعه الحمداني ومسعدة ومرسال وحمدان ، إستغل ما حوله من أحجار وأقام خيمة جعل من الأحجار مصاطب داخلية لها وإفترشها ببعض الحصير ، موقع المكان بعيد عن الأنظار واتخذة حسن مقر مؤقت ، في ظلمة الفجر ومع حفيف نسيمات فجر الصباح الجميع تمرّد على النوم ، مسعدة تبكي رحان ، الحمداني نائم وحسن وحمدان ومسعدة هم فقط من طار النوم من أعينهم .

حسن يخفف عن مسعدة .

\_ أنت الدموع مابتفارقش عنيك ياخاله ، هوني على نفسك شويه.

\_ عمك رحان مش حمل بهدله ياحسن يابني

\_ إطمني ياخاله ، مش حيهدا لي بال إلا لما أجيبه .

مرسال مُندفعاً في الحديث .

\_ يبقي نزلوا دلوقت يا حسن ونجبوه ، أنا مش  
 قادر أتحمل أكثر من كده ، مر علينا إسبوع ومنعرفش  
 حاله أيه ، عايش ولا ميت .؟

\_ عمي رحان عايش يامرسال ومش حيضروه  
 وماتقلقش ، هم مش محتاجينه هو ، الموضوع  
 عاوز ترتيب ، ولا عاوزنا نازل وإحنا حتى مانعرفش  
 مكانه.

حمدان

\_ معاك حق يا حسن واعذر مرسال ، أنا عايش اللي عايشه  
 وكلي قلق على اختي ليله.

حمدان موجهاً كلامه لمرسال

\_ مش أنت بس اللي حزين يامرسال ، كلنا حزاني  
 على عم رحان وعلى اختي وعلى العريس اللي  
 مات ومالحقش يتهنى بعروسته .

حسن

\_ إحنا محتاجين العقل دلوقتي ، ولازم ترتيب

واللزي لازم ياخذ ضربه توجهه .

حمدان

\_ تقصد أيه يا حسن .

\_ اللزي كل تفكيره أنه يصطادني وأنا رايح

أخلص عمي رحان ، مش كده ؟

مرسال

\_ أيوه وهو واخذ أبويه علشان كده .

\_ أنا حخليه يلف حوالين نفسه وبعد

ما أدوخه وهو بيلطش حخلص ليله وعمي رحان.

حسن لحمدان .

\_ تعالي يا حمدان عاوزك.

يخرج حسن لخارج الخيمة ويتبعه حمدان .

\_ قولي يا حمدان ، أيه اللي تعرفه عن اللزي؟

\_ هو الدراع اليمين لجعفر ، وتقدر تقول بيعمل

كل حاجه في العلن وفي السر ، مع جعفر وفي

السر ضده ، حتى السرقة ونقب البيوت بيخلي

رجالته يعملوا كل حاجة.

\_ بس كده .

\_ بيسرق من محصول جعفر ويخزنه ويبيعه لحسابه.

\_ والحاجات اللي بيسرقها بيخزنها فين ؟

\_ ليه جنينة في منطقة الكثره بعيده عن الأنظار وعن

البلد .

\_ هو ده اللي كنت محتاجه ، يبقى أول ضربة للزي

حتبقى في الجنينة .

## 12\_ الحوش

مهما كنت قوياً سوف يأتي من يحاول أن يُضعفك، للحن  
 درورب وشوارع موحشة .حتي ولو أشعلت شمعة لابد أن  
 تتعثر فالهم جثث ومطبات صعب اجتيازها، فإن خاصمتك الدنيا  
 فابتسم فهي ولدت من رحم الألم، رحان وسط وحشة  
 الرائحة ، بين مأمأة الخراف وخوار العجول وثُغاء الماعز يردد  
 داخله ما يحفظه من القرآن.يستند على حائط الحوش  
 يدخل اللزي وخلفه هارون يركله بقدمه.

\_ قوم فذ ياعبد .

رحان يستند للجدار وهو يقف .

\_أديني قُمت يالزي ،عاوز تموتني ، موتني وريحني.

\_ يعني السبع مجاش علشان يخلص عبده وتلاقيه

باعك.

\_وياريت مايجي ولا تفكر أني مستنيه يجي ويوقع

في إيديك.

\_ أنت لو كنت غالي عنده ماكنش سابقك ولاضحى بيك.

- \_ وأنا أفديه بروحي ومش مستني منه حاجه.
- \_ الظاهر إن الكلام معاك زي قِلتَه، ومحتاج تتأدب شويه .
- اللي يلتفت بعينه نحو هارون .
- \_ شايف المرابط ده ، اللي مربوطه فيه الجاموسة .
- \_ أيوه شايفه ياسبع.
- \_ شيل الوتد ، واربط الحبل في رجله مكان الوتد
- علشان هو يجر في الجاموسة والجاموسه تجر فيه؟
- هارون فك الحبل من الوتد وربطه في قدمي رحان
- وقام بتوثيق يديه .
- \_ كده كويس ياسبع .
- \_ والله المفروض تتربط معاه يابجم أنت.

.....

### 13\_ في الطريق

- كلما زادت طبيبتك وحسن نيتك كلما كانت جروحك أعمق  
 وألامك أعظم ، غالبا نكره التفكير في الحقيقة حتى نحافظ  
 على قصور الوهم التي نبنينا ، الشيخ آدم بصحبة المقدس  
 أرمنيوس في محاولة يائسة مع جعفر، والمقدس أرمنيوس  
 يجر معه الشيخ آدم ويسأل نفسه ، كيف نثق في جعفر  
 لنسأله حالنا ، هو يود أن يسأل الطيور لِمَ فارقت فضانا  
 ويود أن يسأل الهواء ، لِمَ تراه أعمانا .
- \_ على مهلك يامقدس ، ماتكنش فاكرنى مفتح.
- \_ معلش ياشيخ آدم ، أنا خطوتي كده .
- \_ وأنا خطوتي مش كده ، تقوم تُجر فيه.
- \_ علشان أخليك تلحق صلاة العصر.
- الشيخ آدم يبتسم
- \_ لا قول أنك رايح المشوار من غير نفس.
- \_ بصراحه أه.

\_ يعني أنا اللي نفسي مفتوحه لزيارة  
 هذا التيس المتمرد، أهو نبقوا عملنا اللي علينا.  
 \_ بتضحك عليه وعلى على نفسك ؟ أنت بتحاول  
 ترضي ضميرك وبس ، وأنت عارف اللي حيحصل.  
 \_ وهل هذا عيب يامقدس ، إنه أضعف الإيمان.

.....

صوتها يناديه قبل الحروف ، موجة العشق تلاحق رمال  
 قلبها ، أحلامها به عذراء، هو لها الداء والدواء، وما من  
 حبه شفاء ، هي تشتاق لهذا العسل بطعم المر ، هي  
 تتمنى أن يكون الحلم النائم على شفيتها ، ولا يوقظها  
 فجر الصباح .

في حديقة قصر جعفر ، تقف لواظظ بجوار شجرة الأكاسيا  
 والمعروفه لهم في الصعيد بشجرة السنط وهي المنتجة

للصمغ، هي تستظل دائماً بتلك الشجرة، هي صديقتها الوحيدة في المنزل ، تحدثها وتشكي لها همها .

\_ قلبي معاك يا حسن ، ياترى عامل أيه ؟ قادر تفكر

في لواحظ ولا المواجه واخداك بعيد عني ، خايفه عليك يا حسن ، كلي خوف عليك .

تسمع لواحظ صوت عند باب القصر وجدال ، يبدو أنها

عرفته ، هو صوت الشيخ آدم وهو المجادل الأكبر في البلدة

تسمع صوت الحارس يخبره أن أبيها نائم ، تتجه نحو الباب

\_ فيه أيه يامجاهد ؟

\_ الشيخ آدم والمقدس عاوزين يقابلوا جناب

الملتزم وقولتلهم نايم ومش عاوزين يمشوا.

\_ خليهم يدخلوا.

يدخل ارمنيوس وهو يقود الشيخ آدم .

\_ أهلا ياسيدنا ، إزيك يامقدس.

الشيخ آدم

\_ أهلاً وسهلاً بيك ياست لواحظ،

أرمنيوس

\_ عرفتُها لوحدك إنها الست لواحظ ياشيخ آدم.  
 \_ ومن لا يشم رائحة الورد يامقدس ، هي الوردة  
 الوحيدة في شوك تلك الدار.  
 لواحظ تضحك وتقودهم لحجرة المضيفة وتحاول أن  
 توقظ أبيها الذي مازال نائما وأذان العصر إقترب، وبعد  
 محاولات مُضنيه مع أبيها جعلته يوافق على مقابلة  
 الشيخ آدم والمقدس .

.....

الشيخ آدم يتحسس الكنية وماعليها من وسائل  
 يأخذ نفساً عميقاً.  
 \_ شايف يامقدس الدكك الحلوه، مش الدكك بتاعتنا  
 اللي الحصر هرت مؤخراتنا، ولا الضهر حاجة تفرح

مش خشب يكسر ضلوعنا.

أرمنيوس يهمس في أذنه.

\_ أسكت أحسن جعفر جاي .

\_ مايجي ، هو أنا بخاف .

يصل جعفر ويبدو عليه أنه مُستاء من رؤيتهما ، بترحيب بارد.

\_ أهلاً ياشيخ آدم ، إزيك يامقدس .

الشيخ ادم يشعر برعشة في جسد أرمنيوس

بجواره .ويهمس له .

\_ أيه يامقدس ، أنت حترعش من أولها.

أرمنيوس يهمس في أذنه.

\_ ياسيدي قولتك بلاش المقابلة دي

أنت مش شايف شكله عامل أيه.

جعفر

\_ خير ، أنتوا عاوزني في أيه ؟

الشيخ آدم هامسا للمقدس.

\_ أتكلم أنا ولا تتكلم أنت .

\_ لا إتكلم أنت ، أنت الكبير.

\_ أيوه لبسني العمه.

الشيخ آدم يتربع في جلسته ، يُهَندَمَ عمامته، يتنفس بعمق ، ينتظر أن تسعفه الكلمات ، نسمة من النسائم هربت والعرق يتصبب على وجهه ، أخرج منديله ومسح العرق .وبدا محاولة الحديث.

\_ أنت عارف يا جناب الملتزم أن العصر قرب وانت لسه قايم .

\_ وأنت مالك ، قايم العصر ولا المغرب ، قول عاوزني في أيه ؟

\_الشيخ آدم طبعا حقول عاوز أيه.  
يغمز أرمنيوس بكوعه .

\_ ماتتكلم يامقدس أنت سايبني ألك لوحدي.  
\_وأنا حتكلم أقول أيه ؟

يصحو فجأة الشيخ آدم من غفوته وخوفه.  
 \_ ماهو اللي بيحصل في البلد مايرضيش  
 حد .

\_ أيه اللي مايرضيش حد ؟  
 \_ اللي بيعمله اللزي ، حرق دار الحمداني  
 وقتل سديري وخطف ليله .  
 \_واللزي عمل كده ليه ؟ مش علشان الحمداني  
 مارضيش يجوزه بنته ،  
 \_وهو الجواز بالعافيه.  
 \_ وهو اللزي فيه حاجه تتعيب؟  
 \_ يعني أنت عاجبك عمايله.  
 \_ من حقه يعمل أكثر من كده ، مين الحمداني  
 علشان مايرضاش بيه ؟

\_ تصدق أنا غلطان اللي جيت ، جيت أدور  
 على شويه رحمه عندك ، الظاهر الرحمه  
 إستخسرت تعرفك .ومالوش لازمه الكلام

معاك وأهل البلد ليهم رب كبير أكبر مني ومنك  
قوم بينا يامقدس الكلام منوش فايده.  
\_ ياريت تخليك في حالك وبس ياشيخ آدم  
تصلي بالناس وتشوفلك خاتمه تعملها وبس.  
يقف الشيخ آدم وقبل أن يهم بالخروج  
\_ أيوه ، وأمشي جنب الحيط وأحط مراكيب  
البلد كلها في بقي علشان ترتاح ياملتزم .

## 14\_ دار اللزي

هي زهرة المدائن تُبعثر أنفاسها على أسوار متهالكة  
 لم يُعد لها كتاب تُسطر فصوله، وقعت فريسة في خيوط  
 الأيام المتشابكة والامتداخلة في دوائر صغيرة ، كانت تعيد  
 تقسيم أيام الأسبوع ، فنفرت منها ، هاجرت بعيداً، كل أيامها  
 أصبحت وجع .تتربص بها تلك الحية الرقضاء ، تتلوى حولها  
 كل حينٍ وحينٍ وثُبت لها سمها .  
 منيرة تنظر لليله بإحتقار.

\_ اللي زيك المفروض يدفنها بالحيا يا عشيقة  
 الرجاله ، قتلتني واحد وبتعذبي واحد.  
 \_إعملي معروف سبيني في حالي يامنيره.  
 \_ وليك كمان نِفس تتكلمي ،هاتي جالوس  
 طين وطيني راسك بيه يافاجره.  
 \_سُقت عليك النبي تبعدي عنى، سبيني

في حالي ، أنت طول اليوم موراكيش غيري.

\_ أيوه إتمسكنى وأنت عامله زي العقربه.

\_ مش عارفه أنا عملتك أيه ؟ علشان عملي

فيه كده .

\_ عملي أيه ؟ مش حاسه بنفسك، قتلتني

سد

ثم تتدارك نفسها منيره محاوله إبعاد حقدھا وغيظھا

منھا على تفضيل سديري لها ورفضه حبھا.

مستدركة

\_ رفضتي أخويا اللزي ، سبع الحاجر .

يدخل اللزي الذي إندهش من وجود منيره في غرفة

ليله وكان قد حذرھا من الإحتكاك بها ، فقد رأھا سابقا

تحاول خنقھا ومرة أخرى تضربھا بزباطة الكنس سُبَّاط

البلح .

\_ أنا مش قولتك بلاش تدخلني هنا؟

هي تتلون كالحرباء ، تجاول أن تبرر وجودها  
لأخيها اللزي .

\_ أنا كنت جايه علشان أشوفها يمكن عاوزه حاجه.

\_ مالكيش دعوه بيها خالص ومحدثش يدخل عليها

غير حلیمه بنت الطواب ، ياللا غوري إطلعي من هنا.

منيرة وهي في حالة غيظ من أخيها وبرود.

\_ أنا غايره يالزي ، وربنا يشفيك قلبك اللي تابعك.

اللزي بغضب

\_ بتقولي أيه ؟

\_ مابقولش حاجه واصل.

تخرج منيرة ويقترب اللزي من ليله .

\_ هي قالتك حاجه تزعلك .

\_ لا مقالتش حاجه .

\_ طيب أنت عاوزه حاجه .

\_ مش عاوزه حاجه وسينني في حالي يالزي

مش بطيق أشوفك.

\_ ماشي ياليه .

يخرج اللزي من حجرة ليله وهو في حالة غليان ، هو لم يعاملها بعنف منذ أن خطفها ويحاول أن يسترضيها وهي تصده ، ووفر لها في حجرتها كل شئ ، وهي لا تشعر به وتردد اسم حبيبها سديري .

جلس اللزي في حجرة مضيفته.

\_ أيه يالزي ؟ ، بقى مرّه تعمل فيك كُدّه ، تلخبط حياتك ، الناس شايفاك راجل سبع ، الكل بيعملك ألف حساب وأنت جواك راجل عاجز ومكسور ، ومِنْ مِينُ ؟ حُرْمه تبهدلك كده .

## 15\_ في طريق زراعي ضيق

الوقت منتصف الليل، طريق ضيق وموحش ، نغمات  
شاذة تتناثر هنا وهناك بين نقيق الضفادع ونباح الكلام  
ويختم النغمة عواء الذئاب ، حسن ومرسال وحمدان  
يسيران في الطريق المؤدي إلى الكثرة ، حسن لم ينسى  
هذا الطريق ولا وحشة هذا المكان فقد سبق أن مر بنفس  
المكان بصحبة رحان ومسعده ومرسال بعد نزولهم من  
مركب منقريوس .

حمدان

\_ إحنا قربنا من الجنينة.

\_ أيوه ، أنا مشيت في الطريق ده وأنا جاي بلدكم.

وعارف كمان الجنينة ، فيها صوت كلاب كثيرة.

\_ فيها غفير واحد والباقي من جوه كلاب .

\_ فتحوا عنكم معاه ، بعد ما تقرب من الغفير،

أنا ومرسال حنروح من شماله وأنت حتيجي من يمينه

وحتكلم أنا ومرسال بصوت يسمعه.

مرسال ساخراً

\_ ناقص تقوله جايين نسرقوا البهايم .

\_ أيوه حنقول كده ، ركز ياغبى ، أنا عاوزه يسمعنا  
يسمع إننا جايين ناخدوا البهايم ونحرك القمح اللي  
مشونه .

حمدان

\_ أنت عاوز تعرفه إنك أنت اللي عملت كده.

\_ أيوه ياغيط وبعد ما يسمع الكلام

ينظر لحمدان

\_ حتىجي أنت من وراه وتضربه وتضربه ضربه

مش جامده ياحمدان .

\_ أنت عاوزني أحسس عليه .

\_ لا أنا عاوز يكون فيه حيل يجري ويهرب ويروح

يبلغ اللزي .

مرسال ضاحكاً

\_ ويجي اللزي يلحقنا ويمسكنا .

.....

أمام الباب الخشبي الصغير المؤدي إلى داخل الجنية  
يجلس الغفير ممسكاً بعلبه صفيح مليئة بالتبغ يقوم  
بلف سجارة ويبلها بطرف لسانه ويشعلها ، تاريخ الإنسان  
مع التبغ قديم فتاريخه يرجع لـ 5000 سنة قبل الميلاد  
حيث وُجد في العديد من الثقافات المختلفة حول العالم. وقد لازم التدخين  
قديمًا الاحتفالات الدينية؛ مثل تقديم القرابين للآلهة، طقوس التطهير، أو  
لتمكين الشامان والكهنة من تغيير عقولهم لأغراض التكهن والتنوير  
الروحي. جاء الاستكشاف والغزو الأوروبي للأمريكتين، لينتشر تدخين التبغ  
في كل أنحاء العالم انتشاراً سريعاً. وفي مناطق مثل الهند وجنوب الصحراء  
الكبرى بأفريقيا، اندمج تدخين التبغ مع عمليات التدخين الشائعة في هذه  
الدول والتي يعد الحشيش أكثرها شيوعاً. أما في أوروبا فقد قدم التدخين  
نشاطاً اجتماعياً جديداً وشكلاً من أشكال تعاطي المخدرات لم يكن معروفاً

. من قبل

اختلفت طرق فهم التدخين عبر الزمن وتباينت من مكان لآخر، من حيث كونه مقدسا أم فاحشا، راقيا أم مبتذلا، دواء عاما -ترياقا- أم خطرا على الصحة. ففي الآونة الأخيرة وبشكل أساسي في دول الغرب الصناعية، برز التدخين باعتباره ممارسة سلبية بشكل حاسم. في الوقت الحاضر، أثبتت الدراسات الطبية أن التدخين يعد من العوامل الرئيسية المسببة للعديد من الأمراض مثل: سرطان الرئة، النوبات القلبية، هي عادة ترويحوية نفسه لازلنا نتفق ونختلف عليها .

حسن ومرسال يقتربان من يسار الرجل ، يتجاهلانه وكأنهم لا يرونه يأتون من يساره ، يسمع الحارس دبيب أقدامهم ويقف مقترباً منهم بهدوء واقفاً على أطراف قدميه محاولاً كشفهم.

\_ إحنا ناخذوا البهايم ، وبعد كده نولعوا في القمح ، ونحرق قلب اللزي .

الحارس يرفع عصاه ويقترب منهم أكثر، فقد علم أن الجنينه مقصوده مرسال

\_ وحنودي البهايم فين ياحسن ؟

\_ حنبيعهم في سوق التلات .

الحارس يقترب أكثر

\_ ماتيجي ناخذوا القمح ، أحسن مانحرقوه .

\_ حنشيله إزاي ، مش حينفع ، خلينا في البهايم .

\_ والغفير اللي هنا ؟

\_ نقتلوه ونخلصوا عليه .

في تلك اللحظة يهجم عليهم الغفير بعصاته ولكن لم يتمكن

من ضرب حسن ومرسال ولاحقه حمدان من خلفه بضربة على رأسه، حسن

يأخذ منه العصا ويضربه في جنبه ، يقع الغفير على الأرض ثم يحاول

الوقوف حتى يمكنه الوقوف ، يستجمع قواه ويجري هرباً.

لم يبق أمام حسن سوى الكلاب التي كانت تنبح خلف باب الجنيينة ولم يُكن

يحتاج أكثر من فتح الباب لخروج الكلاب والدخول بسرعه هو وحمدان

ومرسال داخل الجنيينة وغلق الباب وترك الكلاب خارج الجنيينة ، تفرقت

الكلاب وهي تنبح خارج الجنيينة ، إستطاع حسن الوصول إلى حظيرة البهائم

\_ حمدان أنت ومرسال حلوا البهائم من مرابطها وأنا حفتح لهم فتحة في

السور.

\_ إحنا مش حناخدها نبيعها .

\_ دي بهائم صحيح مسروقة ، ولكن إحنا مش حناخد منها حاجه ..

هم سرقوها والله أعلم بأصحابها ، ويمكن فيهم اللي بهيمته راس ماله

، إحنا حنطلقها وتبقى حظ اللي يستحقها .

\_ وأنا موافق على كلامك يا حسن ، إحنا بنكشف

اللزى ونوجعوه زي ماوجعنا.

حسن لم يلقى صعوبة في فتح مكان في السور ، هو سور هش من

من الطوب اللبن ، وقاموا بإطلاق صراح كل البهائم خارج السور  
فتفرقت البهائم داخل الأراضي الزراعية . وصلوا لمكان تشوين القمح  
قام بإحراقه ، وكانت المفاجأة أنه عثر على إسطليل للخيول ، ابتسم حسن  
\_ دي حناخدها من اللزي وكل واحد حياخد حصان ، وربنا يسامحنا.  
\_ ده حقنا ياحسن ومايجيش تعويض للي عمله فينا اللزي وحررق بيتنا  
بالبهائم اللي فيه.

\_ يمكن يكون معاك حق ياحمدان ، أنا أخاف أفتي فيها .  
إمتطي الثلاثة ثلاثة أحصنة وانطلقوا بهم عبر ذلك الطريق الضيق

.....

لا زلنا نبحث عن هوية ، عن سكن ، عن ثوب لا عن كفن ،  
في الأوطان هناك من يرضعون من ثديها ويورثون الرضاعة ،  
وهناك الحرافيش سقطوا من الأرحام مفطومين .  
فتوح غفير الجنينة ، لايزال يجري لاهتاً ، يبدو عليه الإعياء  
لكنه ظل يقاوم ، حتى وصل دار اللزي ، وما إن وصل لعتبة  
الدار سقط على الأرض وهو يتكلم بصعوبة .  
\_ اللزي فين ، هاتولي اللزي .

طلب وبكر إنزعجا من حالة فتوح .

\_ فيه أيه ياواد يافتوح ؟

فتوح وهو يللمم أنفاسه

\_ مش قادر اتكلم ، هاتولي اللزي .

\_ ادخل ياطلب صحي اللزي ، لما نشوف آخرتها ،

يدخل طلب ويمشي في الممر حتى يصل باب بيت اللزي

يطرق الباب بعنف ، يقوم اللزي مفزوعاً ويجري نحو الباب

وخلفه منيره ، يفتح الباب ويخبره طلب بما حدث ، يهرول مسرعاً

إلى الباب ، نسى ان يرتدي جلبابه على جسده وخرج بملابسه الداخلية

سروال كبير يعلوه قميص من القطن ، يصل لمدخل الدار ، فتوح مُلقى

على الأرض.

\_ فيه أيه يافقر البين ( وجه الغراب ) أنت..؟

\_ رجاله هجموا عليه ياسبع جاين يسرقوا البهايم ، ويحرقوا القمح

اللي في الشونه .

اللزي في قمة غروره وغضبه .

\_ رجاله ، رجالة مين ياواد، ومين يستجري يعمل كده .

فتوح محاولاً إستجماع قواه وتنظيم أنفاسه .

\_ أنا سمعتهم وهما بيتكلموا ، فيهم واحد إسمه حسن .

اللزّي والشّرر يتطاير من وجهه .

\_ بتقول إسمه أيه ؟

\_ إسمه حسن ياسبع ومعاهم واحد شبه حمدان بن الحمداني

معرفش إن كان هو ولا لا .

اللزّي يُعْض على كف يده من الغيظ .

\_ هي حصلت كده ؟ انت يابكر روح صحي هريدي

وباقى الرجاله واسبقوني عند نخل نخل مُصبح حيجيلكم

هناك .

\_ مش حنجيب هارون معانا .

\_ لا ومحدث يجيب له سيره باللي حصل.

.....

يصل حسن بصحبة مرسال وحمدان إلى منطقة الشيخ عبدالحميد هو مقام مبني بالطوب اللبني ، يذهب أهل البلده بالتبرك به ويذبحون عنده الأضاحي ويهبونه أقمشه للضريح ، إن سألتهم مَنْ هو الشيخ عبدالحميد وماهي سيرته ، لن تجد لديهم جواب شافي ، طلب حسن

البقاء بجوار الخيول وسوف يُكمل هم وجمدان حتى دار اللزي  
لتحرير رحان .

في مواسم الحصاد، أنا المحصول، هم الجراد،  
أنا المحمول على نعش الحيرة، أنا المقتول .  
أنا المسجون في الألم، أنا الناي بصوت عدم .

...وصل حسن بصحبة حمدان لدار اللزي ، هو

يدرك أن اللزي سوف ينشغل بالجنيئة ويخرج بكل

رجاله ، ولقد صدق حسن في حدسه فلم يكن عند

الدار سوي حارسين، تسلل حسن إلى أقرب نقطة في

السور ، صعد على كتف حمدان وتسلق السور وقام بسحب

حمدان لأعلى ، حسن يدرك من خلال عشرته القليلة بأهل

البلده أن أضعف نقطة في البيت تكون في خلفيته ففي

الغالب لا تكون مسقوفة ، حتى زريبة البهائم سقفها

ضعيف ، هم يهتمون بواجهة المنزل ، وفي مدخله تكون

مضيئة وأمامها حجرة ملتصق بها من الداخل حجرة أو اثنين

تسلق حسن الحائط في أضعف نقطة وهو أعلى من السور

المحيط بالبيت ، هو جدار حائط عادي، قفز حسن إلى

الداخل ، ولم يكن الحظ أنيقاً معه فقد قفز في عشة تربية

الدجاج والبط والأوز وتاه بين بطبطة البط والأوز ونقنقة الدجاج  
 ...تسمع منيره صوت الطيور فتفزع فتقترب من العشه،  
 حسن كان قد خرج من العشة وتوارى خلف صومعة كبيرة  
 منيرة خَشِيَتْ أن يكون ثعلباً جاء يفتك بالطيور، فتحت العشة  
 ونظرت إليها ، كان الصوت قد هدأ، إطمأنت وعادت إلى حجرة  
 المضيفة منتظرة عودة اللزي ، حسن اتجه نحو أول غرفة  
 مغلقة ونادي بصوت واطي.

\_ عم رحان ، عم رحان ؟

لم يجد إجابته ، كرر هذا مرة أخرى في حجرة أخرى ولم يجد  
 إجابة ومن سوء حظ ليله ، لم يذهب لحجرتها واتجه نحو  
 الحوش . كرر النداء.

\_ عم رحان ، عم رحان .

كانت فرحة رحان طاغية بسماعه صوت حسن.

\_ أنا هنا يا حسن ياإبني.

منيرة سمعت بعض الهمس ولكن لم تستوعب الأمر  
 إتجهت نحو منتصف الدار وهي في حيرة .

\_ آيه يابت يامنيره ، أنت إتخوتي ولا آيه.

يصل لها صوت رحان .

\_ أنا هنا يا حسن .

يرى حسن منيرة وهي تقترب من الحوش ، تفتح  
 باب الحوش وتدخل ، يتسلل حسن خلفها، تتجه  
 ناحية رحان وحسن يتوارى خلف البهائم ، منيرة لرحان.  
 \_ أنت لسه ماتخدمتش ياراجل أنت ، ولا تكنش مستنى  
 حسن .

رحان أدرك أنها سمعته وهو يجيب حسن ، فأراد  
 أن يبدد ظنها .

\_ معلش يابنتي ، أصلي حلمت بحسن ، وقمت مفزوع  
 عمال أنادي عليه .

\_ طيب إتنيل وإتخدم واحلم بحاجه كويسه.  
 \_ حاضر حتخدم يابنتي.

تخرج لواظ ، حسن يغلق باب الحوش ، يتقدم نحو  
 رحان .

\_ أنا السبب في اللي حصلك ده ياعمي  
 سامحنى.

\_ نسيب يابني وماحدثش بياخد أكثر من نصيبه .  
 \_ قوم معاه ياعمي ، مفيش وقت.

حسن يرفع رحان إلى أعلى ، يمسك رحان بأعلى الجدار  
يصعد الجدار ، حسن يستند على مكان حلف البهايم

يسمونه مخول ، بينما هو يتسلق الحائط ، منيرة تتجه مرة

أخرى نحو الحوش ، تجد حسن ورحان أعلى الحائط ، تصرخ

منيرة بأعلى صوتها إلحقوني، حمدان يلتقط رحان ، خرجت

منيرة لخارج الدار تستنجد بالحارسين ، وبينما يتلقف حمدان

حسن ظهر حارسي اللزي وهجما على حسن وحمدان، بعد

تشابك بالأيدي تمكن حسن وحمدان من ضرب الحارسين

واتجهوا ثلاثتهم ناحية الشيخ عبدالحميد ، حيث ينتظرهم

مرسال بالأحصنة.

منيرة وجدت الحارسين ملقيين على الأرض يندبون

حظهم ، منيرة ساخرة.

\_ انتوا رجاله انتوا ، بس لما يجي أخويه .

بعد قليل من الوقت وصل اللزي وخلفه رجاله وهم يجرون

ذيول خيبتهم واللزي في حالة غضب عارمه ، لم يفيق

من ضربة الجنينة ووجد اخته منيرة تجري نحوه .

\_ إلحقني ياخويا.

\_ فيه أيه تاني يامنيرة ، مش كفايه اللي أنا فيه.

\_ حسن ياخويا.

\_ حسن ثاني هنا .  
 \_ أيوه ياخويا، دخل دارك وأخذ الراجل اللي أنت  
 حابسه في الحوش وهرب بيه وضرب رجالتك  
 الخايبين دول ( تشير على الحارسين )  
 اللزي يجز على أسنانه في غيظ ويعض كف يده  
 ويكاد أن ينفجر في صراخ ولكن حاول أن يللم  
 شتاته .

\_ بقى كده ياحسن ، عرفت تلعب مع اللزي ياواد  
 شغلتنني بالجنية علشان تيجي هنا وتهرب عبدك  
 وراك والزمن طويل ياحسن .

.....

صعب أن تكون الأوطان نار تجري تحت أقدام الشعوب  
 والأصعب أن تختنق بدخانها ، وصل حسن إلى خيمته  
 في الجبل وهو يحمل على كتفه رحان ودخل به الخيمة  
 وخلفه حمدان ومرسال ، مسعده تتجه نحو زوجها باكية  
 حسن يضعه على الأرض ومسعده تصرخ .

\_ رحان ، رحان .

\_ إرتاح ياعمي .

\_ أنا حرتاح على طول ياحسن ، كويس

أني شوفتكم قبل ماأموت .

الحمداني كان قد نام واستيقظ على الصوت

\_ أيه يارحان ، حمدالله بسلامتك.

\_ أهلاً ياحمداني ، خلي بالك من حسن

ياحمداني . ينظر إلى حسن

\_ وأنت ياحسن خالتك مسعدة ومرسال أمانة في رقبتك.

\_ حتبقى كويس ياعمي ، ماتقولش كده .

\_ الظاهر إن رحلتي معاك خلصت ، خلي بالك

على نفسك ياحسن .

يلفظ رحان أنفاسه الأخيرة وكان موته صدمة كبيرة لحسن

ومسعدة ومرسال .

## 16\_ حجرة حبس ليله .

صرخات لآهات متبعثرة بين النهار والليل ، حطام يعانق  
 ذكريات لحبيب لن يعود، قلب ليلة لا يتحمل عقلها الذي  
 لا يكف عن الهوس ، فاض الأمر بالقلب متوسلاً للعقل  
 لا تفسر لي الرؤيا وإحملني على جناح الصبر ولا تشقيني  
 بوجعي . ليله تجلس مع حليمه وكعادتها ، جزينة ، شاردة  
 \_ ما هو ماينفعش اللي بتعمليه في نفسك ياليله .  
 \_ ياريت أموت وارتاح يا حليمه ، فيه أيه  
 فاضلي تاني من الدنيا.  
 \_ فيه أخوكي وأبوكي.  
 \_ وهم فين يا حليمه.  
 \_ أنت عاوزه تفهميني إنك مش عارفه حاجه.  
 \_ حاجة أيه بس اللي أعرفها.  
 \_ متعرفيش أن أخوكي وأبوكي عايشين.  
 ليله بفرحه عارمة ؟  
 \_ أبويه وأخويه عايشين؟  
 \_ أيه متعرفيش؟

- \_ لا ما أعرفش وأعرف منين ؟
- \_ حسن وحمدان كانوا هنا عشيه .
- \_ هنا ؟ هنا فين ؟
- \_ حسن نط هنا ودخل البيت وأخذ الراجل  
اللي كان محبوس .
- \_ خلصوا عم رحان.
- \_ وتلاقيهم كانوا حيخلصوك بس العقربة  
منيرة حست بيهم وضربوا الرجاله وهربوا.
- \_ ليله ، اللي قولته ليك بيني وبينك  
أوعي يعرف حاجه اللزي .
- \_ ماتقلقيش يا حليمه.
- \_ فوقي ياليله ، ماتشمتيش منيره فيك.
- \_ معاك حق يا حليمه ، لازم أفوق ،  
تحدث نفسها
- \_ أفوق علشان أخذ بتاري من اللي حرق بيتنا  
وطرد أخويه وابويه من البلد وقتل حبيبي.

## 17\_ مضيعة جعفر.

أحياناً نحتاج لدعاء من نوع خاص نقول، يارب إكفنا شر جرأة العبط وجرأة الجهل وجرأة الحماقة وجرأة الإستحمار ولاتحملنا عبث الفجار، في زمن المهالك، تستعصي الدموع وتبخل علينا بالسقوط ، هي بلدة باتت تُخفي ثوبها النظيف وأمست تنشر ثوبها القذر ، الأشرار يجتمعون في مطبخ إبليس ، جعفر واللزي وهارون في المضيعة بعد أن وصل إلى سمعه ماحدث مع اللزي .

جعفر ساخراً وهو يستفز اللزي .

\_ والله الواد حسن ده محصلش ، يدخل دار اللزي سبع الحاجر ويخلص قريبه ويضرب كمان الرجاله ويمشي .

\_ ياريت كنت في الدار وقتها ، كنت قطعته تحت ورميته للكلاب .

جعفر يتخابث عليه .

\_ وأنت كنت فين وقتها ؟

اللزي يتلعثم ويتردد في الرد.

\_ كنت بتمشى على الجسر أنا والرجاله.

جعفر بمكر

\_ واتمشيت لحد ماوصلت الجنيهه ، مش كده؟  
اللي ينظر بعتاب لهارون  
هارون

\_ أنا ماليش دعوه ، ماتبُصليش.  
جعفر

\_ أنت تفتكر هو اللي قلبي ، وافرض هو اللي  
قال ، ماهو لازم يقول .  
اللي أدرك أن هارون يتجسس عليه من أحد  
رجاله.

\_ وقلك أيه بقى؟

\_ قلبي حكاية البهايم اللي بتتسرق وبتخبئها  
في جنيتي ، والقمح اللي اتاخذ واتشون فيها  
من ورايا .

اللي يشعر بالخجل ويمسح العرق الذي تصب  
على وجهه بأكمام جلبابه ، يحاول أن يببر موقفه  
ويخرج من هذا الموقف الذي وضعه هارون فيه  
لتزداد مكانته لدى جعفر على حسابه .

\_ أنا كنت حقولك كل حاجه وأطلعك نصيبك.

\_ طيب تطلع نصيبي من البهايم ماشي، ولكن

حتطلعلي نصيبي من قمحي.  
 هارون محاولاً تلطيف الأجواء بمكر.  
 \_ خلاص يا جناب الملتزم.  
 \_ استنى أنت يهارون ؟  
 يلتفت نحو اللزي .  
 \_ شوف يالزي ، أنا اللي عملتك وأقدر  
 أقلعك ، والظاهر إنك فرحت بنفسك شوية.  
 وصدقت أنك سبع الحاجر ، اللي حته عيل  
 خلاه يلف حوالين نفسه، وساييك طايح  
 يمين وشمال والآخر جزائي تغدر بيه؟  
 اللزي يحاول أن يداري خجله وضعفه الذي  
 أوقعته فيه الظروف بفعل حسن .  
 \_ معاك حق ، أنا غلطان ، أنا طمعت في القمح  
 اللي بتفرقه ببلاش على أهل البلد.  
 جعفر لا يهتم به ويلتفت ناحية هارون .  
 \_ من دلوقت أنت المسؤول عن الأرض والجنينه  
 والطاحونه ،  
 يلتفت نحو اللزي  
 \_ أنت مش حتعمل حاجه غير بمشورتني

واللي حطبه منك وبس.  
اللى وهو خافض الرأس  
\_ ماشي ياكبير ، اللي تشوفه.

## 18\_ لقاء في حضن القمر

لواحظ تتصل بالأمل وطال الإنتظار ، تحيا في عدم ومالها  
من خيار ، وكلما حاولت أن تُخفي عشقها ، باحت به الأسرار  
هي تتمنى أن تجرح الإنتظار ، وتطوي كل مسافات الأيام  
فهو بالنسبة لها نقطة البداية وخط النهاية ، هي تؤمن أن  
من إعتاد فتح أبواب الأمل لا تشغله النوافذ المغلقة .  
لواحظ مُستلقية على فراشها ، عيناها توقفت على سقف  
الحجرة ، شاردة في عالمها البعيد .  
\_ وبعدين يابت يالواحظ ، حتفضلي كده لميته.  
حتفضلي تحلمي وبعدين تقومي على كابوس يُخنقك  
ويطلع روحك ، ولا ياربي حلمي حيقى حلم دايم أعيش  
فيه .

.....

..هناك على الخط الآخر ، الله يُعمر الليل بالقمر والنجوم  
حسن بمفرده خارج الخيمة يجلس على أحد الأحجار  
الكبيرة ينصت للسكوت ، يتسلل إليه القمر ويداعب وجهه  
الحزين ، هو يتشارك مع القمر في الجانب المظلم المتواري

خلف المجهول ، يفكر في لواحق ، من على أعلى جبل  
العشق يُبعثر لها آهاته ربما تصلها عبر ضوء القمر.  
تطير أمانيه وتتبعثر في السماء لعلها تُجيبُ ، هي فاكهة  
الأماني التي تُطعم قلبه ، مائدة سقطت من شقوق السماء  
لتُغذي قلبه وروحه ، يقول لنفسه أنها أروع النساء ، سيدة  
نساء الأرض ، هي خلقت من نور وهُنْ خلقت من طين .  
يُحاول أن يتحسس الشوق فيتذكر أن الحنين أعمى يذكرها .  
ولا يراها ،

يخرج حمدان من الخيمة ويقطع على حسن وحدته.  
\_ أيه يا حسن ؟ مالك ؟

\_ تعبان يا حمدان ، حاسس إنني عجزت بدري والعمر  
بيجري بيه ومش قادر ألاحقه.

\_ الهم كبير وتقبل يا حسن ، اللي إحنا فيه مش شويه.  
عايشين عيشة المطايرد ، معزولين عن الدنيا كلها.  
\_ أنا زعلان إنني مقدرتش أخلص ليله، وزعلان على  
موت عمي رحان ، إتحمل كتير بسببي.

\_ أنت عملت اللي عليك وده نصيب ، وليله أنا  
قلبي بيتقطع عليها ، وحاسس بالعذاب اللي هي  
فيه ، تعرف لو أسيب نفسي لجناني ، أقول أنزل

- أخلصها واللي يحصل يحصل .
- \_ اللزي حيعمل حسابه كويس قوي، بعد اللي حصل.  
 نُصبر شوية وإن شاء الله نلاقى طريقه نخلصها بيها.  
 مكتوب علينا الوجع ياحمدان.
- \_ قولي ياحسن ، أنت لسه بتفكر في لواحظ؟
- \_ غصب عني ياحمدان ، لواحظ بالنسبه لي طاقة  
 نور في أيام مكسوه بالسواد، ومع كل المواجه اللي  
 إحنا فيها وقلبي قايد نار من جوه.
- \_ مصيبتك كبيره ياحسن ، وقلبك مالقاش غير  
 بنت جعفر يعشقها ، وجع مالوش حل ياحسن .
- \_ عارف ياحمدان إنه وجع دايم مالوش دوا.

.....

لواحظ قامت من فراشها وفتحت النافذة ، وراحت تنظر  
 للقمر والنجوم، فالحنين وجع عشوائي لا يطرق باب  
 القلب ولا يستأذن في الدخول ، هو يحمل مفاتيح لكل  
 أجساد البشر، هي أمست بنت القمر ، لاتفارقه.

سهل أن تخسر في الحياة ، لكن الصعب أن تخسر  
قلبك ، هي تحتاج أن تتكلم ، أن تصرخ ، ولكن لا تجد  
من يسمع ، شوقها يحاربها ولايستريح. تَشكي للقمر  
\_ كل المواجه وليها دوا ، إلا وجع القلب .  
تُحدث نفسها .

\_ قلبك خلاص ، مابقاش قلبك يالواحظ ، بقى قلب  
حسن ، خرج عن طوعك ، وبيدق جواك علشان  
يعذب فيك .

## 19\_ صك الغفران

داخل دار اللزي ، أدمن اللزي المسير نحو غرفة ليله .  
 تتسابق خطوات اللهفة ، تتعثر أمانيه في الصفوف الخلفية  
 يتمنى لو يشتري من ليله صك الغفران ، هو يصلي في  
 محراب الحب بغير وضوء ، هو يحاول أن يتحسس الظل .  
 ..منيرة تراقب اللزي وهو يتجه نحو غرفة ليله ، تمصمص  
 شفاهها .

\_ خسارتك يالزي ، بقى بت زي دي تشحتف حالك كده .

.....

اللزي يدخل غرفة ليله فيجدها جالسة ، تسند خديها على  
 يديها ، وجه شاحب يحمل دموع جفت مياهاها ، ليس هي  
 ليلة مشرقة الوجه ، ساحرة الملامح ، اللزي يقترب منها  
 وهي تضع يدها أسفل خدها ، لا تلتفت إليه .

\_ إزيك ياليله ، عامله أيه ؟

\_ الحمد لله على كل حال .

- \_ مش طيقه تبصي لخلقتي ، مش كده .
- \_ حتى لو مش طايقه ، أنا واحده مكسوره  
مش بايدها حاجه تعملها .
- \_ ماتقسيش عليه كده ، وأنا أقدر أصلح كل حاجه .
- \_ تصلح أيه ؟ تقدر ترجع اللي قتلته .  
اللي بغضب
- \_ ماتجيبش سيرته قدامي ، أنا لو قدامي  
حقتله مية مره .
- يحاول أن يللم شتات غضبه . يقترب منها أكثر .
- \_ إن كان على الدار أبني لأبوكي أجدع منها  
وأنسى كل حاجه وأرجع أبوكي وأخواكي  
البلد ، أخوكي اللي حرق القمح بتاعي وسرق  
البهايم مع حسن .
- \_ مانت حرقت كل حاجه ، صعبان عليك شوية  
قمح وكام بهيمه .
- \_ خلاص أنا حنسى كل اللي عمله .

\_ومين اللي يسنى أنت ولا هما.

\_مش مهم دلوقت مين عمل ومين ماعملش

إحنا ولاد النهارده ، أنت وافقي على الجواز

وكل حاجة حتكون عال العال.

... ليله تفكر في كلامه وتحدث نفسها.

كلام معقول ، ومافيهاش حاجة لوجاريتها

علشان أبويه وأخويه وكمان حسن اللي

اتبهدل علشاننا، تنتهي من تفكيرها .

\_ وحسن ؟

\_ ده مالكيش دعوة بيه ، هو مش من بقية أهلك.

\_ طيب سيبنى أفكر .

\_ فكري براحتك ، أنا رايدك ياليله.

## 20- \_المغيب

الشمس تجر أذيالها هاربة ، تتحامي في الشفق  
 تنسحب أمام قوة الليل ، كلاهما في مطاردة يومية  
 للآخر كلاهما يزيح الآخر ويجلس مكانه ، لواظ بصحبة  
 حليلة كالعادة عند الشجرة .

\_والله أنا مش عارفه ألاقها منك ولا من ليله  
 أنتوا كرهتوني في عيشتي .

\_ ليه بس يا حليمه .

\_أقعد مع ليله ، بكا وهم ونكد،أجي عندك

ألاقي هم ونكد ، عاوزه حد فيكم يضحك مرة.

\_ وفيه أيه ممكن يضحك يا حليمه ، اللي بيضحك

المبسوط ، والخالي من الهم ، يابخته.

حليمه ساخره .

\_ وأنا نصيبي جاي مع بتوع الهم ، طيب ليله

همها جوزها اللي راح وأبوها وأخوها . أنت

بقي ، همك أيه ؟

\_ همي كله حسن .

\_ يادي حسن اللي جنن البلد كلها

جنن أهل البلد باللي عمله في اللزي

وجنن اللزي وجنن أبوكي .

\_ أنا جناني غيرهم ياحليمة .

أنا جناني عشق ، نفسي أشوفه

كان جناني مرتين ، مرة أسمع صوته

من غير ماأشوفه ومرة أشوف عنيه

نفسى أشوفه كله بحاله قدام عيني.

\_ أنت حتموتي قبل ماتشوفيه ، انت

بتحلمي حلم صعب ياست لواحظ.

\_ عارفه ياحليمه ، إن حلمي المستحيل

بعينه .

## 21\_ دار الشيخ آدم

علي أعتاب الزمن غفونا .إفترشنا وسائد الأحلام .سكت  
الكلام، نُفُش بين ثنايا الضحكات عن السعادة ، تأخذنا  
الأحاسيس بعيداً نبحث عن الأحلام الضالة ، .  
يجلس الشيخ آدم على الدكة في فسحة الدار  
بجواره شحاته وزوجته عزيزه .

\_ العيد الكبير قرب يابا ، حتجيلي الجلابيه  
الجديده امتى.

\_أنا وصيت سعد الخياط يجبلي حته عَبْكَ  
من سوق التلات ، حاخذ منها مترين وأنت  
خُد الباقي ،

\_ هو مفيش غير العَبْكَ يابا.

\_ وماله العبك ، كل البلد لابساه ، مائكنش

عاوز حرير يابن عزيزه .

\_ لا أنا عاوز حته كستور.

الشيخ آدم ساخراً

\_ كستور ؟ عاوز تلبس كستور يا ابن عزيزه.

عزيزه معترضه

\_ وما يلبسش كستور ليه ، اللي بيلبسوه

أحسن منه .

\_ الله يرحم أبوكي ، كان بيلبس الخيش

وعمره مالبس نعل ورجليه كانت مشققة ومقشقة

زي الأرض البور ، ولما اشترى نعل إستخسر

يلبسه ، بقى شايله في ايديه.

\_ أدي اللي فالج فيه ، تتريق وتتمقلذ

ولا فكرت يوم تجييلي حته قماش .

\_ أنت آخرك شوال قطن يابنت اللاوندي.

## 22\_ البندقية

هل نحتاج تغيير لطريقة حياتنا ، هل نحتاج إلى التنازل عن بعض الأفكار الملونة التي تحاصرنا كألوان الطيف هل هناك مبادئ قديمة وعادات مستنبطة من الغير نحتاج التخلص منها، لاشك أن وضعنا النفسي صعب للغاية ولكل إنسان وضع خاص به، ونحتاج لجلسات مكثقة تُعيد فيها قراءة مجلداتنا وأفكارنا .

.....

في مضيعة جعفر ، يجلس جعفر ومعه اللزي يدخل هارون وبصحبته منازع رجل ضخم الجثة، أجش الصوت) عينان جاحظتان تشعرك أن الشيطان يحرسهما، ملامح متعرجة غليظة، شكل مثير للإشمئزاز والريبة، له صيت واسع في الشر، قاتل متسلسل ، هو يحمل جميع شهادات الإجرام و كل تكوينه النفسي وثقافته لا يحوي سوى مَنْ يُقتل ، ومتى يقطع الطريق وكيف يَنقب البيوت لسرقة البهائم ، منازع يحمل شوالاً به خمسة بنادق .

هارون

\_ اتفضل يامنارِع ، أنت مش غريب.

جعفر

\_ والله زمان يامنارِع.

\_ ازيك ياجناب الملتزم .

اللي وهو ينظر إلى الشوال .

\_ أيه اللي في الشوال ده يامنارِع

أوعى يكون فيه قَتِيل.

منارِع ساخرأ

\_ هو قتيل واحد .

يضحك

\_ دول خمس قُتْلُه؟

يفتح منارِع الشوال ويُخرج منه بُندقية.

جعفر

\_ أيه ده ؟ باروده !

منارِع

\_ أيوه

هارون

وجبتها من فين ؟ يا حزين ؟

\_ معايه خمسه منها.

يلتفت لجعفر ويعطيه البندقية. جعفر يمسكها

ويصوبها ناحية اللزي .

\_ دي ممكن تموت اللزي ، مش كده.

منازع

\_ باروده واحده ويقع مايجطش منطوق.

اللزي

\_ ودول موديهم فين ؟

\_ وهو فيه حد عندي أهم من جناب الملتزم.

جعفر

\_ فيك الخير يامنازع ، بس لو الهجانه

شافوهم مش حيسيوهم .

\_ مايقدروش يقربوا ناحية هنا، أنت قَطَعْتَ

رجليهم من البلد ومايقدروش يهوبوا هنا.

اللزى

ودي تُضرب إزاي؟

منازع يمسك البندقية ويضع بها رصاصة ويشرح

للزى كيفية إستخدامها .

\_ وبعدين تدوس على الصوبع الصغير ده ، تطلع

الباروده من هنا ، تقتل واحد في الجبل.

\_ تضربها من هنا ! تقتل واحد في الجبل!

\_ أيوه يالزى ، أنت ماشفتهاش مع الهجامه.

\_ شوفتها معاهم ، لكن ، ماشفتهمش بيضربوا بيها.

هارون

\_ يعني يالزى تقدر تضرب حسن من بعيد

من غير مايشوفك.

منازع

\_ مين حسن ده ؟

جعفر

\_ واحد مانعرفش طلعلنا منين ولا جه من

أنهي داهيه.

\_ أيه ؟ وانتوا مش قادرين عليه.

اللي

هو إحنا طايليته، ده عامل زي العفريت.

منازع

\_ بالباروده دي ، تقدرنا تصطادوه زي الظرظوره (العصفورة).

## 23\_ في الجبل

...أمام الخيمة.

حسن لديه الوعي ، هو يحاول أن يحدد هدفه ، فتحديد الهدف هو نصف التعامل مع الأزمات ، لا يسمح للضغط النفسيه أن تُبعده عن هدفه ، هو يؤمن أن السيطرة على المواقف تحتاج عنصر المبادأة، لأنه يخلق الإرتباك للآخرين هو من النوع الذي يقتصد في قوته ولايبعثرها، هو يؤمن أنه ليست كل الصراعات تنتهي بتحقيق مكاسب، هناك خسائر وهناك طاقة مهدرة والطاقة المهدرة هي جزء من الحياة فالأسد يصطاد فريسته بعد أربع محاولات وهكذا الحياة بين خير وشر وبين نجاح وفشل .

حسن يتدرب مع حمدان ومرسال بالعصا خارج الخيمة هو يحطب معهما ومسعدة وحمدان يجلسان يراقبان التحطيب ، مرسال يحل عليه التعب والإجهاد من التدريب يرمي العصا ويرمي نفسه على الأرض، يتبعه حمدان.

حمدان

\_ أيه يا حسن ؟ أنت ما بتتعيش؟

مرسال

\_ لا ياسيدي ما بتتعيش، بيلاعبنا أحنا

الإثنين وهلكنا وهو لسه ما تعيش.

\_ علشان ما بتتمرنوش كتير ونفسكم قصير

لكن أنتم أحسن كتير دلوقت ، ما يتخفش عليكم.

\_ الفضل ليك يا حسن .

\_ الفضل لله وحده ، قدامنا وحوش ولازم نكون

جاهزين .

.....

الحمداني يحكي لمسعده عن حياته.

\_ أم حمدان ماتت وماكنش حمدان كامل

الخمس سنين وليله تزيد عنه سنتين .

ربيتهم أنا وما دخلتش عليهم مرات أب في الدار.

مسعده وهي تحاول أن تخفف عن نفسها فقدان

زوجها رحان.

\_ ربنا يخليك ليهم ، تلاقي أمهم غاليه عليك.

\_ الله يرحمها ، كانت ست ولا كل الستات

مافيش واحده تقدر تعوضني عنها.

\_ الولاد أهم كبروا قدام عنيك وربنا يباركك فيهم.

\_ أيوه ، كبروا وشايف عزابهم قدام عيني

ومش قادر أعمل حاجه .

مسعده تشعر بضيق في التنفس ، كحة شديدة

مصحوبة بقئ .

الحمداني

\_ سلامتك مالك .

حسن وحمدان ومرسال إتجهوا نحوها، هي لا تشعر

بهما ، تنظر بعيداً وهي تبتسم وتقول .

\_ رحان

توقف نبضها وفارقت روحها الحياة ، صدمة أخرى تعصف

بحسن ومرسال أوجعتهم بعد موت رحان.

## 24\_إغتراب الزمن

هل الزمن يغترب ويضطرب ، ويتغير حاله؟ ، هل آفاق الأموات  
ومات الأحياء؟، هل تساقط الدموع يعمي العيون؟ ننتحب  
بصوت السكون، نسير في مفترق الطرق ، لا نعلم إلى  
أين ، الكل يجري ، يتسابق ولكن لا يعلم إلى أين ، أقسى  
البشر ، هؤلاء المشوهون في داخلهم ، تهرب منهم الأشباح  
وتفر من أمامهم الشياطين ، حتى كرهوا النظر إليهم.  
هم حاقدون ، حاسدون ، متطيرون ، متشائمون ، مبعثرون  
طعنوا ضمائرهم وأماتوها .

داخل دار اللزي

...منيرة كالعادة لا تترك ليله في حالها وتُنغص عليها  
جياتها من حين لآخر وكأنها لا تكتفي بما بها من وجع  
ولكن أرادت قتلها حية بسكين بارد.

دخلت منيرة حجرة ليله ، ليله التي كانت لاتنظر

إليها ، نظرت لها بإشمئزاز ومنيرة قابلت النظرة

بابتسامة صفراء تحمل كل الشماتة.

- ليه بلغة أخرى لم تتعودها منيرة.
- \_ مش أخوكي قلقك ماتهبوبيش هنا.
- \_ بجيلك علشان أتشفى فيك وامشي  
ياخاطفة الرجاله.
- \_ وأيه اللي حيعود عليك وأنت بتتشفي فيه ؟
- \_ أرتاح من جوايه ، وكل ماتتذلي وتتجاب  
مناخيرك الأرض ، أرتاح أكثر وأكثر.
- \_ مش حَتُذِل يامنيره ، ومش حديك فرصه تتشفي.
- يدخل اللزي ويتفاجأ بمنيرة في حجرة ليله. ينظر  
إلى منيره بغضب.
- \_ أيه ده ..؟ أنت أيه اللي جابك هنا ؟
- منيرة تتلعثم في الرد وترتبك .
- \_ أنا جيت ياخويه ، قلت يمكن تكون محتاجه  
حاجه ليله بنت الحمداني.
- ليه تتصنع البكاء وتكيد لمنيره.
- \_ فيه أيه ياليله ؟

تنظر لمنيرة

\_ مفيش حاجة .

\_ قوليلي فيه آيه ؟

\_ اختك عماله تشتم فيه وتضربني.

منيرة هزتها المفاجأة ووضعتها ليله في موقف

صعب أمام اللزي ، اللزي التفت نحو ليله.

\_ بتشتمك وتضربك

اللزي صارخاً في وجه منيرة.

\_ أطلعي من هنا واستنيني بره، ياللا غوري.

تخرج منيره منكسرة ومهزومة. اللزي يقترب

من ليله.

\_ ، معلش ، ماتعيطيش ، مش حتقرب

ناحيتك واصل تاني.

\_ أنا ماعملتش لها حاجة .

\_ أنا عارف ، عارف إنها براويه ومش طايقاكي.

\_ فكرتي في اللي قولت لك عليه.

\_ لو أبويه وأخويه وافقوا ، أنا موافق.  
اللزّي بفرحه وسعادة.

\_ حيوافقوا .

\_ وأنا مستنيه موافقتهم .

\_ وأنا حجيبهم من تحت طقاطيق الأرض.

\_ وحتجيبهم إزاي ؟

\_ متخافيش مش حأذي حد فيهم

أنت من دلوقت تاكلي معنا .

\_ لما أبويه وأخويه يوافقوا.

\_ ماشي .

يخرج اللزّي ومنيّره تنظر له بسخريه وتحدث نفسها بصوت  
عالي،

\_ حنشوف مين فينا الأقوى يالزّي ، أنت ولا أنا.

## 25\_ دار أرمنيوس

البشر الذين يكفون عن الشكوى ، هم بشر يكفون  
 عن التفكير ويعيشون في إغتراب روحاني،  
 يجلس المقدس أرمنيوس بصحبة إبنتيه مريم ويشعه.  
 \_ حسن وحشني قوي يابنات ، تصدقوا أنا شایل همه  
 كأنه إبني .

\_ وانا ومريم خايفين عليه كأنه أخونا ، هو اللي عمله  
 علشاننا شويه، هو حفظ لنا بيتنا وبقى زي المطاريد  
 عايش في الخلا ،.

مريم

\_ حسن زي الجبل يابا ، متحمل اللي مايتحملوش  
 حد ، سنه صغير ولكن ولا أجدع راجل .

أرمنيوس

\_ بيقولوا اللزي حيتجن لما دخل داره وأخذ رحان.

مريم

\_ وهو اللي عمله فيه شويه ، دول بيقولوا  
 أخذ البهايم بتاعته وحرق القمح .

يشعه

\_ يارب اللزي يطق فيها ويموت .

ارمنيوس

\_ اللزي مش حيعديها لحسن وحيقلب عليه الدنيا

عاوز يوصله علشان حسن كسر راسه قدام جعفر

ومش حيقدر يرفعها إلا لو جاب حسن .

يشعه

\_ بيقولوا جعفر قعد يتريق على اللزي وقال

حسن ده ولد ماجابتوش ولاده .

أرمنيوس

\_ ده كلام من ورا قلبه بيغيظ بيه اللزي

وبيسخنه على حسن ، جعفر بيكره حسن

أكثر من اللزي .

مريم

\_ وهو عمله أيه ؟

\_ حسن بقت ليه سيره حلوه وسط أهل

البلد وجعفر خايف يتلموا حواليه ، زي الحمداني

وحمداً وسديري ، وكمان بنته اتعلقت بحسن  
ولو وصله الخبر مش حيسكت ، جعفر عاوز الكل  
ضعيف ومحتاج ، مش عاوز القوي .

يشعه

\_ بس حسن حيقدر يصد لإمتى يابا.

\_ حسن نفسه طويل ، هو تربية الشيخ عامر

اللي كان واقف لوحده قدام الوالي .

مريم

\_ ربنا معاه ، الصيف قرب يخلص وعيشة الجبل صعبه.

وكمان الخمس شهور باقي فيهم شهرين ويطردونا.

يشعه

\_ مش حيقدرنا طول ما حسن موجود، حيسكتوا علينا

علشان يخلونا طعم يصطادوا بيه حسن ، مش كده

يابا .

\_ معاك حق يابنتي ، حتى حسن وهو بعيد ضامن

لينا الأمان .

## 26\_ المؤامرة

نحتاج أن نضحك ، حتى ولو كانت أعيننا مليئة بالدموع  
نبتسم عندما ينتظر منا الآخرون البكاء،

اللزّي ومعه منازع بجوار نخلات مُصبح وهم ثلاثة نخلات في

مفترق طريقين ، على ناصية الجسر و ممر ضيق ونخلات  
مُصبح هو مكان اللقاء والتواعد سواء بشكل سري أو علني

وتنتسب النخلات لصاحب الأرض ويدعى مُصبح ورغم أنه  
ترك البلده ظل إسمه يتردد جيل بعد جيل .

\_ أد كده ، الواد ده غايظك يالزي .

\_ غايظني وبس ، ده غايظني وفارسني

مش لاقيله حل يامنازع.

.. السلوتي إعتاد الدخول داخل الأراضي الزراعية

لجمع الحشائش لحمارته ، لم يتخيل أن يجد اللزي

ومنازع ، هو يعلم جيداً أن منازع رجل يستأجروه للقتل

وقاطع طريق ، هو يخافه وتردد في الهرب ولكن هم

يجلسون في ظل النخلات ولن يروه. إقترب منهم.

ينصت لحديثهم .

- \_ الواد ده شيطان ، مش ساهل زي  
 مانت فاكر يامنارع .
- \_ تعرف مكانه ؟
- \_ لو أعرف مكانه ماكنتش سبته  
 هو عايش في الجبل ، لكن فين ؟ ، الله أعلم.
- \_ سيب الواد ده عليه ، ديته طلقه من الباروده دي  
 وأجيبلك جتته في شوال .
- فزع السلوتي عندما رأي البندقية في يد منازع.
- \_ ياريت تقدر ، تبقى عملت فيه معروف  
 ويبقى جميل مش حنساء.
- \_ معروف أيه يالزي ، كل شئ بتمنه.
- \_ ليك حق تشرط يامنارع ، والله وجه يوم  
 اللي اللزي يكري فيه واحد على قتل عدو ليه.
- \_ حاخد عشرين أردب قمح قصاد رقبة حسن.
- السلوتي في حالة رعب وفزع ، تنتابه رعشات  
 لا يستطيع لملمتها.

- \_ ماشي يامنازع ، مواقف ، هاتلي جتته  
 وحديك عشرين أردب قمح، بس الكلام بيني مابينك.  
 \_ سرڪ في بير ماتقلقش ، قدام الناس أنت اللي  
 قتلته وأنا ليه العشرين أردب .  
 \_ ماشي يامنازع .  
 \_ خلاص وأنا حبيب عزالي وأقعد في بيت التعابين وحببات  
 من الليله هناك .  
 \_ لكن أنت حتعرفه إزاي ؟  
 \_ اللي يعيش في الجبل وسط الدياته  
 لازم يبقى ديب والديب يعرف الديو اللي زيه.  
 \_ كويس انك حتقعد في بيت التعابين حتبقى  
 جنبينا وكما ده المكان اللي كان هربان فيه الأول  
 قبل ماأهجم عليهم فيه .  
 \_ أنت خلاص عرفت حقد فين ، حبات هناك الليله.  
 يفترق اللزي ومنازع وكلاً منهم في إتجاه، منازع يذهب  
 بإتجاه الماسوره ليعبرها واللزي يعود للبلده من الجسر.  
 .. السلوتي يجري داخل الزراعه قاصداً حمارته الموجوده

على مشارف مصرف مياه نهاية الأرض التي يتواجد  
بها ، هو في حالة دهشة وذهول ، هو يحب حسن  
يحدث نفسه .

\_ منازل حيموت حسن بالبارودة ، حسن حيموت  
يجري داخل الزراعة . وصل حيث حمارته ، ركب الحمارة  
\_ ها ، ها يا حماره ، حنروحا الجبل لحسن ،

إستمر في سيره لم يعبأ بأشباح الليل، مر على المقابر ،  
لم تتوقفه الاصوات النداهة التي إعتاد سماعها واصل السير  
وهو يحس ويشجع حمارته ويحكي لها عن حسن ولم يحبه.

## 27\_الجبل

إن الأمل بطئ يطير بأجنحة ، رغم أن أجنحته متكسرة  
 إلا أنه لا يتوقف عن الطيران ، لا تصدق من يقول أن هناك  
 وسادة للراحة ، أسوأ البشر من يُجنب القانون وقواعد  
 العدالة والضمير ويتخذ من إرادته قانونا

وقت العصاري ، حسن يجلس مع حمدان على حجر كبير  
 ناظراً نحو مباني البلدة من بعيد.

\_ تعرف يا حمدان حال البلد هنا ، هو نفس حال المحروسة  
 هناك وَالِيٌ وهنا ملتزم ، هناك حاميات شركسيه وهنا  
 اللزي ورجاله .

\_ طيب وأخرتها؟

\_ الظلم يا حمدان لا يوقفه جبان ولا صاحب مصلحة  
 ولا باحث عن أمان كاذب ، من يمكنه مقاومة الظلم قليل  
 هو شجاعة وإيمان بالحق والعدالة وودي حاجات  
 ماتعرفش تلاقيا بسهولة.

\_ كلامك صح يا حسن ولكن فيه اللي مش فاهم  
 وراضي بمرارة حياته ، يحتاج اللي يفهمه ويقوده  
 يعني أنا في البلد كنت من اللي بيدور على

على أمان كاذب ولكن بعد مالقيت اللي  
 يبصرني ويفهمني وأمشي وراه ، اتغيرت  
 ومافيش خوف من مواجهة الظالم وأرفع  
 صوتي للحق ، كان جوايه بذرة انت كبرتها  
 وخليتها شجرة يا حسن .

\_ لسه طريقنا صعب ويحتاج لنفس طويل  
 الناس بقت بتتفرج على الظلم مايتحاولش  
 تقاومه ، الحر يا حمدان هو من يُفضل الموت  
 عن الظلم والعبد هو من يُفضل الظلم حتى  
 لو عاش جبان.

\_ يعني كل البشر بين أسياد وعبيد .  
 \_ ايوه يا حمدان ، ربنا خلقنا كلنا أسياد  
 على الدنيا وعبيد له وحده ولكن إحنا  
 إستعبدنا بعض . قولي يا حمدان .

\_ أرضك دلوقت مين بيزرعها .  
 حمدان بيتسم ساخراً .

\_ أرض مين ياعم حسن ، إحنا بنزرع  
 وجعفر هو اللي بيحصد ويدينا تمن  
 تعبنا غلة نروح نطحنها في طاحونته  
 ولو أدونا مال ، مايبين عشرة وعشرين  
 آقجة .

\_ يعني من ثلاثين لستين باره.

\_ ماوحشتكش الأرض .

\_ الأرض توَحَشْ صاحبها ياحسن .

\_ معاك حق .

يسمعان أصوات أقدام.

\_ سامع اللي أنا سامعه

\_ صوت أقدام ، تعالى نشوف فيه أيه؟

يتسللون ببطء من حجر خلف حجر .

\_ ده الواد سلوتي.

\_ يبقى أكيد وراه حاجه ، يتجهان نحوه.السلوتي عندما

لمح حسن جرى نحوه والدموع تنساب من عينيه.

حمدان

\_ أيه ياسلوتي ، مالك ، فيه أيه.

السلوتي يتلعثم ويشير إلى حسن

\_ حسن ، حسن .

حسن يُربت على كتفه ويمسك بيده ويجلسه.

\_ إهدا ياسلوتي ماتخفش.

\_ بخاف عليك ، أنا بحبك ، بحبك أكثر من الحماره

بتاعتي.

\_ وأنا كمان بحبك ياسلوتي.

\_ يبقى بلاش تموت يا حسن.

\_ أنا عايش أهو قدامك وماتخفش مش حموت.

\_ لا منازع حيموتك بالبارودة.

يلتفت لحمدان

\_ مين منازع ده ؟

\_ ده واحد من المطاريد بيكروه علشان يقتل

وقاطع طريق ونقاب بيوت ، يبقى كروه عليك يا حسن.

يلتفت حمدان نحو السلوتي .

\_ عرفت منين أنت ياسلوتي.

\_ كنت بجيب للحماره حشيش ولقيت

اللي قاعد مع منازع وقال له اقتل حسن

وحياخد عشرين أردب قمح.

حسن يضحك

\_ يعني تمن رقبتني شوية غلة .

سلوتي

\_ أيوه وحيقتك بالباروده .

\_ هي الباروده وصلت ليهم .

\_ أيوه .

حمدان

\_ أيه البارودة .

\_ دي سلاح بيضرب طلقة رصاص في حجم

عقلة الصوبع ده ( يشير إلى إصبعه ) ممكن

تموت واحد من بعيد ، يعني ممكن توصل

من بلدكم لهننا .

\_ ياوقعه طين ، يبقى حيحي يدور عليك

في الجبل .

السلوتي

\_ أيوه وحيستخبي في بيت الكفار

بيت التعابين اللي كنتوا فيه.

28\_ دكان على معبد

الخوف لا يخيف سوى القلب الفاسد والجبان لا يُقاتل  
في الحرب طالما هناك طريقة للفرار البسطاء من الناس  
يواجهون الظلم بأشكال مختلفة منهم من يواجهه بِنُكته  
ومنهم من يُسائر اللهو هرباً من مواجهة جُبنه ، هكذا حال  
السهارى في دكان علي معبد.

على الحصار يجلس محمد عوض والفخراني وعثمان  
برطوعة وعبدالمتجلي الحلاق .

محمد عوض

\_ الدكان بقي ماسخ من غير حمدان وسديري  
الله يرحمه .

الفخراني

\_ ياترى فين حمدان .

\_ تلاقيه هو وابوه مع حسن .

\_ الود حسن ده أنا حبيته وكل يوم حبي

ليه بيزيد ، ده جنن جعفر واللزي .

عبدالمتجلي الأخنف

\_ والنبي بلاش سيرة حسن ، الحيطان  
ليها ودان.

عثمان برطوعه

\_ نتكلم في الأعمال أحسن، أم حمال بتقولي  
خلي محمد عوض يعمل حاجه تُفك عقدة  
البت وتتجوز.

محمد عوض يُحدث نفسه ساخراً

\_ ودي مين يتجوزها ياربي .

يلتفت لعثمان .

\_ طيب أقولك تعمل ايه؟ تروح لسرب

الميه اللي في الكثرة ، المية فيه دلوقت

قليله ، تعكرها ، حيطلعلك السمك ، تمسك

السمكه النتايه وتسيب الذكر وأوعى تغلط

وتأخذ سمكه ذكر، وياريت لو تلاقي سمكه

بايره وماشيه على حل شعرها ، دي حتبقى

أحسن .

عبد المتجلي

\_ هو فيه سمكه بايرة وسمكة بنت حلال.  
 \_ أيوه فيه ، مش فيه ولاد حرام وولاد حلال  
 \_ أيوه .

\_ السمك فيه ولاد حرام وولاد حلال.

عثمان

\_ سيبك منه ، ده حمار مايفهمش حاجه.  
 محمد عوض

\_ يعني أنت تعرف السمكه بنت الحلال  
 والسمكة بنت الحرام .

\_ أيوه السمكه بنت الحرام تلاقياها  
 ماشيه تبصص للسمك وعايمة وهي  
 بتترقص صح .

محمد عوض يضحك على نباهة عثمان برطوعه  
 \_ايوه صح ، ولو مسكتها تلاقياها ناعمه أوي.

## 29\_ حجرة لواحظ

هي أنثى يُحبُّها القمر ، يُقبل جبينها كل مساء ، هي

سيدة جبال جوريات القمر، هو رفيق أحلامها، يداعب جفونها  
وجنونها،

لواحظ وحليمة داخل حجرتها .

\_ أنا من وقت ما منازع دخل البلد وأنا قلبي

مش مطمئن يا حليمه.

\_ معاك حق وشه فقري ، ومايجيش غير

بالمصايب .

\_ جاب لأبويه خمس برودات ، خايفه على حسن.

\_ وأيه الباروده دي ياستي.

\_ دي طلقة صغيرة لو ضربتها من هنا، تموت

واحد على الجسر.

حليمه بفزع

\_ ياوقعه طين ، هو أحنا ناقصين .

\_ تفتكري حيكروا منازع لقتل حسن .

\_ ايوه ياستي ، طالما ظهر منازع ، يبقى فيه

مصيبة جايه ، ده قتال قُتله وقاتل أكثر من ميه وواحد  
 أنا بسمع لما حد تطلعه قوبه في رجلية ، يقولوا له  
 شوف منازع وخليه يتفلك ( يبصق ) عليها علشان تخف.  
 \_ ياعيني عليك يا حسن حتلاقيها من اللزي ولا منازع .

.....

مضيفة جعفر

هم ساكني الشر ، يتحسسون خيوطه، يللمون  
 ماتبقى من هواء ، يتركون لغيرهم الباقي من هواء  
 مُعفر بالتراب غير صالح للتنفس، جعفر وهارون في  
 المضيفة كل يضع بندقيته بجواره

\_ البلد ساكته بقالها كام يوم ، ولا كأننا في ميتم.

\_ اللزي راعبهم وكمان من وقت ما حسوا بوجود

منازع إترعبوا أكثر.

جعفر يأخذ نفساً عميقاً

\_مش قادر يهارون أنسى عملته السوده.

\_ هي عمله مهيبه بصحيح ولكن بعد ما أخذت  
 منه الجنية والطاحون وبعده عن القمح وهو  
 بياكل في نفسه ، مش حيقدر يعمل حاجه ثاني.  
 \_ قليل أصل عملت منه بني آدم ، بعد ما كان مطرود  
 في الجبل ، وشلت عنه بلاوي سوده .  
 \_ هو لولا جنابك كانوا الهجامة سابوه ، كان زمانه  
 محبوس ونايم على البرش.  
 \_ ماهو ماتمرش فيه ياهارون ،  
 \_ أنت ربيته وبهدلته وعلمته الأدب.  
 \_ كان لازم أعمل كده، علشان يعرف  
 إن اللي رفعه لسابع سما ، يقدر يخفسه  
 في سابع أرض.

## 30\_ حديث الروح

الحب الحقيقي هو عطر لا ينتشر بين كل الناس ولكن تعلق قطراته ببعضهم، هو مرض لا نتمنى الشفاء منه ونكره المداوي ، وعندما يكون الحب خطاباً بلا توقيع لا تنبُض فيه حباه، حسن سئم ممارسة لعبة الأسرار وكره أن أن يكون رواية في حُضن الظلام.

على مقربة من الخيمة ، السلوتي يلهو مع حصان حسن وحسن وحمدان يراقبان الموقف وهما يتسلمان .

\_ أهو كويس إننا طلعنا بحاجه من اللزي.

حسن يهيم بعيداً غير منتبه لحديث حمدان.

\_ حسن ، حسن .

ينتبه إليه حسن .

\_ أيه ياسيدي أنت مش معايه خالص ؟

\_ معلش يا حمدان ، رُحت بعيد شويه.

\_ في لواظ ص ح .

حسن يتسّم وينادي على السلوتي ، يهرول السلوتي نحوه مُسرِعاً.

حسن للسلوتي .

\_ لو طلبت منك خدمه ياسلوتي ؟ تعملها ؟

\_ أيوه ، أنا بحبك ياحسن ، وأعمل أي حاجه

علشانك ، بس أوعي تقولي اقتل منازع.

\_ لا مش حتقتل منازع ، الخدمه اللي عاوزها

منك كبيرة وسر بينا إحنا التلاته.

\_ عاوز أيه وأنا أعمله.

\_ تقدر تقابل لواحظ ياسلوتي.

\_ أيوه بقابلها كتير وبتديني حاجات حلوه.

حمدان

\_ بتفكر في أيه ياحسن .

\_ عاوز ابعثها كلمتين .

\_ كلمتين أيه ، السلوتي لو وصل البلد

حيكون نسيهم.

\_ حكتهم ، بس مش عارف بتعرف تعرف

تقرا ولا لا.

- \_ أيوه بتعرف ، ماهي اتعلمت شويه في كُتاب  
الشيخ آدم ، قبل اللزي مايمنعه .  
\_ واللزي منعه ليه ؟  
\_ بيقولوا بيقوي قلب العيال على أهلهم  
حسن بيتسم  
\_ عملوا كده مع أبويه.  
\_ قولي حتكتبلها على أيه وبأيه.  
\_ شوفلي حتتة قماش من جلبيه  
يكون لونها فاتح.  
\_ دي ساهله .

.....

حمدان يتذكر منديل أخته ليله ، فقد كانت تحمل فيه  
الغداء له هو وسديري ، كانت تضع لهم فيه قطعة  
جبنة قديمة وقطعة جبنة قريش ورغيفين شمسي  
الرغيف سُمكه حوالي عشرة سم ، يتم خبزه في فرن

مبني من الطوب اللبني ، له عينان ، إحداهما لإشعال النار وموجوده من أسفل ويوقدونها بالحطب والبوص والعين العلوية يضعون فيها الرغيف ، عبارة عن عجينه تم فردها ووضعها على مايسمونه طُباعه وهي صاج الصعايدة أيضا مصنوعة من الطين وعلى شكل دائرة عندما تدخل الأَرغفة بداية مرحلة الإحمرار يخرجونها بمغرفة كبيرة وهي قطعة من الخشب على شكل دائرة نصف قطرها حوالي 15 سم مشدودة على لوح خشبي وكانت ليله لا تنسي أن تضع لهم فحلي بصل ، وسبحان الله الكثير يتساءل عن سر قوة بنيان أبناء الريف وقلة الحالات المرضية بينهم بالمقارنة بسكان المدن ، والسرف في فحل البصل فهو لا يخلوا من وجبه حتى أن البعض يستخدمه مع العسل فهو يقلل نسبة الكوليسترول وله فواد أخرى يحتوي **quercetin** والكيرسيتين يحتوي البصل على مركبات الكبريتيك أيضًا على معادن مثل الكالسيوم، والمغنيسيوم، والصوديوم، والبوتاسيوم،

- .
- والسيلينيوم والفسفور B6 وفيتامين C البصل أيضاً مصدر جيد لفيتامين والألياف الغذائية ، هم يتصرفون بشكل فطري وتلقائي وفي هذا التصرف فادة علمية وطبية للجسم .

دخل حمدان الخيمة ، الحمداني ومرسال يجلسان بالداخل.  
مرسال

\_ أياه اللي عوقم كده .

\_ مفيش ، كنا بنتدرب وبعدين جه السلوتي  
قعدنا نضحك معاه .

الحمداني

\_ والله السلوتي مُصيبه كبيره ، مفيش حته  
إلا وتلاقيه فيها .

حمدان يجد المنديل في صرة ملابسه ، يأخذه ويخرج ،  
يتجه نحو حسن ويناوله المنديل .

\_ وادي اللي تكتب فيه ، منديل ليله.

حسن يمسك بالمنديل ويضعه على الأرض ويشده  
بأربع أحجار في أطرافه.

حمدان

\_ حتكتب أيه دلوقت .

حسن بيتسم .

\_ أنت بتعرف تقرا .

\_ لا ، أنا كنت غبي والشيخ آدم شبعني ضرب.

حسن بيتسم .

\_ كويس انك مابتعرفش.

السلوتي يراقب الموقف وهو في حيرة من تصرف

حسن ، حسن يُخرج من جيبه خِنْجَرًا يجرح ذراعه

تسيل منه دماء غزيرة يستخدمه كحبر وإصبع يده

كقلم ويكتب للواحد.

حمدان

\_ كتبت أيه بقى .

كتبت

( إن ماكنتش شايفك بعنيه ، أنا شايفك بقلبي يالواحد )

\_ الله على الكلام الحلو ده .

السلوتي

\_ حسن ، حسن ، هو كمان القلب بيشوف  
 كمان زي العين .

\_ أيوه ياسلوتي ، بيشوف كل حاجه.

\_ أنا قلبي مش بيشوف

حمدان يضحك

\_ يمكن قلبك أعمى ياسلوتي.

حسن للسلوتي

\_ تقدر توصل المنديل ده للواحد.

\_ أيوه ، حطلع عليها دلوقتي وأديها المنديل.

\_ بس تخلي بالك من نفسك، وأوعى حد يشوفك.

\_ ماشي.

ينطلق السلوتي حتى يصل حمارته ويبدأ بها رحلته

إلى البلده وهو في فرح وسعادة لأنه يشعر أن تلك

الخدمة تُسعد حسن .

## 31\_حجرة لواحظ

أحببتك نبض  
 ولن يكون حبك يوماً ذكرى  
 ومهما جرحني الشوك  
 يبقى عطرك بأنفاسي  
 في أمسي ويومي وبكرة

للحب شموع من من عذاب ووجع لا ينطفئ، والذين  
 لا يسمعون متكلماً لا يتخذهم أتباعاً، لواحظ تمارس  
 الوجع في صمت ، تقف في شرفة القصر ، هي إعتادت  
 أنت تترقبه من بداية النهار حتى نهاية الليل، تراه قمراً  
 سابحاً في فضاء بعيد ومع قدوم الفجر يتساقط عسله  
 ليبلل شفتاها العطشى .تحديثه.

\_ ياه يا حسن ، أنا فين وأنت فين؟

مفيش بينا غير الشوق والوجع والحنين.

ملكيت قلبي وروحي يا حسن ، ليه تشريني

من كاس على لساني حلو ، وينزل جوه مني مر علقم.

السلوتي وصل لدار جعفر يحاول الدخول والغفير  
يمنعه .

\_رايح فين ياسلوتي.؟

\_ عاوز لواحظ.

\_عشان تديني جلية العيد.

\_ الست لواحظ نامت ، يالا امشي.

.....

لواحظ تنظر للقمر لعله يشفق لحالها.

\_ لو بإيدي ياحسن، كنت تركت كل حاجه

وجيتلك وعشت معاك .

تتنبه لحوار عند الباب وتسمع صوت السلوتي

وهو يصمم على مقابلتها.

السلوتي للغفير.

\_لا ، أنا مش حمشي من هنا ، غير

لما أشوف لواحظ.

لواحظ أدركت أنه جاء كالعادة ينتظر منها العطايا

تنادي على الغفير .

\_ سيبه يامهران ، أنا نازله أشوفه  
تجمع لواحظ بعض الفاكهة والحلويات وتضعهم في  
منديل وتصرفهم وتحمله وتنزل إليه.تصل الباب وتطلب  
من مهران أن يفتح الباب ، تطلب من السلوتي الدخول  
يدخل سلوتي ، يتلفت يميناً ويساراً حتى إطمئن أنه  
لا يوجد أحد، لواحظ في دهشة وحيرة من تصرف السلوتي  
هو تصرف جديد عليها .

\_ فيه أيه ياسلوتي ؟ مالك ؟  
السلوتي يكرر النظر يميناً ويساراً مرة أخرى ، ثم يضع  
يده من جيبه ويُخرج منديل حسن .

\_ حسن باعتلك المنديل ده .  
لواحظ بدهشه.

\_ حسن باعتهولي أنا.  
\_ أيوه .

تمسك بالمنديل وتفتحه وتقرأ  
( إن ماكنتش شايفك بعنيه ، أنا شايفك بقلبي يالواحظ)

لواظ في فرحة غير عادية، تشعر أن الكون يتسم لها وكل مافي الحديقة يرقص ويغني، وضعت المنديل ناحية صدرها.

\_ ياقلبي ياحسن .

أخيراً إنتبهت للسلوتي وحاولت أن تتماسك.

\_ وحسن عامل أيه ياسلوتي ؟

\_ حسن حلو ، أنا رحت قولتله اللزي كاري

عليك منازع علشان يقتلك بالباروده.

\_ وأنت عرفت منين ياسلوتي

\_ أنا سمعتهم بيتحدثوا عند نخلات مُصبح .

... بينما لواظ تتحدث للسلوتي ، تسمع مهران

يرحب بهارون ويدخل هارون ولواظ تخفي المنديل

في صدرها وتهب السلوتي صرة الفاكرة والحلويات

هارون للسلوتي.

\_ بتعمل أيه هنا ياواد ياسلوتي ؟

لواظ

\_ أنا ندهت عليه علشان أديه حاجه.

هارون للسلوتي .

\_ واخد الحاجه .

السلوتي يُبرز له الصُرة .

\_ أيوه أخذت .

\_ طيب إمشي غور ، إنجر من هنا .

.....

مغارة الثعابين

عندما يسود الظلم ويغيب العدل ، من يحمينا من عوادم

الإنسانية المسممة ، يعدمون الحق ليحيا الباطل وهكذا

يكون أهل العار فالحياة في نظرهم لا تتسع إلا لهم حتى لا يقتلهم ضمير الشرفاء، أسوأ مصير للأرض أن يحكمها الأغبياء

والحمقى.

منازع بعدما تناول بعض فاكهة الجوافة ، إتكا على حائط

المغارة ، أشعل سجارته الملفوفة ، أخذ نفساً عميقاً

وحدث نفسه بصوت عالي وهو في دهشة وتعجب .

\_بقى اللزي اللي المديرية كلها بتخاف منه  
وتعمله ألف حساب ، يكريني أقتل واحد  
دنا لو الدنيا كلها كرتني أقتل ، اللزي بالذات  
ما أصدقش أن يفكر يكريني ، أيه الحكاياه  
ومين حسن ده اللي أول مره أسمع عنه  
وشكله أيه ، على العموم كلها كام يوم  
واصطاده في فخى.

32\_ بالقرب من خيمة حسن .

نحن ندفع ثمن تذكرة قطار السعادة وعندما نتفحصها لا نجد  
إسما للقطار ولا موعد للقيام ولا رقم لعربة ولا رقم لمقعد  
جلوس ولا محطة إنتظار، حسن وحمدان بالقرب من الخيول  
\_ تعالى يا حمدان اركب فرسك، حنوصل مشوار.

\_مشوار فين .؟

\_ حقولك عليه ، بينا قبل مامرسال يجي

مش عاوز حد ياخذ خبر.

\_ طيب قولي حنروح فين ؟

يتجهان نحو الأحصنة ويمتطي كلا منهم حصان

وينطلق حسن وخلفه حمدان .

حمدان يقترب منه.

\_ قولي أنت مودينا فين بس؟

\_فيه ضيف جاي علشان يقابلني

ولازم أرحب بيه .

في حجرة لواحظ ، هي مستلقية على ظهرها وتمسك  
 المنديل وتقرأ مافيه عشرات المرات وعيناها تنهمر بدموع  
 الفرحة ، هي تحترق على وسائد الشوق تتمنى أن تتوحد  
 أنفاسهما ، فللشوق أسرار وللغياب حكايات ونظل نحتضن  
 بسمة الحنين وأبصارنا معلقة علي أרصفة الإنتظار.  
 بينما هي في فرحتها تتذكر مقاله السلوتي عن منازع  
 وأن اللزي سلطه لقتل حسن ، بدأ قلبها ينقبض، حتى  
 السعادة لا تأتي بحالها ولكن تأتي ملفوفة في منديل  
 وجع وكأن حالها يقول .

إن توسد الحزن صدري  
 وفاق الشوق صبري  
 وغلب الحنين أمري  
 وطوت الذكرى عمري  
 سوف تظل عسلي  
 وكل مري

.....

بالقرب من مغارة التعابين يتوقف حسن بحصانه وخلفه  
حمدان ، ينزل كلا منهما من فوق حصانه .

\_ استناني هنا يا حمدان .

\_ عرفت أنت جاي ليه دلوقت

جاي تقابل منازع .

\_ ضيفي ولازم أرحب بيه.

حمدان يحاول أن يُثني حسن عن موقفه .

\_ بلاش يا حسن ، أنا قلبي متوغوش

هو فيه حد يروح للشر برجليه.

\_ بص يا حمدان أقولك كلمتين خليه حلقه

في ودنك ، العدو اللي تشوفه بعينك ويبقى

هو كمان شايفك ، أحسن ألف مرة من عدو

يشوفك وماتشوفوش وممكن يخلص عليك

في لحظة غدر من غير ماتشوفه وتحس بيه.

\_ خلي بالك يا حسن منازع قوي ومش سهل.

ومعاه كمان باروده زي مقال سلوتي.

\_ قول يارب.

.....

داخل المغارة اللذي يوقد نار ويضع عليها كنكة شاي  
هو يعشق السجارة وكوب الشاي ، هو يفضلهما عن  
أي شئ ، وللشاي تاريخ وأساطير ، في أحد

أساطير الصين المشهورة ، كان شينونج الإمبراطور التاريخي للصين  
ومخترع الزراعة والطب الصيني ، يشرب وعاء من الماء المغلي بسبب  
القرار الذي أصدر للرعية وهو ينص على وجوب غلي الماء قبل شربه،  
فقدما في 2737 قبل الميلاد عندما طارت بسبب الرياح بضعة أوراق من  
شجرة وسقطت في الماء تغيير لونة. فقد أخذ الإمبراطور رشفة من الماء  
. وكان الطعم مفاجأة سارة لكونه منعش ولجمال نكهته  
وتقول أسطورة أخرى أن الإمبراطور قام باختبار الخصائص الطبية لأعشاب  
متعددة وذلك بتجربتها على نفسه . فبعض من هذه الأعشاب سامة ، وقد  
وجد الشاي ليعمل كمضاد وقد ذكر شيبونج للحكيم على ضرورة العمل  
المبكر في هذا الموضوع .

صب منازع كوب من الشاي وبدأ يرتشف منه بصوت عالي مثير  
للإشمزاز . وبينما هو يأخذ رشفة عميقه من كوب الشاي ترن  
في أذن حسن الذي دخل إلى المغارة وهو يبتسم.

\_ إزيك يامنزع .

منازع تهزه المفاجأة ودخول هذا الغريب عليه وهو لا يخطر في  
باله أن يأتي إليه حسن في حجره .

\_ مين أنت ؟ وتعرفني مينين ؟

\_ أنا جيت عشان أعر فك ، وكمان علشان تعرفني  
أنت .

\_ وأنا حعوز أعر ف خلقتك ليه ؟

\_ علشان أنت عاوزني ، وجاي تدور عليه

\_ هو أنت ؟

\_ أيوه أنا ، أنا حسن اللي بتدور عليه يامنارع .

منازع بدهشة .

\_ حسن .

حسن يتكأ على عصاه .

\_ أيوه حسن ، جيتلك برجليه علشان تاحد العشرين أردب .

منازع يحاول أن يمسك بالبندقية ، يلاحقه حسن بوضع العصا

ودهس كفه،

\_ مش عيب منازع يتحامي في باروده .

منازع ساخراً .

\_ ما انت متحامي في عصايه.

حسن يرمي بالعصايا بعيداً ويركل البندقية بقدمه بعيداً عن منازع.

\_ أنا من غير عصايه دلوقت ، وريني عندك أيه ؟

\_ حوريك وأعفر جنتك في التراب ، ولو أني فرحان

أني لقيت اللي قدر يتجرأ على منازع .

منازع يهجم على قدمي حسن بقوته ويطرحة أرضاً، يركله حسن بقدميه

بقوة ترمي منازع على حائط الكهف ،حسن يقف سريعاً ويتبادلا الضربات

بالأيدي وبالركل بالقدم وبالرأس، منازع يمسك حسن بقوة فيعاجله

بضربة رأس قوية ، يترنح على إثرها منازع ، يعاجله حسن بضربة

بقبضة يده ، يسقط منازع على الأرض ، وجاء سقوطه بالقرب من عصاة

حسن ، نسي شرف القتال أمام إهانات حسن له بضربات أفقدته إترانه

أمسك بعصا حسن وشب واقفاً محاولاً ضرب حسن ، يتفادى حسن الضربة

وبحركة سريعة يطوي العصا بذراعه الأيمن ويسحب منه العصا ،عاجل

منازع بضربة قوة ، تقادها أيضاً منازع وأمسك العصا ولكن لم يخلصها

من يد حسن ، يحاول كلا منهما إفلات العصا من يد الآخر ، تظهر قوتها

حسن يشد العصا بقوة نحوه فيندفع معها منازع فيعاجله بضربة رأس قوية

تسقط العصا من يد منازع ويعاجله حسن بعدة ضربات قوية يسقط بعدها

- منازع على الارض ويقف على جسده حسن واضعاً العصا  
على صدر منازع ، الذي إنهارت قواه وفقد المقاومة، يستسلم  
\_ منازع مقدرش ياخذ رقبة حسن ودلوقت مايستحقهاش  
وانت ياحسن تستحق رقبة منازع اللي البلاد كلها مستنياها  
\_ أنا جيت علشان أشوفك ، عاوز تاخذ رقبتى ليه ، عملتلك أياه.  
\_ أنا قاتل بيقتل ويقبض التمن ، مايهمنيش أعرف اللي حقتله  
أو معرفوش .  
\_ بتقبض على الراس كأن البني آدم دبيحه وراسه رخيصة  
مالهاش تمن عندك إلا كام أردب أو كام آقجة.  
\_ كنت فاكركده إنها رخيصة ياحسن ، دلوقت ورقبتى  
تحت إيدك حسيت بقيمة البني آدم ، أنا جيت أخذ رقبتك  
دلوقتي أنا رقبتى تحت إيدك .  
\_ رقبتك يامنازع ملك اللي خالقها ، هو بس اللي يقدر ياخذها  
أنا مش حقتك ولا أعمل زيك وأقولك تشتري بكام رقبتك  
أنا عفيت عنك، قوم أقف يامنازع ، مش عاوز منك حاجه.  
منازع وقف صامتاً أمام مروءة حسن ورغرغت عيناه  
بالدموع .

\_ مش عارف أقولك أيه ياحسن ؟

\_ ماتقولش حاجه يامنازع .

منازع يتجه نحو البندقية وحسن ثابت ويطرق بحدز  
هل يعاجله بطلقه ، منازع يمك البندقية من منتصفها ويتجه  
بها نحو حسن .

\_ ليه عندك طلبين ياحسن ؟

\_ قول يامنازع .

\_ أول حاجه تقبل مني البارودة دي هديه مني ، أهى  
تنفعك واكفر بيها عن البارود اللي ادوته لجعفر ورجالته  
ومستنيين يضربوك بيه .

\_ وأنا قبلت الهديه يامنازع ، الطلب الثاني أيه ؟

\_ تاخدني صاحب ليك ياحسن .

حسن بيتسم ويقترب من منازع ويحتضنه ومنازع لا يسيطر على  
الدموع التي تتسابق على وجهه .

.....

حمدان ينتظر حسن ، بدأ القلق يتسرب إليه من تأخير حسن في مغارة  
التعابين وخشي أن يكون أصابه مكروه ، لم يعبأ بأصوات الذئاب التي تحيط  
به .

\_ اتعوقت كثير يا حسن ، ماكنش له لزمة المشوار ده .

.....

حسن ومنازع ينزلان من المغارة ببطء وهما يتحسسان الأحجار  
منازع كاد أن يختل توازنه ، لولا أن حسن تلقفه .

\_ أيه يامنزع ، عجزت ولا أيه ؟

\_ اتعترت في طوبة يا حسن ، كانت حتشقلبني

قول لي اللزي حيتجن منك ، أنت عملته أيه .

\_ ماعملتلوش حاجه ومفيش حاجه بيني ما بينه

\_ إزاي ، طيب كاريني عليك ليه ؟

اللزي ما بيكريش على حد ويقدر يعمل كثير قوي

ولما يكريني أنا يبقى مش قادر يعمل معاك حاجة

\_ هو بس مش قادر يطولني مش أكثر.

\_ يبقى فيه سبب كبير علشان يطار دك ويكري

عليك .

\_ دي حكاية طويله ، حبقى أحكيها لك يامنار ع .

.....

حمدان يقف ممسكاً بحصانه وحصان حسن ويترقب تبة المغارة

من بعيد ، يلمح شبحان ينزلان ،

\_ أيه اللي أنا شايفه ده ، حسن مش لوحده ولا يكونوا مين .

يحاول أن يتبين الملامح ، بدأ حسن في الظهور وبصحبتة .

منار ع .

\_ أيه ده؟ ، حسن ومعه منار ع !

أيه اللي لم الشامي ع المغربي .

يقترب حسن ومعه منار ع من حمدان .

\_ معلى يا حمدان ، إتأخرت عليك

ينظر لمنار ع وهو يبتسم .

\_ أصل منازع تعبني .

منازع ساخرأ

\_ أنا اللي تعبتك ولا أنت اللي ورمت جتتي .

حسن يُعرف منازع على حمداني

\_ ده حمدان ابن الحمداني يامنازع ، صاحبي

وأخويه تعرفه ؟

\_ لا ماشفتوش قبل كده .

حمدان

\_ أنا مش فاهم حاجه ؟

حسن لحمدان

\_ عاوز تفهم ايه بس ؟ منازع بقى واحد مننا

حمدان يرتاب ولم يعجبه ماقاله حسن.

\_ إزاي ياحسن ؟

\_ ماتقلقش من منازع ياحمدان ، منازع راجل

وراجل جدع كمان ، ده اداني ابارودة بتاعته.

منازع

\_ من حقه يقلق ياحسن ، مفيش حد في البلاد يأمن منازع.

## 33\_ دار الشيخ آدم

كلما ضاقت الحناجر بالبوح ، تعلقت بأنشودة الأمل حتى تُفرغ ما أثقلت  
 به الحنايا ، ليتها كانت تنام الأعين قريرة ، وتسمح بإزالة بقايا دمع  
 ببضع أحلام طفيفة ، أصعب الأوقات في الصعيد ، وقت القبالة وهو  
 يبدأ من الظهر بتعامد الشمس على الأرض ، حر قارس الحرارة  
 الشيخ آدم يجلس بعيداً عن حرارة الشمس ، يستظل بالخوص ، يجلس  
 على حصيرة يصنع حبلاً ، يضع الليف بين أصبعي الإبهام والسُّبابة  
 ويفتل حبات الليف المنسولة إلى أعلى بأن يلف بعضها فوق البعض  
 الشيخ آدم أنجز أكثر من مترين في الحبل ، هو يفتل وشحاته ينسل  
 له من الليف وهو يغني .

\_ دا زمان كانت مشطه

والنيل مالي الأراضي

خراب يابيت بطه

عمار يابيت نفادي

\_ أتغني ياابن عزيزه ، ألم تجد ماتغني

به سوى بيت بطه وبيت نفادي .

\_ يعني أيه يابا زمان كانت مشطه؟ ويعني

أيه بيت نفادي وبيت بطة .

\_ يعني كانت الدنيا زمان عايمه على بعضها

وماكنش فيه سدود ويجي الفيضان يغرق

البيوت كلها ومن ضمنها بيت بطة وبيت فادي

علشان في مكان عالي ، الميه ماتوصلوش.

تدخل عزيزة

\_ خلصت الحبل يادم.

\_ ان شاء الله تنطسي في نظرك ، أنت ياوليه

مش شايفاني بقتل في الحبل، وأنت مستعجلة على أيه.

\_ عاوزه أخلص السباته علشان في الليل معزومه .

\_ مرات محمد عوض عزماني على حرق القمير.

\_ وفرحانه ؟

ساخراً الناس تعزم بعض على غدا ولا عشا

على بطة ولا ديك وانت معزومة على حرق القمير.

...القمير هو المرحلة الثانية بعد صناعة الطوب يتم بناءه بأكثر من عشرة

آلاف طوبه وترك فراغات كثيرة داخلية يصلها النار وهو على شكل دائري

بنصف قطر حوالي خمسة متر وبارتفاع يزيد عن العشرة أمتار ، يتركون

في منتصفه فوهة كبيرة وعميقة ومرتفعة في الوسط ويقومون بتجهيز الحطب والبوص ويوقدون عليه النار من بعد صلاة العشاء حتى صباح اليوم التالي وَيَسْوَد القمير من كل جوانبه من دخان الحريق ويحمر كجهنم من داخل الفوهة ويتركونه حتى يبرد بعد أن يحمر كل الطوب .

.....

ليه في حجرتها في دار اللزي ، تتزين وتتجمل ، تُكحل عينيها من محرمة قماش بها أكثر من خمسة زجاجات للكحل ، تخرج من الغرفة ، تتجه لنصف الدار تكيد منيرة ، منيرة تحرك ذراع الطلمبة لجلب الماء في صفيحة لتسقي به البهائم ، تنظر لليلة بغیظ فتحدثها ليله ببرود وكبرياء .

\_ إزيك يامنيره .

منيرة ترد بإقتضاب

\_ حمدالله بالسلامه .

\_ على أیه ياختي .

\_ على خروجك من حبستك ، وكمان متزوقه

وليك نفس تتزوقي .

\_ وما أتزوقش ليه ، هما اللي بيتزوقوا

أحسن مني ، الله جو العصريه حلو.

.... يدخل اللزي وتفاجئه ليله بزينتها فيمتلاً وجهه بالسرور والسعادة.

\_ والله منوره الدار .

\_ الدار منورها بأهلها.

منيرة في حالة غيظ و كبت تود أن تسحبها من شعرها وتوقعها أرضاً

وتُشبعها ضرباً، حملت منيرة صفيحة الماء التي إمتلأت من ماء

الطلبه واتجهت بها ناحية حوش البهائم وهي تمصص الشفاه

من الغيظ ، تدخل حوش البهائم وتصب لهم الماء وتحدث نفسها

\_ ماشي يابنت الحمداني ، أنت عاوزه تفرسيني ، طيب

حشوف أنا ولا أنت ياعشيقه الرجاله.

.....

لواحظ مستلقيه على فرشها ، نامت نوماً عميقاً ، لم يحدث لها

من قبل ، فكلمات حسن منحتها حياة بعد عدم وأمن بعد خوف

وحيرة ، هو يبدأ به نهارها وينتهي به ليلها ، تراه نصف  
من القمر ونصف من الشمس ، هو كل رحلتها في الكون.  
حليمه تطرق الباب ، لواظ تفيق من نومها .

\_ ادخلي يا حليمه .

تدخل حليمه وتتعجب من وجود لواظ على الفراش ويبدو لها  
أنها مستقيظة الآن .

\_ أنت لسه نايمه لحد دلوقت .

\_ أول مره أنام كتير كده يا حليمه

\_ إحنا داخلين على العصاري .

\_ معقوله أكون نمت ده كله .

\_ لا ، الحكايه فيها سر .

\_ أيوه فيها سر ، السر في المنديل ده .

تضع لواظ المنديل على صدرها وتحضنه .

\_ أنت باين عليك اتخبأتي ، بتحضني منديل .

\_ وابوسه كمان وأطير بيه .

\_ والنعمه اتخبأتي رسمي ، منديل يهوسك كده .

\_ يهوسني ويجنني واكثر من كده ، منديل حسن

يأبت يا حلیمه .

بدهشة وإستغراب

\_ منديل حسن ؟

\_ وجالك ازاي .

\_ بعته مع السلوتي ، وكاتبلي عليه .

تنظر حلیمه للكلام المكتوب ولا تستوعبه ولكن الكتابة بالدم أدهشتها.

\_ ده كاتب بدم على المنديل .

\_ أيوه يا حلیمه ، حسن كتبهولي بدمه ، عرفتي

ليه المنديل غالي عليه .

\_ أنا عقلي خلاص حيطير مني

أنتوا حتموتوني ناقصه عمر .

\_ وأنا عقلي وقلبي وروحي طاروا

طاروا مع حسن يا حلیمه .

## 34\_ بالقرب من الخيمة

عليك أن لا تتخيل كل الناس ملائكة حتى لا تفقد أحلامك ، ولا تجعل  
ثقتك فيهم عمياء فتبكي على سذاجتك ، يجب أن تتعامل بحیطة وحذر  
تعطي كل الثقة وتفترض حسن النية وأنت في ترقب وحذر ، حسن يمنح  
منازع كل الثقة وحسن النية ومنازع بدوره يحاول أن يُثبت لحسن  
أنه تغير للأفضل ، حسن يجلس مع منازع على الرمال على ضوء القمر  
يحكي له قصته ويده اليمني تلهو بالرمال ، فيملاً قبضته بالرمال ويُفرغها  
من أسف قبضته ومنازع يُنصت له وهو الآخر يلهو ولكن مع الحصى  
يمسك بالحصى الصغير ويقذف بها بعيداً.

\_ جيت هربان البلد دي بعد ما عدموا أبويه وهربني  
من هناك عمي رحان ربنا يرحمه .

\_ مين رحان ده ؟

\_ يبقى أبو مرسال .

\_ العبد بتاعك ..؟

\_ هو صاحبي وأخويه يامنار ع ماتقولش عبدي.

أبوه وامه تعبوا علشانى واتحملوا كتير واللزي

خطف عم رحان وحبسه في حوش البيت لولا

ماهربته من هناك وكانت صحته تعبت ومات هنا.

\_ وبعدين يا حسن ؟

\_ ربنا كرنا براجل طيب ، أخذنا على مركبه

اسمه منقريوس.

\_ عارف منقريوس ، أخو المقدس أرمنيوس.

\_ أيوه ، خلاني نزلت في ضيافة المقدس أخوه وفتحت

عيني تاني يوم على كُريم وهو جاي عاوز يمشي المقدس

وياخدوا داره .

\_ يبقى أنت بقى اللي ضرب كُريم ؟

\_ ماكنش قدامي غير كده ، علشان أحفظ للمقدس داره.

\_ علشان كده ، هربت للجبل ، طيب واتعرفت على الحمداني

وحمدان إزاي ؟

\_ اللزي عاوز يتجوز ليله بنت الحمداني بالعافيه وهي زوجة

لسديري ابن اخو الحمداني ، أنا نزلت هربت ليله وبعدها

هربت سديري وقتله اللزي في المغاره اللي كنت قاعد فيها.

\_ وليله دي فين ؟

\_ أخذها اللزي وحابسها في داره.

\_ يا بوي ، دا أنت حكايتك حكاية يا حسن .

أنا شُفت في حياتي كثير ، لكن ماشُفتش

اللي أنت شُفته.

\_ أهل البلد غلابه يامنازع وجعفر واللزي

وهارون بيمصوا في دمهم ومستعبدينهم.

\_ تصدق أنت حسستني بأني راجل ناقص

شيطان بيفرح بالخوف اللي يشوفه في عيون

الناس ، راجل ، قلبه مات من سنين .

\_ وقدامك الفرصة تصحي قلبك الميت

وتكفر عن اللي عملته في الناس .

\_ أكفر عن أيه ؟ ولا أيه يا حسن ؟

\_ رحمة ربنا واسعة.

\_ وأنا من إيدك دي لإيدك دي.

يمد يده ليصافح حسن الذي يُفرغ التراب من قبضة يده وبدلاً من أن

يمد يده لمصافحة منازع ، أمسك بها من المعصم وصرخ صرخة

كبيرة ، الصوت وصل لداخل الخيمة حيث الحمداني وحمدان ومرسال

فظنوا السوء في منازع وخرجوا مسرعين نحو حسن .

\_ أيه اللي حصل يا حسن .

\_ حاجة لدغتنى جامد .

\_ دي دفينه يا حسن ، هات إيدك .

يمسك منازع بيد حسن ويُخرج خنجر من ملابسه ويقوم

بجرح المكان الذي أشار عليه به حسن وقام بتشريطه عدة

شرطات لخروج السم ، ومد فمه في كف حسن ، يمتص الدم المسموم.

ويبصق به بعيداً، وصل الحمداني وحمدان ومرسال ، ووجدوا منازع يمتص

الدماء من كف حسن .

الحمداني

\_ فيه أيه يامنازع ؟

\_ الظاهر إن دفينه لدغت حسن.

\_ ياساتر يارب ، دي لدغتها أصعب من العقربه.

\_ أنا خرجت الدم المسموم ، شوفولي خَلَقَه قديمه

أربط بيها إيده .

.....

في الدرب

نأتي للحياة بصفحات بيضاء نقية ، وعندما نصل لمرحلة الوعي يمسك كل إنسان فرشاة لرسم صفحات حياته، منا من يحولها للوحة سوداء قاتمة ومنا من يتفنن في توزيع الألوان ويرسمها بشكل ساحر وجمالي ومنا من لا يجيد الرسم ويملأها تلطيش بالألوان.

يشعه تسير حاملة البلاص على رأسها في الدرب ، فتقابلها حلیمه هي الأخرى في الطريق للبئر ، حيث تنتظر كلا منهما دورها ويشاهدان خلف الملا وهو يعتريه الغرور لتحكمه في ماء البير ، هو لا يحرص على دور كل واحدة منهن إلا قليلاً هو يجمال دائماً.

\_ أنت لسه رايحه تملي ميه دلوقت يایشعه.

الشمس قربت تغيب.

\_ لقيت الزير مافيهوش ولا نقطة ميه ، كنت مكسله.

\_ أنا قربت املا الزير يمكن المره دي وخلص.

\_ لواظ عامله أيه يایشعه؟

\_ اسكتي ، دي طايره من الفرخ ، من وقت

ماحسن بعثها المنديل وكتبلها فيه كلام بدمه.

يشعه بتعجب ودهشة

\_ حسن بعثها مندبل ، إزاي ؟

\_ بعته مع السلوتي وكتب عليه كلام حلو قوي.

\_ يا عيني عليك ياحسن ، دانت واقع خالص

وكمان كاتبه بدمك.

\_ ولو احظ كمان ، مفيش في حياتها غيره .

يصلان للبئر ، من حسن حظهن لا يوجد زحام على البئر

خلف الملا بدأ في ملأ الماء داخل بلاص كلاً منهن.

\_ بتروحي لليله يا حلومه.

\_ أيوه ، هو أنا ورايه غير ليله ولو احظ ونكدهم.

\_ خلي بالك معاها .

\_ ليله رايقه دلوقت وبطلت تلبس السواد.

\_ أهو روقانها ده اللي قلقني.

ينتهي خلف الملا من ملأ بلاص كلاً منهن. وساعدهن في رفع البلاص

على رؤوسهن واستكملا حديثهن وهن في طريق العودة .

\_ ماتخافيش عليها ، ليله مش ساهله، دي مجننه منيره.

\_ ومنيره كمان مش ساهله ، دي تلعب بالبيضة والحجر.

\_ مش طايقين بعض وطول اليوم نافر وتقير.

بس اللزي واقف مع ليله.

\_ عاوز يرضيها علشان توافق ع الجواز.

\_ أيوه ، هو بيدحلب عليها علشان كده.

.....

في الجبل

وقت الغروب يجلس حسن بصحبة منازع ، يتأمل الشمس وقت الغروب وكأنها تسبح على بحر شاطئ جميل لون مياهه إكتسى باللون البرتقالي مع مزيج من اللون الأحمر ، ينتابهما السكون والصمت ، هو يتابع النهاية المعتادة ، اليومية لرحلة النهار والأيام ، يكسر حدة الصمت منازع.

\_ أنا حنزل الليله يا حسن ، أطقس على الأخبار

وأشوفك في الليل ، وأقولك كل حاجه.

\_ ولو سألك اللزي عن رقبتي ، حتقوله أيه؟

\_ أقوله عاوزني أدور في الجبل كله

وأجيبه في يوم وليله ، ولأيه.

حسن يبتسم

\_ إنزل أنت يامنازع وربنا معاك.

بيدأ منازل رحل النزول إلى أسفل نحو البلدة، حسن ينظر إلى البلدة من بعيد  
بلاد الدهشة أسوارها مليئة بمصايح تخطف الأبصار ولا زلنا  
نتنظر خفض الضوء حتي نُبصر، يحدث نفسه .

\_ آه يابلد ، على أد مافيك من شر.

جواك أحلى حلم وأجمل قمر

ياترى وصلك المنديل يالواحد

وقريتني الكلام اللي كتبت هولك.

يعود ويعطي ظهره للبلدة ويتأمل في الجبل، إن كنت تمر بضيق أو حزن  
عليك بالتأمل ففيه راحة وحياة، إن شعرت بالوحدة فلا تجزع ، ففي التأمل  
مأينغنيك عن البشر.، حسن يتأمل في الجبل ورغم أنه بدأ مع خيوط الليل  
يظهر كشبح عملاق، لم يشعر حسن بحمدان يقترب منه.

\_ فيه حاجه يا حسن ، بتبص ليه كده للجبل.

\_ الجبل والأرض وبلدكم مفيش فرق.

\_ مش فاهم تقصد أيه ؟

\_ بقصد أنه مفيش فرق بين الجبل والبلد؟

\_ إزاي ، الأرض بتجمع الحب والكراهية ، الخير والشر

الحسد والغل ، والجبل أيضا كل الأعداء، الديب

والضبع والأسد والتعلب ، بس تعرف

ياحمدان الوحوش أرحم منا.

\_إزاي طول اليوم بيطاردوا في بعض.

\_ بيطاردوا بعض علشان ياكوا

ولو أكلوا وشبعوا خلاص

لكن البني ادم مايبشبعش ، عاوز ياكل

ويحرم غيره من الأكل.

\_ بس مايعرفوش الحب.

\_ مين قلك، الحب عندهم وكمان النظام

حتلاقي كل الديابه عايشين مع بعض في حب

ونظام ويحترموا بعض وعلى الخير والشر تلاقهم

ايد واحده ، قبيلة الأسود كده وكل قبيلة حيوان

ولكن إحنا بنتربص لبعض ونسرق بعض

ونقتل بعض.

\_ أنت لحستلي عقلي، إحنا مالنا ومال الكلام ده .

حسن يبتسم

\_ معلىش أنا تقلت عليك ، بهون على نفسي

.....

لا تخسر همسات الصباح ، هي دائماً ممتلئة بأجمل الأحاسيس، يسكبها  
حبر أبيض شفاف خالي من الألم ،هي تمسح ماقبلها من وجع الليالي  
إملاً الصباحات بالأمل وروح التفاؤل ، الأشرار يستقبلون الصباح بحبر  
أسود ، يكتبون رسائل الوجد وينثرونها في الهواء ، تحملها الريح  
ويتلقفها البسطاء من البشر.

..... مع تباشير الصباح ، جعفر يمتطي حصانه مسرعاً ، مخلفاً حوله  
كل الغبار ، عند القريوس يجد طلب وبكر.

\_ ماشفتوش هارون يارجاله ؟

\_ هو واللزي كانوا ماشيين ناحية نخلات مُصبح.

إنطلق جعفر بجواده قاصداً الجسر ، واصل جواده الجري بسرعه

القصوى ، الحصان تُقاس سرعته حسب البيئة التي يجري فيها

فهناك حصان سرعته تتراوح ما بين 40 و48 كيلو وهناك من تصل

سرعته من 68 حتى 75 كيلو وهناك من يتخطى تلك السرعة.

...تحت ظل النخيل يجلس اللزي وهارون لا يعبئان بحشرات

أبو العكيس وهي الحشرة الأشهر في الطرق الزراعية .

\_ بطل كلام ، كلامك بقى ماسخ ياهارون.

\_ أنت ما بَطَقْشْ حد يجيبلك سيرة ليله.

\_ وأنت مالك ومال ليله ، اتجوزها ماتجوزهاش  
مالكش فيه .

\_ أنت اللي بتقولي أيه رأيك اتجوز ليله

ومش علوزني أقول غير اللي يرضيك  
أو تتعصب عليه وتهلفط كده.

اللزى يلح من بعيد حسان جعفر وهو يجري. في إتجاههم.

\_ مين اللي بيرمَح كده ؟

\_ هو فيه حد بيرمح كده غير جعفر .

يقترب منهما جعفر وينزل من على جواده.

\_ بتعملوا أيه هنا ، جايبين تشوطوا على الزرع.

هارون

\_ كنا بنتمشى انا واللزى ،الزرع مَيْته حتقف

داخليين على مية الأربعين .

مياه الأربعين هي فترة قطع المياه عن المصارف والترع

لمدة أربعين يوم وتجف الترع والمصارف ولا يجد أهل البلده

إلا صيد أسماك البُلطي والقراميط، يقومون بتعكير المياه بالطين

فتفقد الأسماك القدرة على التنفس لنقص الأكسجين من المياه بسبب  
 تعكير المياه فتخرج إلى أعلى محاوله التنفس وهي اللحظة التي  
 يتربقها الصيادون ، ما إن تخرج الأسماك للتنفس حتى ينقضون عليها  
 وكان أكثر مايرهقهم هو صيد القراميط ، فهي تتمتع بقوة يُمكنها أن  
 تُسقط رجل .

\_ أنت جنابك صاحي بدري النهارده.

\_ أيوه ولقيت نفسي زهقان ، وماشفتش خلقة حد

فيكم ، قلت أنزل أتمشى شويه، بقولكم أيه ؟

اللزى

\_ قول جنابك.

\_ أنا زهقت من الأرض ، والناس اللي بيزرعوها

زهقوني أكثر .

هارون

\_ وحنعمل أيه أكثر من اللي بنعمله.

\_ الأرض مابتديش زي الأول وأنا السنجق

مابيرحمنيش ولو قلت له ارحمني حيقول

أنا كمان الوالي مابيرحمنيش.

اللزى

\_\_ أهي ساترانا وخلص ونص العمى ولا العمى كله.

\_\_ لا ، أنا زهقت منها وعاوزين نشوف حل يخلصنا منها.

هارون

\_\_ عندي يابيه الحل .

\_\_ قول ياهارون

\_\_ نقطعوها حتت وكل حته مية فدان ونبيعوها.

اللزى

\_\_ واللى بيزرعوها.

\_\_ يشوفوا شغله تانيه .

## 35\_ حب يحاول أن يتنفس

لواحظ ولحظات الإنتظار، تتصاعد أنفاسها ، تتمنى لو تستجمع آهاتها وترسلها لحسن عبر النسيم ، هو فتنتها الكبرى ، وخطيئتها العظمى لا أمل لها في توبة منه ، مزقت كل صكوك النسيان ، تقف بجوار شجرة جوافه تنتظر حلیمه التي أرسلت في طلبها، هاهي حلیمه قادمه بمشيتها المميزة وإبتسامتها التي لا تفارق شفاها.

\_ خير ياست لواحظ ، خضيتيني ، فيه حاجه؟

\_ أيوه ، أنا عاوزه أبعت جواب لحسن.

\_ يادي النيله ، بقى جايباني على ملا وشي

علشان تقولي أبعت جواب لحسن ، وده حتبعتيه

إزاي ياستي .

\_ مع السلوتي .

حلیمه ساخره

\_ والله أنت مش حتجيبها البر ، غير لما

تودينا في داهيه، سلوتي أيه ياستي

ده واد عبيط ومايتبلش في بقة فوله.

\_ ماهو جاب المنديل من حسن .

\_ من حسن ماشي ولكن منك حاجه تانيه

السلوتي مايطمنش .

\_ أنا كنت فرحانه وقلت حتشجعيني

جايه تكسري في مجاديفي .

\_ أنا خايفه عليك .

\_ متخافيش أنا عامله حسابي كويس .

بس أنت هاتيلي السلوتي من تحت طقاطيق الأرض.

\_ حجيبه وأمري لله ، أنا عارفه موتي حيكون على

إيديك ومش أنا وبس ، أنا وابويه وأمي واخواتي.

\_ بطلي خوف وتعالى فوق نكتبه الجواب.

\_ وأنا جعل أيه ، أنا لابقرا ولابكتب.

\_ كفايه إنك تكوني جنبي ، ياللا ابويه مش

هنا خرج بالفرسه، بينا نطلع فوق.

لواحظ تدخل من باب القصر وتصعد للدور الأول، حيث غرفتها

تسير خلفها حلیمه ، يدخلن الحجرة.

\_ طيب هو كتبك على منديل ، أنت حتكتبي له على أيه؟

\_ حكته على حته من جليبيتي، علشان يشم ريحتي

حشوف أحسن جليبه عندي لونها فاتح وأقطعها.

\_ ياخساره على الجاييه .

لواحظ تبحث في دولابها عن أفضل جليبه حتى تجدها ، حلیمه في ذهول  
 من تصرف لواحظ ، هي تعلم أن ملابسها غالية الثمن . ومن أجل كلمتين  
 تكتبهم لحسن تضحى بها. أمسكت بمرود من العاج وغرسته في المكحلة  
 الخاصة بها المحرمة غرست في وعاء صغير من الأحجار الكريمة .  
 \_ أكتب أيه يابت يا حلیمه.

\_ اكتبني له انك تعبتني وتعبتوا حلیمه معاكم.

لواحظ تبتسم

\_ سيبيني أكتب وأنت أسكتي خالص.

تكتب لواحظ

\_ بكتباك يا حسن على حته من جليبيتي ، عشان

نفسى يبقى معاك وريحتي ، أنا عايشه في الدنيا

عشانك وبيك ، وماليش رجا من ربنا غير أكون ليك.

مفيش قلب أحسن من قلبك يا حسن ، والختام سلام

من قلب ما بي عرف ينام.

حلیمه تصرخ

\_ يا وعدي ، أيه الكلام ده ، جبتيه منين .

\_ من جوه قلبي يا حلیمه.

- \_ منا ليه قلب وما بي عرفش حاجه .
- \_ لما تعشقي يا حلیمه ، حتلاقيه يقول لوحده .
- \_ ياميت ندامه ، أعشق مين ؟ خلف الملا ؟
- لوا حظ تضحك .

.....

في الدرب يسير الشيخ آدم بصحبة ابنه شحاته في الطريق لدكان سعد الخياط .

- \_ حنوصلوا ياواد يا شحاته لدكان سعد الخياط .
- تلاقيه خلص الجلبيتين وبعده نطلوا ع الجامع يادوب نلحق صلاة الظهر .

\_ ماشي يابا ، يارب يكون خلصهم  
علشان ألبس الجلبيه .

- \_ لا يابن عزيزه ، أنت حتقيس الجلابيه  
عند سعد ولو طلعت تمام، تشيلها حتى  
العيد يابن عزيزه ولا عاوز تغرمني جلبيه تاني .

لا مفتح ياواد زي أمك عزيزة.

الشيخ آدم يشم رائحة الطشه وهو يسير مع شحاته،فيتوقف ليستمتع  
براحتها وهي في الغالب شوربة يضاف عليها ثوم يتم تحميرة  
وتكون بصحبة دجاجة محمرة ،أما اللحوم فهي تُطبخ على زفر  
في برام كبير مملوء بالسمن والبصل ويقلبونه بيد يسمونها  
مُفراك يُنعمون به البصل ويُقلبونه وهي أكله في غاية الدسامة  
لا تتحملها معدة أهل المدينة.

\_ شامم ياواد ياشحاته رائحة الطشه، دي مسلوقه

مُعتبره ، ياترى طالعه من بيت مين الطشه دي.

\_إحنا قدام بيت الزغبي.

\_صحيح ياواد ياشحاته، ماهي الطشه دي

ماتطلعش من أي بيت وماتتاكل إلا عند جدك الزغبي.

## 36\_ حجرة ليله داخل دار اللزي

الكثير من الأسرار تكون مخبئة في سرايب الذكرى، هي تحاول  
أن تخفي الكثير من دمعات الوجع والشوق والألم، الضحكات تتوه  
من وجهها وتحاول القبض عليها ، تستدعي الخيال المهاجر بعيد  
تتوه بين الكيد وابواب الذكرى.تحدث نفسها.وقرينها يرد عليها

\_ أنت جيت ياسديري

\_ أيوه ياليله ، جاي هلكان وجعان

عاوز أكل لقمه من إيدك الحلوة.

\_ قبل ما أحضرك الغدا ، أقعد جنبي

هنا ، عاوزه أملي عيني منك، يوم

كامل ماشفتكش فيه ياسديري.

أنت طالع من الفجر وحشتني قوي.

\_ أنت مابتغيبش عني ياليله

وأنا ماسك الطوريه وأعزق في الأرض

وأنا بدور البداله وبسقى الزرع ، شايفك

قدامي .

....منيرة متجهة للزير لتشرب وأثناء عودتها بالقرب من حجرة ليله

تسمع صوت أيله ، فتقترب من الحجرة لتتصنت عليها.  
تتسحب على أطراف أصابعها حتى تلتصق بباب الحجرة.  
تسمع .

\_ مالك عرقان كده ، تعالى انشفلك وشك  
قرب عليه يابعد عمري.

...منيرة في دهشة والمفاجأة هزتها

\_ إخص عليك يالزي ، هي حصلت كده  
تفجري قبل ماتتجوزيه.

تتجه منيره ناحية جرتها.

\_ أعمل أيه ، أروح أفتح عليهم وأفضحهم.

بس لو عملت كده ، اللزي كان يقطع رقبتني.

.. تسمع منيره صوت اللزي ينادي عليها ، دهشه وحيرة تنتابها

صوت اللزي

\_ بت يامنيره.

تحدث نفسها

\_ فيه حد بينادي يامنيره.

اللزي بصوت أجش وعالى.

منيره تقتلها المفاجأة بعد أن تتبين أن هذا الصوت صوت اللزي .

\_ ده صوت أخويه اللزي ، امال يكون مين جوه

مش ممكن يكون لحق يطلع من عندها.

تتجه نحو حجرة أخيها اللزي وتفتح الباب وتدخل الحجرة، تجد اللزي

مستلقياً على فراشه بملابسه الداخلية ، سديري وسروال كبير

منيرة في دهشة وحيرة وتوتر ، مفاجأت غريبه وألغاز أمامها بلا حل.

\_ أيه يابت بنده عليك م الصبح ، مش سامعاني.

منيرة وهي لاتزال في ذهولها.

\_ أنت ماطلعتش من هنا ؟

\_ أيه يابت ، فيه أيه؟

\_ يعني أنت ماقتتش ولا رحت عند ليله؟

\_ لا ، انت اتخبلتي ، منا قدامك أهو لسه صاحي.

\_ تبقى هي بتتحدث مع مين ؟

\_ مين اللي بتتحدث مع مين ، حثرويشيني.

\_ ليله كانت بتكلم واحد في الأوضه ، وتقوله

تعالى أنشفلك وشك يابعد عمري.

\_ أيه الكلام الماسخ اللي بتقوليه ده؟

\_ أنا سمعت الكلام ده بوداني وأنا راичه

أملا السطل من الزير أشرب.

يقوم اللزي فزعاً من فراشه ويحمل بندقيته في يده ، يتجه بملابسه الداخلية

نحو حجرة ليله وخلفه منيره وهي تستعد للشماته في ليله.

.. ليله تستلقي على فراشها محدثه نفسها

\_ تعالى نام جنبي يا حبيبي وارتاح ، أنت شقيان طول النهار.

تُغمض ليله عينيها، اللزي يندفع نحو حجرتها ، يفتح الباب ويدخل غاضباً

وخلفه منيره ، يجد ليله نائمة ، يصوب البندقيه ناحيتها وهو يشدها ، تقوم ليله مفزوعه.

\_ فيه أيه ؟

اللزي بغضب

\_ بتعملي أيه ؟

\_ أعمل أيه ، أنت مش دخلت لقيتتي

مخموده ونايمه.

\_ نايمه من ميته ؟

\_ من بدري .

منيره

- \_ كدابه ، كنت صاحيه دلوقتي وكنت بتتحدثتي مع حد.
- \_ أتحدث مع مين ياحسره، ومين حيقدر يدخل يتحدث معاي.
- اللزّي يعود إليه الهدوء.
- \_ بصحيح ، مين يستجري يدخل هنا.
- يلتفت لمنيره
- \_ باين عليك اتخبلتي ، ليه حساب معاك.
- يلتفت نحو ليله
- \_ معلش ياليله ، امسحي فيه الغلظه دي
- تقعدي بالعافيه .
- ينظر اللزّي بإحتقار لمنيره وهو يخرج من الحجرة وتتبعه منيرة
- منكسرة وهي تنظر لليله بغیظ وليله تبتسم في شماته، يعود اللزّي
- لفراشه ، يستلقي على سريره.
- \_ أعمل أيه تاني أكثر من اللي بعمله معاك ياليله
- أجيب أبوكي وأخوكي من فين ؟ ياريت أقدر أجيبهم.

منازع يسير متخفياً قاصداً دار اللزي يحمل بندقيته في يده ، يصل باب  
الدار، يجد بكر يقوم بغفارة الدار ، بكر ترتعد فرائصه عندما يرى منازع  
\_ اللزي جوه ياد.

بكر وهو يرتعش

\_ أيوه جوه، دخل الدار من بدري ، أخطبك عليه؟

\_ أنا اللي حخط عليه ، وغور أنت بعيد.

بكر وهو يرتعش ويتلعثم

\_ لازم أنا أديله خبر، عشان مايضرنيش.

منازع بغضب

\_ قولتك غور أنت .

منازع يطرق الباب

.....

اللزي يقوم من على فراشه مُنز عجاً.

\_ يوه ، الواحد مايعرفش يرتاح شويه .

يخرج من غرفته ويتجه نحو الباب ، لايزال منازع يطرق على الباب

اللزّي يصرخ بصوت عالِي

\_ طيب ياللي بتخبط.

يفتح اللزّي الباب فيجد منازع أمامه.

\_ منازع !

\_ طيب سيبنِي أدخل .

\_ اتفضل يامنازع ، ماهو الخبط ده مايكُنش وراه غيرك.

\_ كويس إنك لسه فاكِر خبطتي.

يتجه اللزّي بمنازع إلى الداخل حتى يصلان غرفة الجلوس. يرحب

اللزّي بمنازع الذي يجلس .

\_ بيتك ومطرك يا منازع ، حروح ألبس جلابيه وأجيك.

\_ مالوش لزوم ، أنا مش غريب.

\_ مرتاح في المغاره.

\_ واخذ على كده ، جعفر وهارون عاملين أيه..؟

\_ كويسين وكانوا معاه الصبح عند نخلات مُصبح

\_ وأيه اللي خلى جعفر يروح هناك .

\_ سعل علينا ، قالوله أني وهارون هناك.

\_ يبقى بتفكروا في مصيبه؟

\_ هي من ناحية مصيبة ، هي مصيبه

ومصيبه كبيره كمان على

أهل البلد .

\_ مصيبة ايه دي ؟

\_ جعفر حيقسم الأرض ويبيعها كلها للأشراف

\_ عمل خير ، بلا أرض بلا نيله.

\_ معاك حق تقول كده ، ماأنت بعت خمس فدادين

بوكلة مفروكه (هي عجينه يتم عجنها والدبدة فوقها

حتى تُصبح فطيرة ولكن بسمك أكبر من ثلاثة لخمسة سم

يتم وضعها على النار دقائق قليلة قبل أن تبدأ الدخول في الحَمَار

ثم يتم تقطيعها باليد لقطع صغيرة ويتم فركها بكمية كبيرة من السمن

البلدي ، ثم يتناولونها بالجبنة القديمة أو العسل الأسود)

\_ يعني الخمس فدادين كانوا أرضي ، قولي ايه

أخبارك ؟ وموضوع ليله اللي سمعته ، هي

لسه معصلجه معاك .

\_ حتى أنت عرفت حكاية ليله يامنار ع.

\_ هو فيه حاجه في البلد دي بتستخبي.

\_ تابعه قلبي يامنار ع ، بس حنت شويه دلوقت.

\_ حنت ؟ حنت إزاي ؟

\_ وافقت على الجواز ، بس بعد موافقة أبوها وأخوها.

\_ تبقى ساهله خالص ، مش حيقدرُوا يقولوا لا .

\_ وهما فين ، دول قاعدين مع حسن ، وحسن  
مش عارف أعتز فيه.

\_ حسن أنا حجيبك قراره ، يعني لو

خلصنا من حسن يبقى أحسن.

\_ حنتبقى كل حاجه اتسهلت وسهل امسك الحمداني

وابنه وانت كمان يامنار ع لو عتزت فيهم قولي.

\_ أيه حتخلص عليهم.

\_ لا ، دول مايتخفش منهم، أرجعهم البلد واتجوز ليله.

منار ع يهم بالوقوف للخروج والعودة للجبل.

\_ مالمسه بدري.

\_ بدري من عمرك ، حروح أريح شويه

والصبح حقلب الجبل على حسن .

\_ ياريت تيجيني بخبره.

\_ حجيبك خبره وماتستعجلش، بس أعتز فيه.

اللزى ساخراً

\_ أبقى خلى بالك من الديابه؟

منازع يضحك ببرود

\_ قولهم بس هما يخلوا بالهم منى ، تقعد بالعافية

\_ الله يعافيك.

يخرج مناوع ويبدأ رحلة العودة إلى الجبل، يسير عبر الدرب قاصداً  
الجبل ، الكلاب لا تكف عن النباح عليه طوال الطريق ،حتى ترك الدرب  
وبدأ السير في طريق الصحراء.

.....

في الجبل أمام الخيمة

في كل ليلة ، خصوصية عذبة يُحبها حسن ، يجمع شتات قلبه المُثقل بحب

عُذري، يعاني من فوبيا البُعاد ، الوجد يسكن قلبه ولا يستكين ، يُنصت لذاكرة

الحنين المملوؤة بصخب الذكرى، هو مجبور على التناغم مع الليل ، والعزف

على أوتاره ، يجلس حسن بصحبة حمدان ومرسال.

حمدان

\_ مش حتقوم تريحلك شويه ياحسن.

\_ لا ، أدخل أنت ريح وخذ مرسال أحسن باين عليه تعبان.

وَأنا حقد استنى منازع.

\_ أدخل أنت وأنا حستناه.

\_ عاوز اقعد مع نفسي شويه ، ادخلوا أنتم.

مرسال

\_ مش عاوز مننا حاجه .

\_ لا ادخلوا ربحوا

يدخل حمدان وخلفه مرسال الخيمة ويبقى حسن في وحدته يفكر في لواحظ ويحدث نفسه .

\_ آه يالواحظ ، لو أطول أخذك وأبعد بعيد.

يلوم نفسه.

\_ تروح فين ياحسن والناس الغلابه دول

حتسيبهم لمين ، دول حطوا كل أملهم عليك

آه ياحسن إتكتب عليك الوجع على كل حته من جنتك.

قطع تفكير حسن وصول منازع ، الذي يبدو عليه التعب

جلس بجوار حسن .

- \_ اتعوقت عليك مش كده.
- \_ أنا قاعد مستنيك ، حمدالله بسلامتك.
- \_ الله يسلمك من كل ردي.
- \_ أيه ؟ البلد أخبارها أيه ؟
- \_ البلد حالها ملخبط وربنا يستر.
- \_ ليه ؟ فيه أيه ؟
- \_ جعفر ناوي يقسم كل الأرض ويقطعها  
حتت ويبيعها للأشراف .
- \_ دي مصيبه .
- \_ مصيبه كبيره، أهل البلد يروحوا فين .
- \_ دول مالهمش في حاجه غير الفلاحه والزراعه.
- \_ كمان اللي حيشترى مش محتاجهم، عنده ناسه  
وأهل بلده .
- \_ يعني كده بيضيعوا على أهل البلد ويبسدوا  
آخر منفس ليهم ، دول حيموتوا من الجوع  
\_ أيوه ، ربنا يستر.
- \_ ماسمعتش يامنازع حاجه عن ليله.

\_ أنا رُحت دار اللزي علشان كده، بيقول كويسه  
وبدت تحن عليه وتعامله كويس ، وبيقول هي  
وافقت على الزواج ، بس شارطه إن أبوها وأخوها  
كمان يوافقوا.

\_ اللزي قلق كده.

\_ أيوه

\_ طيب قوم ربحك شويه تلاقك تعبان .

## 36\_ صلوات باكية

نحتاج أن نفر إلى الله، حين تتن النفس ، وينزف القلب من جراء ألم  
تُخلفه قسوة الأيام ، وترمينا بدموع، نخاطب من خلالها الزمن فلا يُجيب  
تنسابُ من مُقلنا حتى تَخرقُ القلب بوجع يمتزج بأوردته وشرابينه،حتى  
نشعر بضيق رحلة الحياة ونرى أشباح الموت تتخطفنا .

صباح يوم الأحد ، أرمنيوس يركب حماره وخلفه يشعه في الطريق  
للصلاة في الدير الموجود بمنطقة تُسمى عرب الدير وهي على بُعد  
حوالي خمسة كيلو مترات من الحاجر يمر الطريق بنزلة الحامديه  
ونزلة الحرادنه ، ثم بعد مايقرب من انتيل ميل عرب الدير  
\_ مش كنت رحى وحدي يايشعه.

\_ محتاجه أصلي يابا ، بقالي كثير مارحتش الدير.

\_ كنت تقعدى مع اختك مريم ، بدل ماسايبيها لوحديها.

\_ مريم راجل يابا وهي لما شافتنى عاوزه أصلي قالت ماشي

روحي صلي أنت المره دي ، وأنا حروح المره اللي جايه.

... وصل أرمنيوس كوبري خشبي من جذوع النخيل أعلى الترة

يربط بين البلدة والجسر ، يسمونه الفلقه ، وهي مشتقه من كلمة فلق

وهي جذوع نخيل مفلوقة إلى نصفين ، ما إن بدأ أرمنيوس بالإنحراف

بحماره علي يسار الجسر ، حتى قطع طريقه هارون.

\_ على فين يامقدس؟

\_ النهارده الأحد رايح الدير أصلي ، بلاش دي كمان.

\_ تكونوا هنا قبل المغرب ، لو بعده ماتجوش أحسن.

يشعه معترضه

\_ وأنت مالك بينا ، نيجوا براحتنا ، نيجوا المغرب

ولا نقعد لليل مالکش دعوه.

ارمنيوس

\_ إستني أنت ياشعه .

يلتفت لهارون .

\_ ماشي ياهارون ، حنرجع قبل المغرب.

\_ أنت حتمشي كلامه يابا.

هارون بحدّة

\_ لمي لسانك يابت .

يلتفت نحو ارمنيوس

\_ روح ياخويا وزى ماقولتك.

بيدأ ارمنيوس السير على الجسر ويشعه لم يعجبها ماحدث.

\_ ماكنش لازم توطيله كده يابا.

\_ مش مستاهله يابنتي ، احنا رايعيين وحنرجع

قبل المغرب ، حنعملنا حكايه ليه ؟

.....

صعب أن لا نستوعب مايحيط بنا من مشاكل، ويصير السقوط متكرراً  
في حياتنا ، نشعر بثقل الحياة ،تُنْهَك قوانا وتُطرنا بالخيبات تزداد وتتسع  
وتتوحش يوماً بعد يوم ، يجب أن نكون في حذر وترقُب ولا نترك أنفسنا  
عُرْضة للريح .

..داخل المغارة في دائرة خُماسية يجلس حسن ومنازع والحمداني وحمدان  
ومرسال .

حسن يلتفت للحمداني.

\_ شُفْت جعفر ناوي على أيه ياعم حمداني ؟

\_ خير يابني .

حسن يلتفت نحو منازع

\_ قولهم يامنازع .

\_ جعفر حيقسم كل الأرض ويقطعها حتت  
وحبييعها للأشراف .

حمدان بغضب

\_ وأهل البلد يروحوا فين ؟

\_ يتولاهم ربنا .

حمدان

\_ لا كده اللي بيحصل كثير قوي

ومايتسكتش عليه .

حسن

\_ مش حُنسكت ياحمدان ، ولازم نفكر بالراحه

وحنلاقي حل إن شاء الله.

مرسال

\_ جعفر كده بينتقم من أهل البلد كلهم

ماتيخوا نخلصوا عليه ونرتاح.

يلتقت إليه حسن

\_ إحنا ماينقتلش حد يامرسال .

\_ واشمعنى هو بيقتل في الناس، ورجالته

السبب في موت أبويه وموت أمي بقهرتها عليه.

\_ أبوك ما انتقلش يامر سال.

\_ لكن هم سبب موته ، هو راجل كبير ومش حمل بهدله.

الحمداني

\_ إهدا يامر سال يابني ، خلينا نفكر بالراحه.

يلتفت الحمداني نحو منازع.

\_ ماسمعتش حاجه عن ليله بنتي يامنازع؟

\_ ليله بخير ياحمداني ، واللزي بيعاملها كويس

وخصوصاً بعد ما وافقت ع الجواز ، بس

اشترطت توافق أنت وحمدان .

حمدان

\_ ده بُعد ، لو شاف حلمة ودنه، وبعدين

هي ازاي تقوله موافقه .

حسن

\_ وهي حتقدر تعمل ايه ياحمدان

ليله بتحاول تمشي أمورها.

منازع

\_ ولو وافقتم اللزي حيرجعكم البلد وكمان  
حيديكم دار بدل من اللي إتحرقت.

حسن يلتفت لحمداني

\_ بقولك أيه ياعم حمداني؟

\_ قول ياحسن ياابني؟

\_ اسمعنى كويس ، أنت ممكن ترجع البلد

أنت وحمدان ، واللزي كده مش حيضركم

وبالعكس حيفرج برجو عكم، هو كان عاوز

ليله ، وليله تحت إيده ، ولو وافقتم على

الجواز ، حتعيشوا مرتاحين .

منازع

\_ ايوه صح ، هو قال كده.

حمدان معترضاً على كلام حسن.

\_ أنت بتقول أيه ياحسن ! بلد أيه اللي نرجعها؟

\_ أنا بتكلم عشانكم ياعمي ، وعلشان راحتكم

وبهدلتكم هنا ، أنا مش بتخلى عنكم ، بفكر  
فيكم مش في نفسي.

الحمداني

\_ إن كنا إحنا تعبنا وأحنا أصحاب المشكلة  
أنت تبقى أيه ياللي تعبت معانا ومالكش في  
التور ولا الطحين ووقفت جنبينا برجوله  
ومن غير مصلحه.

منازع

\_ كلام الحمداني صح ياحسن ، اللي اتعمل  
في الحمداني وأهله مش شويه ، وعاجبني  
كلام حمدان .

حمدان

\_ حسن إحنا على الخير والشر مع بعض  
ده آخر الكلام عندي .

حسن يلتفت لمنازع

\_ ركز معاه يامنازع ، الحمل اللي جاي  
حبيقي ثقيل أوي عليك .

\_ وأنا قدها وقدود وماتعولش هم يا حسن .  
 \_ أنت حتنزلهم كثير ، وتخليك وراهم ، عاوزين  
 نعرف كل حاجه عن الأرض ومين حشترها  
 من الأشراف وامتى حيجي يشتري .  
 \_ دي ساهله خالص .  
 \_ سيب الباقي على الله وعليه .

.....

عندما يخشع القلب لله ويزرف الدموع فرحاً وتضرعاً، يشعر  
 براحه وطمأنينه فانه أقرب إليه من روحه ، من أنفاسه  
 دمعة خشية الله خفيفة وجميلة تختلف عن أي دمعة، تنساب  
 بروحانية ، تحتوي كل الهم ، كل الوجع ، تُضمد الجراح  
 هي أعظم دمعة .  
 ... أرمنيوس يصل بحمارته إلى الدير ، ينزل من الحماره  
 ويقوم بإنزل يشعه، يقوم بربط الحماره بقدميها الأماميتين .  
 \_ بينا يابنتي .

دير كبير مبني بالطوب اللبن ، يُحيطُ به سور بارتفاع صغير لا يتعدى المتر ونصف ، هو ومريم يؤديان صلاة التلث ويتجهان إلى داخل الدير، جاوزا الممر ، دخلا من الباب، هو باب خشبي كبير أعلاه صليب ، له مزلاج ضخم، يوجد فوق السطح عمود خشبي معلق عليه جرس الكنيسة ، داخل الدير قاعة كبيرة ، تُزينها الصلبان من كل جانب وصور كثيرة ، معلقة على جدران القاعة مقاعد عبارة عن مدادات خشبية كبيرة بقدر مساحة الصلاة ، تواجه مصطبة كبيرة يقيم عليها القسيس صلواته وترانيمه ، يدخل ارمنيوس وخلفه يشعه ، يصلبان على صدرهما، القس يجلس على المصطبة وصلوا إلى مصطبة القس من خلال ممر بين المدادات الخشبية قَبْلَ ارمنيوس يد القس وصلب على صدره وتبعته يشعه، قام أرمنيوس ومعه يشعه بأداء الصلاة والقس يتابعهما ، إنتهيا من الصلاة .

القس لأرمنيوس

\_ مالك يابني حزين ، وكأنك تحمل كل هموم العالم .

\_ الأيام بقت مابتزحمش ياأبونا، حبستنا في سكه ضلمه

حجبت عننا نور الشمس ، حتى الهواء أتملا تراب

وعفر وشوشنا .

.

وَقَالَ الرَّبُّ: «سَمِعَانُ سَمِعَانُ هُوَذَا الشَّيْطَانُ طَلَبَكُمْ لِكِي يُغَرِّبَكُمْ

كَالْحِنطَةِ! وَلَكِنِّي طَلَبْتُ مِنْ أَجْلِكَ لِكِي لَا يَفْنَى إِيمَانُكَ. وَأَنْتَ مَتَى

لوقا 22: 31، 32 - «رَجَعْتَ تَبَّتْ إِخْوَتَاكَ

الحياه مرها أكثر من حلوها ، كثير بتبكيينا وقليل

بتفرحنا ، بتاخذ مننا وتبخل تدينا.

وَأَمَّا أَنْتَ فَمَتَى صَلَّيْتَ فَأَدْخُلْ إِلَى مِخْدَعِكَ وَأَغْلِقْ بَابَكَ وَصَلِّ إِلَى

أَبِيكَ الَّذِي فِي الْخَفَاءِ. فَأَبُوكَ الَّذِي يَرَى فِي الْخَفَاءِ يُجَازِيكَ عَلَانِيَةً.

وَحِينَمَا تُصَلُّونَ لَا تُكْرِّرُوا الْكَلَامَ بَاطِلًا كَالْأُمَّمَ فَإِنَّهُمْ يَظُنُّونَ أَنَّهُ بِكَثْرَةِ

متى 6: 6، 7 - كَلَامِهِمْ يُسْتَجَابُ لَهُمْ

يابني إن الحج إلى هيكل سليمان ، يمكنه غسل

الخطايا ، ولكن لا يشفي القلب المملوء بالخطايا

إن الرب لا يهتمه صيامنا ولا صلاتنا ، إن الرب  
يُحب أن نُؤمن جميعاً، لنصبر على الحياة الدنيوية  
لنعيش الحياه الأبدية .

- \_ قُم صلي لربك وأدعوه ليستجيب لك وليخفف عنك.  
يقوم ارمنيوس ويشعه بالصلوات لوقت كبير ، ثم ينتهيان.  
\_ حاسس أني ارتحت شويه يابنتي.  
\_ وانا كمان يابا حاسه أني غسلت كل الوجع اللي جوايه.  
\_ بينا نرجع يابنتي ، يادوب نوصل قبل ماتُغرب الشمس.

.....

جميل أن يكون لك إنسان أنت نبضه وهو نبضك ،ينشغل بك ، يخاف عليك

يُشعرك بقيمة الحياة، يرداك حتى ولو من بعيد ، يُحسن الظن بك ، يراك

غير كل البشر، يغفر لك إن أخطأت ، يلتمس العذر إن أسأت إليه،الحب دنيا بلا كراهية ، تتوحد فيها القلوب والأرواح والعقول.

...لواظ بصحبة حليمه في حديقة القصر ، مُنذ أن فكرت في إرسال خطاب

لحسن وهي لم تهدأ ، كتبت الخطاب وتنتظر من يحمله ، لا يوجد أمامها

سوى السلوتي وتمنت لو إنطلقت وسط الدروب وكل مكان بحثاً عنه، المكان

المفضل للسلوتي عند الطاحونة ، يحرس الحمير ويساعد في رفع شوال

الدقيق على الحمار كمساعدة يجد من وراءها بارة أو يجري مستقبلاً

الآتي بحمل الغلال في أشولة يسمونها تليس ويساعده في نقل الغلال إلى

الداخل وهذا العمل يقوم به رجل يسمى محمد رزق ، قصير القامة، صاحب

بدن سمين وعينان لا يتلاقيان أبداً بحوله واضحه ، محمد رزق ولو أنه يضيق

من السلوتي من مشاركته في رزقه ،إلا أنه يحتاجه عندما يكون هناك زحام

فهو حارس جيد للحمير. الطاحونة من الداخل عبارة عن قمعان كبيران

نُصب فيهما الغلال ،مرتكزتان على حجرين من الصوان يدوران أسفل

القمعين وهناك فتحة ينزل منها الدقيق مثبت عليها نفس شوال القمح الذي تم

سكبه في القمع ، يعود هذا الشوال لفتحة الدقيق يستقبل الغلال المطحونة

يعمل في الطاحونة ثلاثة أفراد من الداخل ، أحدهما يصُب الغلال في القمعين  
والآخر يستقبل الدقيق والثالث يراقب ماكينة تشغيل الطاحونة وتزيتها  
أما محمد رزق شيال الطاحونة ، فرزقه على مايهبه الطاحن.

\_ لسه مش لاقية السلوتي يا حليمه .

\_ ياستي السلوتي عامل زي الهوا ماتعرفيش تمسكيه.

\_ معلش عشان خاطري يا حليمه.

\_ أنا عارفه أجلي سيكون عليك، حروح ع الطاحونه ، النهاردة

الطاحونه زحمه وممكن ألاقية هناك ، هو بيحب الحمير والنهارده  
عيده .

\_ روعي بُصي عليه ولو لقتيه ، هاتيه وتعالى.

حليمة ساخرة

\_ أجي ، أجي فين ؟ أنا لو لقتيه حبعتهولك وارجع بيتنا.

\_ ماشي ياخوافه.

\_ حروح على هناك دلوقت وأمرى لله .

تخرج حلیمه مسرعة فيوقفها مهران غفير الدار بتطفل ، محاولاً  
معاكستها.

\_ لسه بدري يا حلیمه .

\_ بدري من عمرك ياخويه.

يقرب منها وينظر لها نظرات إعجاب.

\_ فيه أيه ياواد ؟

\_ أنا باتحدث معاك يابت .

\_ وتتحدث معاه ليه ، كنت من بقية أهلي.

\_ ياريت نبقوا أهل ونلم زيتنا في دقيقنا.

حليمه لا تثق في نوايا مهران ، هو لا يريد زواج ويبحث عن علاقة

وهو يستضعفها وتعلم العادات والتقاليد وأنها إبنة طواب وهي

مهنة مصنفة من العبودية وإستحالة أن يفكر فيها كزوجة.

تحدثه بعنف.

\_ بقولك أيه ، مش ناقصاك ، ولم روحك ولا عاوزني

أدخل أقول للست لواحظ إنك بتغتت عليه كل ماباجي.

\_ لا ، على أيه ،روحي يابت شوفي حالك.

ربنا يوقف حالك .

حليمه غاضبة .

\_ يوقف حالك أنت وأهلك يابعيد، مش فاضياالك

ياغراب البين .

.....

هناك قلوب بروح الملائكة، ألوانها لون الأشجار، أحلامها بصفاء  
 السماء ، قلوبها بنقاء الماء، خيالها بإتساع الكون والفضاء، لا يصافحون  
 خنجر الغدر ، وهناك قلوب ترعرعت في حجر الشيطان ، قلوب بلون  
 الجحيم ، لاترى سوى في الظلام ، وبصرها يخشى ضوء النهار.  
 ... أسفل الجميزة يجلس عبدالمتجلي الحلاق وأمامه بكر أحد رجال  
 اللزي ، يقوم بالحلاقة لبكر .

\_ ماتشيلها بالموس وتريجني يامجلي ( يختصر عبد المتجلي)

\_ انت وراك حاجه .

\_ خلصني ، اللزي زمانه صحى وحيجي

علشان نلحقوا جناب الملتزم وهارون في الأبعادية.

\_ ومن امتى جناب الملتزم بينزل ويروح الأبعادية

أول مره يروح هناك .

\_ ماهو حيقسم الأرض ، علشان يبيعهها.

\_ أنهى أرض ، أرض الأبعادية .

\_ لا حيبيع كل الأرض مش الابعادية بس.

\_ والناس اللي بتزرع حيروحووا فين ؟

\_ يروحوا مطرح ما يروحوا ، أو عى تجيب

سيرة بالكلام ده لحد ، والله أقطع خبرك .

\_ وأنا أقدر أجيب سيره .

ينتهي عبدالمتجلي من الحلاقة وينتفض بكر ويمشي حتى دون أن يشكره .

.....

عند الطاحونة

مثل السوق ، أوناس تدخل حاملة الغلال وآخرون يخرجون بحميرهم  
محملة بأشولة الدقيق ، السلوتي يلهو داخل حوش الحمير ، سمح له محمد  
رزق بالعودة بعد أن تعهد أن لا يعود لفعلة الشنعاء الشاذة مع إحدى  
الحمير وكان محمد رزق قد ضبطه وهو يرتكب هذا الفعل الشاذ وأشبعه  
ضرباً ، لكن منذ أن عفا عليه وسمح له بالعودة لم يفكر في ارتكاب  
هذا الفعل الشاذ .

... تصل حلیمه للطاحونة وتقترب من محمد رزق وهو يرفع  
شوال دقيق ويضعه على الحماره ، الجو ملبد بغباء أبيض كثيف  
يخرج من داخل الطاحونة ، حلیمه لمحمد رزق .

\_ ماشفتش الواد السلوتي يارزق .

\_ أيه مايكنش سرق حمارتكم.

\_ السلوتي مابيسرقش يارزق ، ماتعرفش هو فين ؟

\_ حتلاقيه مرزوع جوه في حوش الحمير.

أنت عاوزاه في أيه ؟

\_ وأنت مالك أنت .

تتجه حلیمه نحو حوش الحمير وتجد السلوتي يتحدث معها.

\_ أنت هنا يا حزين وأنا بدور عليك.

\_ أيه يابت يا حلیمه ، عاوزه مني أيه؟

حلیمه ساخرة

\_ وأنا حعوزك في أيه يافقري.

الست لواحظ هي اللي عاوزاك.

الفرحه تغطي وجه السلوتي عندما سمع بلواحظ

\_ عاوزاني بجد.

\_ أيوه .

\_ حاخذ الحماره واروح.

\_ لا اجري وشوفها الأول وأهي حمارتك مربوطه هنا.

\_ ماشي

ينطلق السلوتي مسرعاً نحو قصر جعفر وتخرج خلفه حلیمه من الحوش.

## 37\_ الأبعادية

لأهل الشر طقوس غريبة ، ملونة بالدم ، إعتادوا اللعب مع الشيطان  
والشيطان يزين لهم كل ألعاب الشر حتى أدمنوها ، يكررون الأخطاء  
ولا يعبأون ، يدوسون الضمير ، وقلوبهم عنه غافلون.

.. داخل جنينة جعفر على طريق الأبعادية ، هارون وجعفر تحت ظل أشجار

الجنينة .

\_ بقالك كثير ماجتش الجنينه.

\_ من زمان يهارون ، خلينا في المهم

أنت عملت أيه ؟

\_ كله تمام جنابك ، قسمت الحيازه كلها لعشر

حتت ، كل حته فيهم مية فدان .

\_ يعني كل حته مية فدان ؟

\_ أيوه والعشر حتت هم الأبعاديه والزنقور

والظهورات ،والخور وعون والجرف والكره

والعبله والفراسيه والكتكاته.

\_ عفارم عليك ياهارون ، أنت كده فهمت  
أنا علوز أيه .

\_ حروح بكره ساقلته وأعرضها على ملتزم الأشراف  
واللي يجي يشتري ، إحنا مستنيين.  
يدخل اللزي وخلفه بكر

\_ اتعوقت عليكم ، مش كده ؟  
جعفر

\_ هو أنت فاضيلنا يالزي .

\_ قستوا الأرض ؟

هارون

\_ وقسمناها كمان وخلصنا يالزي .

.....

في الجبل

حسن يحب أن يمسك بالبدايات ، يرفض النهايات المرعبة والتي  
تأتي محملة بالمفاجآت ، يتحايل على الواقع بحلم مُمسك بإرادة  
حديدية ، حسن واقفاً مع منازع أسفل تبة الجبل .

\_ أنا حنزل البلد يا حسن ، حشوف جعفر  
عمل أيه في قسمة الأرض، علشان النهاردة  
نزلوا يقيسوها .

\_ أيوه خليك متابع موضوع الأرض كويس  
دي أهم حاجه ، تعرف مين حيشتري  
وامتى حيشتري ، فاهم يامنارع.

\_ حقولك كل حاجه ، وأنا عارف مين  
يقدر يشتري الأرض .

\_ تفنكر مين يامنارع.

\_ مايقدرش على حيازه كبيره زي  
دي غير واحد زي معتصم.

\_ مين معتصم ده ؟

\_ راجل غني من أشراف ساقلته وإخميم.

وهو بيحب يلم الحيازات ، شكلك ناوي.

على نية كبيره ، مش كده يا حسن .

\_ كده يامنارع ، حاخذ حقي وظلمي بحكم ظالم وأخذ بحق

بحق أرمنيوس وسديري ورحان وحق كل أهل البلد.

.....

أمام الجامع

وقت خروج المُصلين من صلاة العصر ، يقف عبدالمتجلي  
 أمام باب المسجد منتظراً الشيخ آدم، خرج كل المصلين  
 وهم ينظرون بتعجب لعبدالمتجلي الذي لم يكن معهم في  
 صلاة الجماعة، الشيخ آدم وبصحبه ابنه شحاته يخرجان  
 من المسجد فيستوقفهما عبدالمتجلي الحلاق الأخنف.  
 \_ حرماً يا شيخ آدم .

\_ ده صوت عبدالمتجلي ، مش كده يا شحاته؟

\_ أيوه بابا .

\_ جمعاً يا عبدالمتجلي ، أوعى تقولي

كنت بتصلي معانا.

\_ الجمعة اللي جايه حصلي.

\_ طول عمرك بتقول كده

الظاهر إن جمعتك مابتجيش يا عبدالمتجلي

فكرتني بمحمود برطوعه لما دخل يصلي

وظلع مالقيش حمارته وحلف مايصلي تاني.

\_ يا عم سيبك من محمود عثمان

أنا جايلك في حاجه مهمه قوي.

\_ قول يا عبد المتجلي.

\_ طيب احلف بحياة الشيخ عبدالحميد

انك اللي حقوله حيكون سر.

\_ انا مش بحلف غير بالله يا جاهل

مش ببركة الشيخ عبدالحميد

وكمان ، مش حلف ، عاوز تقول

قول ، لو مش عاوز بلاش.

\_ طيب حقول ، وكأني ما قولتش حاجه

ما تجبش سيرتي.

\_ قول يا جبان .

\_ أنا الصبح عند الجميزة اللي عند بيتك

كنت بزير الواد بكر ، وعرفت منه إن

جعفر حيقطع كل الأرض اللي في الزمام

بتاعه ويبيعهها .

المفاجأة هزت الشيخ آدم

- \_ حبيبع كل الأرض اللي في زمام الحاجر كلها.
- \_ أيوه ،وقلي حقطع رقبتك لو تجيب سيره لحد.
- \_ طيب وأهل البلد يروحوا فين ، دول عايشين
- \_ عليها وراضيين بالفئات، حيروحوا يقشروا بصل.
- \_ قلت له كده ، قلي يروحوا مطرح مايروحوا.
- \_ يالها من بلده مُتقلبه كأمواج البحر.
- \_ والنبي بلاش كلامك المكلع ده.
- \_ دي كارثة وحلت ع البلد ، وديني
- \_ على بيت المقدس ياواد ياشحاته.
- \_ وهو حيعمل أيه يعني؟
- \_ حتحدث معاه ، يمكن نلاقي حل
- \_ للمصيبة اللي حلت على البلد دي.

.....

السلوتي يجري بسرعة داخل الدرب ، لا يعبأ بنباح الكلاب ولا مطاراداتها  
وصل لقصر جعفر ، حاول أن يدخل وكالعادة مهران منعه.

\_ رايح فين ياواد ياسلوتي ؟

\_ لواظ عاوزاني.

مهران ساخراً

\_ الست لواظ ، عاوزاك أنت !

.....

لواظ تقف في شرفة المنزل، ترى السلوتي واقفاً مع مهران، تغمرها  
السعادة وتنادي على مهران .

\_ سييه يامهران يدخل ، أنا نازلالك ياسلوتي.

... لواظ تنزل مسرعة وسرعان ماتعود فقد نسيت قطعة القماش  
أمسكتها وضمتها إلى صدرها ونزلت بها مسرعة ، قلبها نبضاته  
تطير فرحاً .

.....

.. في نفس اللحظة ، منيرة تخرج من دارها ، محدثة الغفير طلب

\_ لوجه أخويه ، قول له أني رحت أشوف لواحظ.

\_ ماشي ياست منيره .

\_ وفتح عنيك كويس ياواد، مفيش حد مننا جوه.

\_ ماحدث يقدر يهوب هنا ، طول ماطلب موجود.

منيره ساخرة

\_ ماهوبوا قبل كده ، ودخلوا كمان ، ماتعمليش فيها سبع.

تنظر منيرة بسخرية لطلب ، ثم تكمل طريقها لقصر جعفر.

.....

لواحظ تخرج من الباب وتسير عبر ممر الحديقة حتى باب القصر

تجد السلوتي واقفاً بجوار مهران .

\_ ادخل ياسلوتي.

السلوتي يدخل وهو ينظر بتعالي وشماته للغفير مهران.

\_ حتديني حاجه حلوه .

تُخرج لواحظ من جيبها ثلاث قطع خَلْعة وهي حلوى مصنوعة

من العسل الأسود ، تشبه إلى حد كبير حجر الشيشة، لونها بني غامق  
تنتشر بكثرة في الصعيد وقت حصاد القمح، السلوتي يفرح بقطع  
الْخَلْغَة .

\_ الله ، الخلعه دي للسلوتي.

\_ أيوه ياسلوتي.

.....

منيره تسير عبر الدرب ، تجد الكراهية في نظرات من يقابلها  
من نساء البلدة وهي تفسر تلك الكراهية على أنها حسد وغيره  
منها و خوف من أخيها، فتقابل نظرات الإستهجان منهم بنظرات  
كِبْر و تَعَالِي و غَطْرَسَة، تصل لدار جعفر.

\_ الست لواحظ صحيت ياواد يامهران ؟

\_ من بدري ، لسه الواد سلوتي داخل ليها دلوقت.

... علت الدهشة وجه منيرة ، من وجود السلوتي ودخوله الدار. تُحدث نفسها

\_ السلوتي بيعمل أيه جوه مع لواحظ.

تدخل منيره إلى داخل الممر، تبحث في الحديقة عن لواظ، تلمحها  
من بعيد ، تتسلل حتى تقترب منها ، توارت خلف إحدى الأشجار  
ترى لواظ والسلوتي بوضوح، تستمع لحديثهم.

لواظ

\_ أنا عاوزاك تروح لحسن ياسلوتي.

....منيرة أذهلتها المفاجأة ومعرفة لواظ لحسن ، راحت تسترق السمع  
بشكل أوضح.

السلوتي

\_ ماشي أروح لحسن ، أنا بحب حسن قوي.

\_ أنا عاوزاك تديله دي .

تُخرج قطعة القماش من جيبها وتعطيها للسلوتي ، الذي يضعها  
في جيبه .

السلوتي

\_ أنت بتبعته منديل زي ما هو بعثلك صح.

\_ أيوه صح ياسلوتي.

... المفاجآت تنزل على منيرة كالصاعقة، ذهول ودهشة، تحدث نفسها  
\_ بقى حسن بيبعتلها وهي بتبعته، دي الحكايه، باينها كبيره.

لواحظ للسلوتي

\_ حنروح لحسن امتى؟

\_ حطير دلوقت عليه.

يتجه السلوتي نحو الباب وتتابعه لواحظ وهي في غاية الفرح والسعادة ، خرج السلوتي من الباب ، الفرحة لا تسعها ، تشعر أنها تطير وتحلق في الفضاء ، لاتدري أن هناك حية رقطاع رصدت ماحدث بينها وبين السلوتي ،لواحظ إتجهت نحو باب الدار وانتظرتها منيرة حتى دخلت وإختفت، خرجت منيره مسرعة من الباب قاصده السلوتي .

الغفير مهران لمنيره

\_ أيه ياست منيره ، أنت مالحقتيش تقعدى؟

\_ اتنيل وخليك في حالك ياغراب أنت.

تسير وهي تتابع السلوتي من بعيد ، تجد بكر ممسكاً بعود قصب ويمص القصب .

\_ واد يابكر .

يقف بكر

\_ أيوه ياست منيره .

\_ شايف الواد السلوتي .

\_ أيوه .

\_ عاوزاك تتسحب وراه من غير مايحس بيك

أوعى يغيب عن عينك، شوفه رايح فين

وإستناه كمان لما يرجع وهو راجع تجيبهولي.

\_ دي ساهله.

\_ لا مش ساهله، ده رايح يقابل حسن.

ينتاب بكر الرعب عندما سمع إسم حسن

\_ يقابل مين ياست منيره.

\_ أنت خايف ياواد، حقول للزي.

\_ لا مش خايف وحروح وراه .

\_ طيب إنجر قبل مايغيب عن عينك

تواصل منيره سيرها حتى باب الدار ، طلب يقف مُرحباً بها

تقترب منه .

\_ اجري ياواد شوفلي اللزي فين

ولما تلاقيه قوله منيره عاوزاك دلوقت

## 38\_ دار ارمنيوس

يجلس أرمنيوس على الدكة ، يستريح من مشوار الدير ، بجواره يشعه  
وعلى الكنبة المقابلة تجلس مريم .

مريم

\_ أديك شميتي شوية هوا ياشعه.

\_ أيوه نُقي فيها يامريم ، كنت محتاجه ياختي

أتنفس شويه ، وكلام أبونا ريحني كثير.

\_ يابختك ياختي.

ارمنيوس

\_ المره اللي جايه حاخذك يامريم.

طرق على الباب ، تتجه يشعه وتفتح الباب ويدخل الشيخ آدم بصحبة  
إبنة شحاته.

الشيخ آدم

\_ المقدس ارمنيوس هنا.

\_ أيوه ياعم الشيخ ادم ، اتفضل .

يدخل الشيخ ادم ، الشيخ آدم يقف ويمسك بيده ويُجلسه على الدكة.

\_ لو قدمت شويه ، ماكنتش حتلاقيني .

\_ ليه كنت فين يامقدس ؟

\_ كنت في الدير ، رحت أصلي ورجعت.

يلتفت ليشعه اعلمي شاي لعمك الشيخ آدم يامريم .

\_ حاضر بابا

تدخل مريم لداخل الدار.

\_ بص يامقدس ، وصلني خبر مايطمنش.

\_ ياساتر يارب ، خير ياشيخ آدم.

\_ لقد اخبرني المعتوه مزين الغبره عبدالمتجلي

أن جعفر حبييع كل الأراضى اللي في زمام الحاجر.

\_ حبييع الحيازه كلها .

\_ أيوه ، الواد بكر كان بيتزين عند

عبدالمتجلي وقال كده .

\_ دي تبقى مصيبه حلت ع البلد.

\_ علشان كده انا جيتلك .

\_ والعمل دلوقت .

\_ نروحوا نقابلوه .

\_ نقابلوه تاني ياشيخ آدم ، أنت مابتحرمش.

.....

السلوتي يسير عبر الصحراء بحمارته وبكر يتابعه من بعيد، يصل منطقة  
السيف ، يترك حمارته بعد أن يربطها بقدميها يصعد هضبة عالية ، يبدأ  
النزول حتى يصل للمنطقة المرتفعة قليلاً المسماه بالدرب ، بكر يتسلل خلفه  
دون أن يشعر به السلوتي .

.....

في دار اللزي ، منيره تمشي ذهاباً وإياباً وسط الدار .  
\_ بقى كل ده يطلع منك يالواحظ ، أنا مش مصدقه  
نفسي واصل ، لواحظ بنت جعفر بتعشق ، ومين  
حسن عدو أبوها، يأمرك يالواحظ ، شوفتيه وشافك  
إزاي.

.....  
 أمام الخيمة في الجبل، يجلس حمدان وحسن .

\_ قلبي متوغوش على ليله اختي يا حسن.

\_ ليله مفتحه ومش ساهله يا حمدان

اللزي مش حيقدر عليها .

\_ أنا عارف ، بس خايف يؤذيها.

\_ مايقدرش يعمل فيها حاجه ، اللزي

مجنون بيها وصعب يؤذيها.

يلمح حسن السلوتي قادم من بعيد.

\_ فيه حد جاي ؟

\_ دي مشية الواد السلوتي .

\_ أكيد جاي يقولنا حاجه ، تعالى نشوفه.

ينزل حسن وحمدان في اتجاه السلوتي، ما إن يراهم حتى يقع على

الأرض من التعب ، يلهث بأنفاس متسارعة.

حمدان

\_ ارتاح وخذ نفسك ياسلوتي.

السلوتي يُتتهته في الكلام ويخرج من جيبه قطعة القماش ويعطيها لحسن

\_ لواظ بعنالك المنديل ده.

وماتبعَتوشُ حاجه تاني معايه ، تعبت .

حسن يفتح قطعة القماش ويقرأ ( \_ بكتباك يا حسن على حته من جليبيتي ،  
عشان

نفسى يبقى معاك وريحتي ، أنا عايشه في الدنيا  
عشانك وبيك ، وماليش رجا من ربنا غير أكون ليك .  
مفيش قلب أحسن من قلبك يا حسن ، والختام سلام  
من قلب مايبعرف ينام .

تدمع عيني حسن ويضع قطعة القماش على قلبه .  
السلوتي ينتفض مسرعاً

\_ حمشي أنا ألحق الحماره أحسن يأكلها ديب .  
حسن

\_ تشكر ياسلوتي ، تعبناك معانا ، خلي  
بالك من نفسك .

السلوتي يبدأ النزول من درب الجبل .  
\_ شُفت الكلام الحلوا اللي كاتباه لواحظ يا حمدان .  
\_ العشق مر يحسن ويخليها تقول أكثر من كده .  
\_ تعرف يا حمدان ، لواحظ الحاجه الحلوه

اللي مصبراني في اللي أنا فيه.

\_ دا انت واقع لشوشتك يا حسن ، شُفت القلب

و عمايله ، مالقيش غير بنت عدونا يحبها

قولي حاسس بأيه دلوقت.

\_ حاسس أني زي الطير اللي طائر ، وتايه

في الفضا ، مش لاقى فرع شجره يتاويه

طائر وبس ، لاعارف رايح فين ولا له

طريق يرجعله، ينزل ولا يطير

هو ده حالي يا حمدان .



## 39\_ المؤامرة

إن حاولت أن تُحصي وجوههم أُصِبت بالإحباط، قلوب أفلست ليس لديها رصيد من رحمة ، هجرها الضمير ، تاريخهم في القرية ملطخ بالسواد، ملتزم خلف ملتزم ولا يكفُ النباح، هذا هو حال بلدة غنية يسرقون مايسرقون وهي ماتزال فتية .

في مضيعة جعفر يجلس جعفر وبصحبته اللزي وهارون.

هارون

\_ الشريف معتصم يمكن يجي الأسبوع ده يا جناب

الملتزم .

\_ يشرف في أي وقت وحينزل ضيف عندي

ويتعمله تشريفه تليق بيه.

اللزي

\_ أنا حستقبله بنفسي أنا والرجاله من بره

البلد .

يدخل طلب وهو يحاول أن يستجمع أنفاسه

اللزي

\_ فيه حاجه ياواد يا طلب؟

\_ أيوه ياسبع ، الست منيره عاوزاك حالاً .

\_ خير ، فيه حاجه حصلت؟

\_ بتقولي ماتسيبوش وهاته معاك .

\_ طيب انجر قدامي يابجم .

جعفر

\_ مالها الست منيره .

\_ بعтали ، حروح أشوف فيه أيه؟ حوصل

الدار وأرجلكم .

يخرج اللزي مسرعاً وخلفه طلب

.....

لا تياس إن تاخر شروق الشمس ، وانتظر شروق جديد حتى لو تأخر كثيراً  
حاول أن تبحث عنها خلف السُحب والغيوم وسوف تجدها ولا تضيع حياتك  
في الإنتظار .

في حجرة لواحظ مع جليستها المعتادة حلیمه .

- \_ سمعتي الكلام اللي داير في البلد.
- \_ كلام ايه يالواحظ، أو عي يكون عني؟
- \_ لا ياستي ، عن أبوكي.
- \_ ماله أبويه يابت.
- \_ حبييع كل الأرض اللي في الزمام.
- \_ أيوه سمعته بيقول كده ، ولما حاولت  
أكلمه شخط فيه وز عقلي.
- \_ و انت فاكره الموضوع ممكن يعدي بالساهل؟
- \_ حيحصل أيه؟
- \_ حسن مش حيسكت .
- \_ وحسن ماله بالأرض.
- \_ حسن واقف مع أهل البلد الغلابه
- إن كان وقف لابوكي واللزي وضرب  
كريم علشان عاوزين ياخدوا دار المقدس  
مابالك والأرض اللي عايشين عليها أهل البلد  
و حمداني و حمدان ابنه لو هو ماتحركش  
حيخلوه يتحرك.

\_ وتفكري ممكن يعمل أيه ؟

\_ ممكن يحصل فيها ضرب وقتل.

لواحظ تبكي

\_ يعني معرفش أفرح يوم، لازم كل فرحه

تجر وراها نكد وهم ووجع ، إنزلي ياحليمه

سيبيني لوحدك

\_ أنا ماكنتش أقصد حاجه.

\_ عارفه ياحليمه ، قولتلك سيبيني لوحدك

.....

اللزى يسير عائداً للدار وخلفه طلب ، قبل أن يصل للبيت بأمتار

قليله يقطع منازع عليه الطريق .

\_ منازع ! أيه اللي جابك دلوقت؟

\_ جاي علشان أقولك ، لقيت أثار أقدام

وشغال عليها وحتوصلني لحسن .

اللزى تنفرج أساريره.

\_ أيوه كده ، مايجيبها إلا رجالها.

\_ يعني أستاehl أتعشى.

\_ بيتك ومطرحك ، اتفضل معايه.

باب الدار مفتوح ، يدخل اللزي وخلفه منازع ، منيره لم تنتظر كثيراً  
ولم تعباً بمنازع.

\_ كويس اللي جيت دلوقت.

\_ خير ، فيه أيه تاني يامنيره؟ سمعتي حاجه

تاني عند ليله.

\_ لا ، اللي عاوزاك فيه أهم من ليله.

\_ أيه ده اللي أهم من ليله؟

\_ مش حينفع أتكلم قُدام حد .

منازع يستشعر الحرج .

\_ أنا حدخل المضيفه وانتوا خدوا راحتكم.

اللزي

\_ أنت مش عاوز عزومه ، اتفضل وأنا

حخلص وأجيلك.

يدخل منازع حجرة المضيفه.

\_ حفضل طائر لحد أمتي يامنار ع، لا دار تؤيك

ولا عيل يشيل إسمك، وادي قعه .

يجلس على أقرب دكة ، بدأ يأتي إلى مسامعه صوت اللزي.

\_ أنت إتهوستي، عشيه بتتهمي ليله

والنهارده إستلمتي لو احظ، وكمان

بتقولي لواحظ بتعشق حسن ، تيجي إزاي.

عندما يأتي إلى مسامع منازع إسم حسن منازع ، إنزعج وتسلل بهدوء

حتي يستمع لهم بشكل أوضح.

\_ طيب بالراحه ياخويه، الكلام أخذ و عطا .

\_ قولي وخلصيني ، أنا عارف حكاويك

الماسخه.

\_ لو كلامي طلع غلط ، إقطع رقبتني.

\_ وده كلام يتعقل.

\_ افهم اللي حقوله وبعدين اعمل اللي عاوزه.

اللزي بغيط.

\_ أنا رحنت علشان أزور لواحظ ، وانا داخله

سألت عليها الواد مهران ، قلني مع السلوتي

لسه داخل يقابلها .

\_ السلوتي داخل يقابل لواحظ ؟

\_ ماتقاطعنيش بس ياخويه ، دخلت أدور

عليها ، سمعت صوتها بتتكلم مع السلوتي

وتقوله عاوزاك تودي دي لحسن، حاجه زي

منديل أو خَلقة مقطوعه والسلوتي بيقولها

هو بيعتلك منديل وأنت تبعتي منديل

\_ منديل أيه ؟

\_ مااعرفشي ، بس أنا خليت الواد بكر

يمشي ورا السلوتي ، ويشوفه رايح فين.

وقلت له لما يرجع السلوتي هاته وتعالى.

\_ يعني بكر ورا السلوتي دلوقت .

\_ أيوه .

منازع يقترب أكثر وأكثر.

\_ يعني السلوتي على كلامك رايح يودي

مرسال من لواحظ لحسن .

\_ أيوه .

\_ كلام مايتعقلش ومش قادر أفهمه.

\_ لما يجي بكر ومعاہ السلوتي

حتعرف كل حاجه.

\_ حنشوف يامنيره وأنا مستنيهم.

يتجه نحو غرفة الضيوف فيسمع منازع وقع أقدامه فيجري بسرعة

ويجلس على أقرب مقعد.

\_ يواقعه طين ، باين كلامها صح ، كده

ممکن يعتروا في حسن.

يدخل اللزي

\_ معلش يامنازع ، إتعوقت عليك.

\_ ولا يهملك ، أكيد حاجه مهمه أخرتك.

\_ لا مفيش ، أنا واخذ على كده من منيره.

.....

بالقرب من دار اللزي ، يظهر بكر وهو ممسكا بملابس السلوتي من ملابسه

عند كتفه.

\_ اطلع قدامي ياابن العبيطه.

\_ أنت واخذني فين ؟

\_ دلوقت تعرف .

يصل بكر وهو ممسكاً بالسلوتي لباب دار اللزي ، طلب يقف في ذهول

\_ مال الواد السلوتي يابكر ؟ عمل حاجه؟

\_ عمل بلاوي سوده ، حبقى أقولك عليها.

السلوتي يبكي.

\_ أنا معملتش حاجه، سيبوني .

بكر يطرق باب الدار وتفتح منيره.

\_ جيت في وقتك ياواد يابكر ، عفارم عليك.

\_ ومعاه السلوتي.

\_ ادخل بالحزين ده.

في مدخل الدار ، منيره والسلوتي وبكر .

\_ قولي حصل أيه ياواد يابكر.

\_ مشيت وراه زي ماقولتيلي ، وصل الدرب

اللي في الجبل ، قابل حسن واداه حاجه

\_ تعالى علشان تقول الكلام ده للزي.

في مضيضة اللزي ، منازع يحاول أن يستدرج اللزي في الكلام

\_ عمل أيه جعفر النهاردة ، قاس الارض.

\_ أيوه وقطعها لعشر حنت ، كل حته مية فدان.

\_ ولقي حد يشتري ولا لا.

\_ معتصم حيبي الاسبوع ده .

منيره تقتم حجرة الضيوف .

\_ بكر جه وجاب السلوتي معاه

تعالى إسمع كل حاجه بنفسك.

يخرج اللزي من حجرة المضيضة ويتجه لوسط الدار حيث بكر ومنيره

ومعهم السلوتي.

\_ أيه الحكايه ياواد يابكر ؟

\_ الست منيرة قالتلي امشي ورا السلوتي

وشوفه رايح فين ، مشيت وراح ، لقيته دخل

الدرب اللي في الجبل اللي ورا السيف. ، وقابل

حسن هناك.

.....

في حجرة المضييفة ، منازع في قلق وحيرة ، أدرك أن حياة حسن في خطر  
 \_ الحكايه باينها كبيره ، لازم ألحق حسن دلوقت.

يفتح باب المضييفه ويخرج متسللاً ، يصل إلى الباب الخارجي ، لا يلتفت  
 للغفير طلب الذي علتة الدهشه ومنازع يخرج مسرعاً  
 طلب لنفسه.

\_ فيه أيه ؟ أنا مش فاهم حاجه واصل  
 دلوقت لمايجي بكر حيقولي كل حاجه

.....

في منتصف دار اللزي ، يقف مستجوباً للسلوتي.  
 \_ يعني أنت يااهبل ، عارف مكان حسن ، وبتروح عنده.  
 بكر

\_ ايوه ياسبع ، وطلعنا كلنا عبايط.  
 اللزي بغضب.

\_ استنى انت يابجم.  
 يلتفت نحو السلوتي

\_ وأيه حكاية الخلقة اللي بعنتها لواحظ لحسن

\_ معرفش حاجه ، هي ادتني خلعه والخلقة

قالتلي وديها لحسن .

يلتفت نحو بكر.

\_ وأنت شفته بعنيك وهو بيقابل حسن.

\_ أيوه ياسبع، ورجعت معاه ولما وصل البلد

مسكته وجيت بيه عليك.

.....

حجرة ليلة التي كانت تقف وتفتح الباب قليلاً وتراقب المشهد من بعيد.

\_ والعمل دلوقت ياليله ، حسن وأبوكي وأخوكي في خطر.

أهرب وأروح أقولهم ، طيب وحهرب إزاي

آه يأمرك ياليله.

تسمع صوت اللزي وهو يتحدث مع بكر.

\_ دَخل المخبول ده حوش البهايم

حتى أشوف صرفه فيه.

.....

منيرة للزي

\_ مش حتقول لجعفر.

\_ حقوله بعد ما أخلص على حسن

وأجيب رقبتة.

ليه لم يعجبها كلام اللزي عن حسن.

\_ ان شاء الله تيجي رقبتك أنت مش

رقبة حسن يامفتري.

تمشي في حجرتها وهي في حيرة وقلق ورعب.

\_ وبعدين ياليله ، حتفضلي ساكتة.

بس اللزي قال مش حيضر أبويه وأخويه.

بس حيضر حسن ، هو انت نسييتي اللي عمله

علشانك وعلشان سديري وأبوكي وأخوكي.

.....

الذي يتذكر منازع ويتوجه لجرة المضيفة .

\_ حاخذ منازع وباقي الرجاله ونهجم

على حسن في الدرب.

يدخل الجرة.

\_ معلش يامنازع اتعوقت

قبل أن يكمل جملته كانت المفاجأة منازع غير موجود.

\_ يكون راح فین منازع ، برضه

ده كلام يامنازع.

الذي يحدث نفسه .

\_ يبقى أكيد سمعنا وعرف مكان حسن

وراح يسبقنا ويخلص على حسن

علشان ياخذ العشرين أردب قمح.

طيب و بعدین يالذي، أسيبه هو يخلص عليه

لكن ده ممكن يقتل الحمداني وابنه

ولو حصل ليله مش حتنسهاالك.

يقطع تفكيره حضور ليله هي تقف على باب المضيفة.

\_ ليله ؟ فيه أیه .

\_ عاوزاك في كلمتين .

\_ تعالي، ادخي .

\_ خير ياليله ؟

\_ عاوزه أطلب حاجه ، بس خايفه تكسفني.

\_ قولي ياليله ، مقدرش أرفضك طلب.

\_ أنا سمعت كل حاجه ، عاوزاك تسيب

حسن وأبويه وأخويه في حالهم.

\_ مش حينفع ياليله ، أنا سبت حسن

غيري مش حيسييه.

\_ تُقصد مين غيرك .

\_ منازع ،تلاقية قرب يوصل هناك

ومنازع مايبيرحمش ، ممكن يخلص

على حسن وأبوكي وأخوكي.

\_ وهو ماله بيهم ، حد كراه عليهم.

\_ أنا كريته على حسن بس وخايف

يروح ابوكي واخوكي في السكه

علشان كده أنا حاخذ الرجاله وأروح دلوقت.

على الأقل الحق أبوكي وأخوكي.

\_ وحسن .

\_ حسن محكوم عليه بالإعدام ، لوسبته

الكل حيروح فطيس ، يا أروح أنا

أخلص على حسن وأجيب أبوكي وأخوكي.

.....

منازع يسير بسرعة ، حل عليه الإجهاد والتعب، تحامل على نفسه

حتى دخل الخيمة ، سقط داخل الخيمة، اندفع إليه حسن وحمله من على

الأرض ووضع على صدره .

\_ كوب ميه يامر سال .

مرسال يأتي بالماء سريعاً، يُسقيه حسن الماء ويرش وجهه ببعض

الماء ، الحمداني وحمدان يحاولون إسعافه مع حسن ، بدأ منازع

يسترد أنفاسه .

حسن

\_ فيه أيه يامنزع ؟ أيه اللي عمل فيك كده.

\_ أنا جاي أجري من البلد حتى هنا  
ماو قفتش خالص يا حسن، انتوا في خطر.

الحمداني

\_ فيه أيه يابني.

\_ اللزي عرف مكانكم ، وممكن يجي  
في أي وقت دلوقت.

حمدان

\_ عرف مكانا إزاي؟

\_ منيره اخته شافت لوا حظ بنت

جعفر وهي مع السلوتي وبتديه

حاجه يوصلها لحسن ، وبعنت

واحد من الرجاله ورا السلوتي

وشاف السلوتي معاكم واول مارجع

السلوتي البلد مسكوه وسلموه للزي

واللزي حبسه في حوش البهايم

\_ يعني كده عرفوا موضوع لوا حظ معايا؟

\_ ايوه يا حسن ، بس مش ده المهم.

\_مش مهم إزاي ، لواظ في خطر.

\_كلنا في خطر دلوقت ياحسن

اللزي حيجي هنا دلوقت، كمان

علشان أنا مشيت من الدار من غير ماقوله

وجيت علشان أحذرك، هو حيفكر أني جيت

أخلص عليك واخذ العشرين أردب قمح

وأنى طمعت وسبقته على رقبتك.

.....

اللزي يمتَطي حصانه ويمسك ببندقيته ومعه هارون وكُريم يمسك  
كلاً منهما بندقية معهم جمع من الرجال ، يتجهون نحو الجبل في ليلة خفت  
فيها ضوء

القمر . اللزي يحلُّم بالتخلص من حسن وإحضار الحمداني وحمدان  
لإرضاء ليله ، يسابق الريح قبل ن يصل إليهم منازع ، هو يعلم أن منازع  
عندما يسكن

الجبل يستغني عن حصانه.

.....

داخل الخيمة في الجبل، حسن ومنازع والحمداني وحمدان ومرسال يفكرون في كيفية الخروج من مأزق هجوم اللزي وأشدهم قلقاً الحمداني.

250

الحمداني

\_ حنعمل أيه دلوقت يا حسن؟

\_ مش حنهرب وحنكون مُستعدين ليهم.

يلتفت حسن نحو منازع.

\_ تفتكر معاهم كام باروده يامنزع.

\_ حوالي تلاته ، اللزي وهارون وكُريم

مافتكرش باقي الرجاله معاهم، أنا السبب

ياريتني ماجبتهم.

\_ نصيب يامنزع ، أنت كفرت عن غلطتك

وجبتلي تلاته ، ومعاك واحده ، يبقى معانا

أربع بارودات.

حمدان

\_ يعني حنواجهم.

حسن

\_ نعم حنواجهم.

منازع

\_ تسلم دماغك يا حسن ، اللزي مايعرفش

إن عندك بارود ولا عامل حسابيه ، كده

ضمنت تفاجئهم وتغلبهم.

## 40 \_ مضيفة جعفر

مائدة العشاء ، على المائدة طبق به زوجان من الحمام المحشي بالفريك وطبق آخر به قطع كبيرة من اللحوم، طبق شوربة ( مسلوقه بلغة الصعيد) مطشوشة بالثوم ، طبق ويكا وطبق ملوخية وعيش شمسي، يتناول جعفر طعام العشاء بصحبة لواحقه، يقطع عليهم الطعام حضور الغفير مهران.

\_ إالحق يابيه .

\_ فيه أيه ياواد يامهران؟

\_ اللزي لامم كل الرجاله وطلع على الجبل

\_ طلع يعمل أيه؟

وقف الطعام في فم لواحقه وكاد أن يحدث لها قئ من هول

المفاجأة .

\_ حيروحووا يجيبوا حسن .

\_ هو عرف مكانه .؟

\_ أيوه .

\_ عرف مكانه من الواد السلوتي ، بيقلوا

مستخبي في الدرب اللي ورا السيف.

ترتّبك لواحظ وعندما تحاول أن تقف على قدميها ، تُسقط الأواني والأطباق الموضوعة على مائدة الطعام.

تم بحمد الله

يُتبع الجزء الرابع والآخير الرياينه شرق.